



# 吉林彙徵自序

僕生長蓬廬早失乾蔭深懷無告孤憤幽居備平子之四愁甚梁鴻之五噫長卿賣賦渴病滋深方朔爲郎飢愁欲死依劉無計徒悽愴以登樓荐范何人獨旁皇於歧路於是抱琵琶而出寒束髮從軍聽鬢築於胡天柔腸結轂時則喧笳動地填鼓驚天磧走沙黃峰迴霜紫落日照大旂之色塞馬嘶風荒城鳴成鼓之聲征鴻叫月每於木葉山前蓮花幕裏盾磨餘燼燭刻閒陰則營準析木考不咸遠溯乎肅慎通貢之初下迄乎元菟置郡之後蓋以三垣考曜上應箕尾之墟九野分臺古號挹婁之國黑水中分於欄地夫餘界接乎掩漉七部之域魏隋殊名五京之稱遼金異壤單單大嶺而太皇蓋馬長白異其稱森森三江而松花圖們鴨綠別其派碣盤十道鬱棲陵冑多荒穴接九梯楚棘蠶叢甫闢啞峒人武大榮祚稱雄於忽汗河東禹吾天驕鐵骨打得勝於拉林江上至若俗同蒙段地號大荒金鈴繁腰蘇蘇膜拜銅環貫耳牙牙曼歌侏儻味乎語言猛獐成其風俗刀咩火種未頒條教之書鑿齒雕跽不改羌戎之習環象寥隔文軌羈遲則當授齊民要術以訓農法周禮黨庠以教士又若鐵道靈馳金

序

一



甌蕩賊內侵，蠡賊外逼，犬戎防秋之策，多疏銅柱之標，盡失甘松互市，方恃赤嶺爲長城，回紇請盟，竟棄維州，爲甌脫食肉之儔，慮何能遠，臥榻之下，睡豈容甯，則當置戊己之邊防，增庚戌之士斷效，李俚盡地力之智，用趙過能代田之名，他如五行百產寶藏，精英玉韞珠輝，山川明媚，榎楠杞梓，簪秀乎輪囷，球琳琅玕，貢輸於天府，研地質則古禽理骨，藉詮鵬鳳於說文，標物本則奇獸留皮，克辨鼯鼯於爾疋，此又白阜莫能測其奇，山經莫能窮其類也。今者故宮荆棘已歿，銅駝兩戒，山河難關，鐵牡撐犁，自甞強胡，自恃荒驕，冒頓不庭，背漢妄思，狡逞望風，雲於沙漠，思將帥於鼓鼙，小醜尙存，英雄爲之髀拊，匈奴未滅，男兒何以家爲，用是摻集遺文，徵求舊說，綴爲一集，名曰吉林彙徵，無臧戛數對之才，媿張華風物之志，自知覆瓿，聊備采輶，嗟呼萬里投荒，抱蠻府參軍之恨，三年羈迹，歷鳶溪毒站之鄉，冷炙偏饒，勞薪未息，江次翁之供母，依舊行傭，阮步兵之途窮，於今知命，慨其歎矣，謂之何哉，摩崖燕筆，試請待乎他年，潤色鴻文，幸以俟諸君子。

民國三年十月合肥伽園氏郭熙楞自識於依蘭官廨

吉林爲古肅春之國由漢迄今郡國部落錯雜其間唐書白居易傳鷄林賈人求其詩云其國宰相以一金易一篇是爲稱鷄林之始滿洲語烏拉吉林四字連稱烏拉謂江吉林謂沿其僅曰吉林從漢文而省也然則吉林雞林亦取其聲音相近云爾豈有他哉顧其山則有長白興安諸嶺蜿蜒迤邐不亞五嶽之雄奇也其水則有松花混同鴨綠烏蘇里諸江浩瀚汪洋不亞三江之明秀也且林礦土田鳥獸魚蟲寶石珍珠嘉禾良藥山珍海錯美備精良不亞九州之華實也然數千百年地利不盡闢人煙不加密渾渾噩噩樸陋如太古望古城廢壘以及畊隴舊蹟又時流露於蔓草荒煙豈遼金以還盛而復衰與抑篳路籃縷山林猶待啓與不禁唏噓憑弔者久之欲求之記載非獨文獻無徵即覓一竹枝辭亦不可得蓋清初閉關自守愚昧其民以讀書力田爲厲禁不以教育爲事又常有文字之獄故記載寥寥及季世日俄逼處幡然變計改行省置郡縣設民官講求新政綱舉目張雖日有進步頓改舊觀而桑榆收效已失之晚吁可慨已 合肥郭君伽園博雅君子從事吉林公餘之暇博收約取著有吉林彙徵二卷凡疆域沿革山川支派官兵之編制人物種類風俗旁及金石

靡不具備於國界國防尤爲留意所論前清俄約三次之失蹙地數千里每慨乎言之更以失去海參崴我無海口根據地爲可惜又中國與韓勘圖們江界未定其後雖間島爭回而成豐十年天津俄約所云海中間之嶺至圖們江口其東屬俄其西屬中國者計俄里二十有五尙無着落查中韓勘界原有土門江西南屬朝鮮東北屬中國之語土門即圖們其間應有歸中國海口之地今韓已併於日無論何時我若與俄脩約皆應按照原約據理力爭以爲出海之一線而不可稍形退讓一誤再誤致塞咽喉雖然航路固不可緩鐵路亦所當急光緒中葉俄日東清南北滿鐵路縱橫入我疆界門戶洞開藩籬盡撤一旦疆場有事運兵運餉人通而我塞此坐困之道也我惟有吉長鐵路二百六十餘里庸有濟乎亟宜立限展長使依密延甯一帶處處修成御接一氣或山奉直達京津或由奉旁出灤河或由黑遠繞張庫四通八達制人而不受制於人而電線之安設亦如之至於練兵興學廣屯墾課丁藝生聚教養爲民國實邊而不同於前清之因循敷衍者又不待言矣語曰前車覆後車鑑又曰亡羊補牢未爲晚也有心時局者當不河漢斯言迴憶宣統庚戌余始至吉林有吉

林紀事詩之作頗費搜羅今 郭君之箸是編更徵聲氣應求同一未忘結習  
但白山黑水共客邊庭時閱三秋風景不殊舉目有河山之異信乎王氣不足  
恃而人才之大可貴也後之覽者其亦有感於中發政治思想而進籌邊一策  
乎

民國二年五月十六日豫章沈兆禔序於依蘭



箕尾星明大漠秋羨君  
長揖容邊州平生廣武  
英雄歎一掌恆沙世界收  
地志禁殘成絕學版圖  
攬取借前籌何時共盡  
飛騰志併塞綸兵看劍鉤

遯園社兄不見逾十年矣昨  
晤於京師出所輯吉林彙徵  
見示故讀既竟為題長句以  
志傾佩中華民國六年二  
月李國筠識



地志之書之以簡核勝者厥惟明康氏之武功縣志韓氏之朝邑志包括鉅細義例分明後世郡邑官書競相祖述而莫之或及其私人著述繁博而不失之冗濫者太平寰宇記最爲賅洽而范成大桂海虞衡志典贍詳核尤爲傑構明鄭氏露游廣西譔赤雅三卷叙述簡雅論者謂與范志相頡頏蓋文人學士寄跡異地流連景物俯仰今古徵文考獻紀述異同其關於掌故者至偉豈僅記道里之所出與夫風雲月露之歎歌云爾哉 合肥郭子伽園宿學之士也所輯吉林彙徵一書實兼有范鄭二氏之長受讀既竟輟粗序古今輿記之書之得失於此丙辰中伏日王彭識



## 吉林彙徵

凡例

一輿地之學自古爲難矧吉林屬在荒徼郡縣建置隨時更變地點沿革古無載籍未易確定是編引徵歷史於郡縣柝置互相詮證得以知地輿之沿革焉

一吉林郡縣設治在清光緒初年僅有數屬自改建行省次第設治府廳州縣增至三十餘處然各屬命有源於歷史者有沿用滿語者故於行政區域各縣建置年月之中並述地理歷史滿語土名以誌源流

一政治一門僅列職官兵政外交三項歷記官制沿革軍政設施以及日俄交涉將以稽舊章攷新政觀政治之得失供後來之參考若教育墾務寔業各要政尙待進行之際姑從闕焉

一種族風俗皆關於政治之進化是編所述或采取前人雜說或得之口耳訊問以及各局調查與官署之報告彙集編成以俟他日探風者有所徵焉

一是編取材史事旁徵舊說如柳邊紀略甯古塔紀略東北邊防輯要吉林地誌雞林舊聞錄通志政書公私報章皆分別採擇以取翔寔

一地輿人物金石各類間有搜輯一二未能成帙然又不忍割愛故附錄於後以俟大雅

徵

彙

林

吉

---

君子教之

凡  
例

## 吉林彙徵目錄

### 第一章 沿革

第一節 唐虞及周秦

第二節 兩漢三國

第三節 兩晉及南北朝至隋

第四節 唐

第五節 遼

第六節 金

第七節 元

第八節 明

第九節 明季清初

### 第二章 疆域

第一節 幅幘

第二節 地方行政區域

### 第三章 山川

目錄

第一節	吉林境內長白山支脈
第二節	圖們江附圖
第三節	松花江附圖
第四節	牡丹江附圖
第五節	烏蘇里江附圖
第四章	政治
第一節	職官
第二節	兵制
第三節	交涉
	中韓圖們江勘界始末
	中俄勘界始末
第五章	種族
第六章	風俗
第一節	滿漢婚禮之異點
第二節	喪葬特別之禮俗

行政  
軍政

司法  
外交

財政

吉

林

彙

徵

第三節 滿洲祭祀

第四節 風俗雜誌

第七章 地質

第一節 礦產

第二節 物產

附錄

輿地雜誌

五國城辨

謫戍人物攷

金石攷

目  
錄

目  
錄



# 吉林彙徵卷上

合肥郭熙榜伽園甫著

男光

雲霧霽霞

校字

## 第一章 沿革

### 第一節 唐虞及周秦

吉林爲古東方之國其見於史冊者虞爲息慎夏商周爲肅慎亦曰稷慎史紀五帝紀至於荒服北山戎發息慎咸戴帝舜之功竹書紀年載帝舜二十五年肅慎來朝獻弓矢書序云成王既伐東夷肅慎來賀左傳昭九年肅慎燕亳吾北土也山海經云大荒之中有山名不咸有肅慎之國

按肅慎稷慎實皆一國郭璞注山海經謂去遼東三千餘里今名爲挹婁國杜預左傳注肅慎北夷在元菟北三千餘里晉之遼東爲今之遼陽州元菟在遼東東北則自遼東以至北海統名曰肅慎也

### 第二節 兩漢及三國

漢武帝元封三年滅朝鮮分置樂浪元菟臨屯眞番四部至昭帝始元五年罷臨屯眞番以併樂浪元菟徙居高句驪白單單大嶺以東沃沮濊貊悉屬樂浪後以境土廣遠復分嶺東七縣置樂浪東部都尉後漢書東夷傳夫餘國在元菟北千里南與高句驪東與挹

婁西與鮮卑接北有弱水地方二千里本濊地也三國志東夷傳夫餘在長城之北本屬元菟漢末公孫度雄張海東夫餘王尉仇台更屬遼東時句驪鮮卑疆夫餘介二虜之間又後漢書東夷傳挹婁古肅慎之國也在夫餘東北千餘里東濱大海南與北沃沮接不知其北所極又東沃沮在高句驪蓋馬大山之東東濱大海北與挹婁夫餘南與濊貊接其地東西狹南北長可折方千里一名置溝婁去南沃沮八百餘里又高句驪本出於夫餘其國在遼東之東千里南與朝鮮濊貊東與沃沮北與夫餘接地方二千里

按元菟郡武帝元封四年間屬幽州三有高句驪上殷台西蓋馬等語又據後漢書東

夷傳沃沮在高句驪蓋馬大山之東蓋馬山即蓋馬縣境之山今之長白山也山以南

爲蓋馬縣北爲上殷台高句驪爲遼水所出即今伊通境

見陳澧東塾集

則今之吉林府伊通

磐石皆元菟郡屬也山以東爲嶺東七縣漢滅朝鮮遂並降沃沮濊貊屬樂浪樂浪爲

七縣統部兼有圖們江南北之地是夫餘在元菟北千里別爲一部高句驪王墓碑有

東夫餘北夫餘以四至地界攷之則高句驪以北挹婁以西當在今長春伯都訥地挹

婁在夫餘東北千餘里則長白山以東由甯古塔至混同江所謂北沃沮不知其北所

極是也沃沮有二有南沃沮北沃沮單單大嶺即今之長白山武帝滅朝鮮以沃沮地

爲元菟郡後爲夷貊所侵徙郡於高句驪西北更以沃沮爲縣屬樂浪東部都尉光武

罷都尉官後皆以封其渠帥爲沃沮侯則由圖們江北以及今之咸鏡道等處皆南沃沮也北沃沮一名置溝婁當即烏稽琿春以北盡海濱諸地凡林木叢雜人馬難行之處皆稱烏稽亦曰阿集兩漢之沃沮南北朝之勿吉隋唐之靺鞨皆指此也以當時四至攷之則吉林東南爲樂浪沃沮西南爲元菟東北爲挹婁西北爲扶餘也

第三節 兩晉及南北朝至隋

晉太康六年夫餘爲慕容廆所襲破其王依慮自殺子弟走保沃沮七年夫餘王依羅遣詣何龕求率見人還復舊國仍請援龕上列晉遣賈沈與廆戰廆敗羅得復國又東夷傳肅慎氏一名挹婁在不咸山北去夫餘可六十日行東濱大海西接寇湯汗國北極弱水其土界廣袤數千里居深山窮谷其路險阻車馬不通北史勿吉傳勿吉在高句驪北一日靺鞨其部凡七一粟末部二伯咄部三安車骨部四拂涅部五號室部六黑水部七白山部魏書勿吉傳勿吉國在高句驪北舊肅慎國也國有大水關三里餘名速末水國南有徒太山魏言太白其傍有大莫盧國覆鍾國莫多回國庫婁國素利國具弗伏國匹黎余國拔大何國郁羽陵國庫伏眞國魯婁國羽眞侯國又豆莫婁傳豆莫婁國在勿吉國北千里去洛六千里舊北扶餘也在室韋之東東至於海方二千里新唐書北狄傳達末婁自言北扶餘之裔高麗滅其國遣人渡那河因居之或云他漏河東北流入黑水隋書

靺鞨傳靺鞨在高麗之北邑落各有酋長不相總一凡有七種卽古肅慎氏也所居多依山水東夷中爲強國有徒太山者俗甚敬畏其國西北與契丹相接與隋懸隔惟粟末白山爲近隋開皇中粟末靺鞨與高麗戰不勝厥稽部長塔濟率八部勝兵數千人自夫餘城西北舉落內附大業八年詔左十二軍出蓋馬南蘇元菟扶餘沃沮等道右十二軍出肅慎等道征高麗舊唐書東夷傳高麗者出自扶餘之別種也東渡海至於新羅西北渡遼水至於營州南渡海至於百濟北至靺鞨東西三千一百里南北二千里其王高建武貞觀五年築長城東北自扶餘城西南至海千有餘里

按夫餘挹婁晉時疆域與後漢略同惟夫餘王子弟走保沃沮沃沮晉書無傳其疆域未可臆斷至夫餘王被慕容儼虜滅之後至北魏時爲勿吉所逐

見魏書高句麗傳

想卽爲

勿吉所併故魏書以後遂不復見矣勿吉挹婁靺鞨後皆統稱黑水靺鞨太白徒太皆長白山也粟末卽松花江也粟末部居最南抵長白山與高麗接黑水部居極北當在今三姓以東沿混同江各岸自唐取平壤白山部入唐其伯咄安車骨遺人皆併入渤海惟黑水部尙爲完疆耳豆莫婁卽魏書勿吉傳大莫盧國唐書達末婁所云在勿吉國北千里舊北扶餘北扶餘當在北郭爾羅斯至黑龍江地至高麗滅其國遺人度那河因居之那河卽嫩江古名難水所云室韋之東當在室建河口爲今伯都訥左右高

麗出自扶餘之別種唐薛仁貴既破高麗於金山遂拔扶餘扶餘川中四十餘城皆望風請服是其進兵先從西鄙攻扶餘南蘇次第取之也高句驪既滅新羅百濟尙存百濟亡而新羅遂兼有二國之地迨北宋新羅亡時有裨將王姓叛而建國遂曰高麗是今之高麗不過襲高句驪故名耳其領土又有不同者高句驪立國於滿洲據有高麗之平安咸鏡二道若高麗乃建國於朝鮮半島箕子所封朝鮮在今盛京南部一帶三韓故基則分有今高麗全壤故高麗亦名朝鮮又稱韓國是吉林疆域在晉爲夫餘挹婁高句驪沃沮北魏爲勿吉豆莫婁隋南爲白山粟末北爲伯咄安車骨東爲拂涅號室東北黑水窟說莫曳皆虞婁越喜鐵利等靺鞨地也

#### 第四節 唐

唐開元以前爲靺鞨高麗及高麗既滅渤海遂興渤海本粟末靺鞨而附屬於高麗者姓大氏高麗滅率衆保挹婁之東牟山築城郭以居高麗遺殘稍歸之有乞乞仲象者與靺鞨酋乞四比羽及高麗餘種東走遼水保太白山之東北阻奧婁河自固武后封爲鎮國公其子祚榮併比羽之衆恃荒遠乃建國自號震國王地方五千里先天中爲渤海郡王以所統爲忽汗州自是始去靺鞨號專稱渤海天寶中徙上京直舊國三百里忽汗河之東建五京十五府六十二州新唐書北狄傳肅慎故地爲上京龍泉府領龍湖渤三州

上京之南爲中京曰顯德府領廬鐵湯榮興六州又東京龍原府濊貊故地一曰柵城府領慶鹽穆賀四州又沃沮故地爲南京曰海南府領沃晴椒三州扶餘故地爲扶餘府常屯勁兵捍契丹領扶仙二州拂涅故地爲東平府領伊蒙沱黑比五州率賓故地爲率賓府領華益建三州以涑州爲獨奏州以其近涑沫江蓋所謂粟末水也以鐵利州爲鐵利府其北曰黑水靺鞨舊唐書北狄傳開元十三年安東都護薛泰請於黑水靺鞨內置黑水軍續更以最大部落爲黑水府以其首領爲都督諸部刺史隸屬焉中國置長史就其部落監領之又新唐書北狄傳黑水東北又有思慕部益北行十日得郡利部東北行十日得窟說部亦號屈說稍東南行十日得莫曳皆部又有拂涅虞婁越喜鐵利等部其地南距渤海東際於海西接室韋南北袤二千里東西千里拂涅鐵利虞婁越喜時時通中國而郡利屈說莫曳皆不能自通

按一統志渤海所置九京十五府六十一州多在吉林烏拉寧古塔及朝鮮界五京在吉林者四十五府在吉林者九其上京龍泉府所謂渤海王城實維挹婁故壤今甯古塔西大祚榮所居忽汗州據滿洲源流考爲今甯古塔呼爾哈河也呼爾哈河匯於甯古塔城西南一百里之畢爾騰湖湖廣五六里袤七十里許中有三山即所謂忽汗海也則忽汗州爲今牡丹江流域當爲敦化縣境中京顯德府據賈耽道里記自神州陸

行四百里至顯州又云自鴨綠江口東北行千二百餘里乃至顯州神州爲今奉天通化縣東境顯州距神州四百里當在今吉林府西南及伊通東南境遼史地理志謂渤海忽汗州即故平壤城也號中京顯德時太祖攻渤海拔其城以爲東丹王國又曰葺遼陽故城以渤海漢戶建東平郡遷東丹國民居之又曰東京魏時爲高麗平壤城遼東京本此唐於此置安東都護府攷安東都護府本在平壤上元三年徙遼東郡故城儀鳳中徙新城即今遼陽州治遼史據後徙之區猶指爲初置之所已相去五百里而以忽汗州爲平壤又以顯德府爲忽汗州並以上京中京合爲一區其誤甚矣東京龍原府濊貊故地濊貊在漢屬樂浪郡即今朝鮮江源道等處是也其所云大欽茂東南徙東京又云東南瀕海日本道攷南京南海府爲今琿春在上京之南率賓在上京東南又其東爲錫赫特山於上京爲東南兩面皆際海與日本相值想即渤海東京地也其鹽慶穆賀四州今已不可考南京南海府唐書云南海新羅道也又云沃沮故地沃沮即今圖們江北以迄今之咸鏡道等處以地考之則南京當爲今咸鏡道北界及琿春之地扶餘故地爲扶餘府遼史太祖平渤海次扶餘城有黃龍見於城上更名黃龍府其所屬扶仙二州扶州當因扶餘得名仙州後不復見通志以通州所屬扶餘縣即爲仙州但遼史屬龍州者八

龍州即黃龍府

爲長平富利佐幕肅慎永甯豐水扶羅永平等

縣屬通州者七爲扶餘布多顯義鵠川強師新安漁谷等縣即指仙州爲扶餘未爲確也東平府爲拂涅故地新唐書北狄傳東北曰伯咄部又次曰安車骨部益東曰拂涅部安車骨部今阿勒楚喀及五常府境則拂涅部當在甯古塔三姓之間今甯古塔城西南八十里古城俗呼東京城亦曰佛訥和城即明佛訥和衛地與拂涅音近又在安車骨部東知爲甯古塔地無疑遼史以爲遼州始平軍地則在奉天以西其相去遠矣率賓府即今綏芬河金置率賓路節度使遼時爲率賓府置刺史本故率賓國地西北至上京一千五百七十里即今阿勒楚喀東北至呼爾哈一千一百里即今三姓西南至海蘭路一千二百里即今海蘭河以金史地望推之當在綏芬河率賓一作蘇濱明一統志作恤品其府路故基即今雙城子涑州爲獨奏州滿洲源流考謂獨奏猶言直隸不轄於府事得專達也其地近涑沫江蓋所論粟末水也唐以前所謂粟末水自長白山至今伯都訥而止故烏拉城爲粟末水今烏拉西北數里有土城土人呼曰高麗城當時高麗曾附屬靺鞨所謂涑州即此也鐵利府據契丹國志在臨潢正東北五十餘里其國西南與靺鞨接界新唐書北狄傳黑水稍東南行十日得莫曳皆部又有拂涅虞婁越喜鐵利等部是鐵利尙在拂涅北部至云西南與靺鞨接以唐書考之靺鞨七部全境粟末并其西南黑水據其東北則鐵利在墨水境內鐵利即鐵驪亦曰勃利

今依力嘎對岸屬俄之伯力即鐵利也黑水靺鞨據舊唐書北狄傳黑水靺鞨最處北方尤稱勁健又稱室建河東合那河忽汗河又東貫黑水靺鞨故靺鞨跨水有南北部以地望診之南部在混同江南烏蘇里江左右之地爲甯古塔東境北部在江北費雅喀奇勒爾之地爲三姓東北境至開元十三年安東都護薛泰請於黑水靺鞨內置黑水軍續更以最大部落爲黑水府則自混同江烏蘇里江三姓以下並索倫河皆黑水部矣其西北思慕部益北行得郡利部應在黑龍江外窟說部與庫葉同音當爲今之庫頁島莫曳皆部應爲今奇雅喀喇人等其拂涅虞婁越喜鐵利等部虞婁越喜今無可考曹氏謂爲挹婁故地其道里相去遠矣是唐時西北爲高麗後爲渤海涑州東爲上京及率賓府東南爲南京東北爲東平府西南爲中京西北爲扶餘府極東北爲黑

水靺鞨

### 第五節 遼

契丹立國分五京爲五道其下有若干州軍縣其在吉林地者則爲上京之東南東京之東北及女真五國等部其繫於上京者則有長春州遼史地理志長春州韶陽軍下節度本鴨子河春臘之地興宗重熙八年置隸延慶宮兵事屬東北統軍司統縣一東京則有通州黃龍府甯江州率賓府輝發女真諸部是也遼史地理志通州安遠軍節度本扶餘

國王城渤海號扶餘城太祖改龍州聖宗更今名保寧四年升節度統縣四龍州黃龍府本渤海扶餘府太祖平渤海還至此崩有黃龍見更名開泰九年遷城於東北以宗州檀州漢戶一千復置統州五縣三甯州混同軍觀察清甯中置初防禦後升兵事屬東北統軍司統縣一率賓府遼史營衛志率賓府刺史故率賓地輝發部大金國志自咸州東北分界入山谷至溧沫江中間所居之女真隸咸州兵馬司謂之輝發部長白山部博羅滿達勒部又兵衛志遼屬國可紀者五十有九朝貢無常有事則遣使徵兵或下詔專征不從者討之助軍衆寡各從其便無常額鐵驢鞞兀惹北女直輝發原同女直皆不輕用之所以長世女真契丹國志女真世居混同江之東山其地乃肅慎故區也地方數千里戶口萬餘無大君長立首領分主部落饒山林契丹於長春路置東北統軍司黃龍府置兵馬都部署司咸州置詳袞司分隸之文獻通考四裔考女真蓋古肅慎氏世居混同江之東長白山下鴨綠水之源南鄰高麗北接室韋西界渤海鐵甸東瀕海後漢謂之挹婁元魏謂之勿吉隋唐謂之靺鞨姓挈氏隋開皇時曾入貢其族分六部有黑水部即今女真契丹目之曰慮真阿保機慮其爲患誘遷豪右數千家於遼陽而著籍焉分其勢使不得與本國相通謂之合蘇館合蘇館者熟女真也又曰黃頭女真自咸州東北分界入谷口至溧沫江中間所居者以隸咸州兵馬司與其國往來無禁謂之回羈回羈者

非熟女真亦非生女真也自涑沫江之北甯江之東地方千餘里戶十餘萬無大君長亦無國名自推豪俠爲酋渠小者千戶大者數千戶則謂之生女真僻處契丹東北隅又遼聖宗紀太平元年東京留守奏女真三十部部長請各以其子詣闕祇候詔以其父俱來受約又道宗紀咸雍五年五國博和哩部叛命蕭索諷討之十二月五國來降

按遼置郡縣僅及松花江左右故其上京東京大都在伯都訥長春農安烏拉等處其東北兩面諸部非羈縻即僑置耳遼史太平四年改鴨子河爲混同江塔魯河爲長春河而營衛志謂鴨子河在長春州東北三十五里通鑑輯覽長春州爲郭爾羅斯前旗地今之長春即割郭爾羅斯前旗設治也黃龍府與通州均爲扶餘故地通州先名龍州又改扶餘府爲黃龍府屬龍州太祖平渤海次扶餘城有黃龍見於城上更名黃龍府黃龍府屬縣有八通州縣屬有七見前此言通州統縣四想然遼史旣言改扶餘府爲龍州又言改龍州爲通州則通州與龍州似屬一處至開泰九年遷城於東北改扶餘府爲黃龍府始分爲二也扶餘城爲今長春東北境則黃龍通州應在今伯都訥長春之間甯江州今伯都訥城東南石頭城子是也金之破遼首得甯江得勝陀碑尙在石頭城北確有可證至五京之外如率賓府者則仍渤海之舊名而與五京異也遼滅渤海後即率賓故地置率賓府以東境疆域之廣闊僅設一率賓府以鎮之蓋其專

用兵北部而無暇東顧也北極黑水其地多自爲部落叛服無常其最著者以五國部完顏部五國部遼史地理志聖宗時來附命居本土以鎮東北境屬黃龍府都部署司五國者博和哩國博諾國鄂羅木國伊埒圖國伊埒濟國今三姓爲五國頭城是也其自三姓以下至烏蘇里江左右則有烏舍部伯哩部鐵驢等部落其完顏部據金史有特克新特布水完顏部舍音水完顏部普德爾水完顏部瑪奇嶺赫伯村完顏部札蘭完顏部金祖所居有海古勒完顏部其部落毗連無可詳考惟舍音水爲今三音訥戩地札蘭即瑋春以東入海之雅蘭河其在吉林西北若達羅克部富察部博都里部費摩部瓜爾佳部珠嘉部珠格部烏蘇展部則在今伯都訥伊通五常等處圖們水有溫特赫部烏庫哩部長白山北之赫舍哩部伊勒呼嶺布薩部海蘭水有烏凌阿部其溫都部齊達勒部沃稜部則在甯古塔間舍國部威準部哲爾德部當在瑋春敦化之交其餘如沃埒部尼瑪哈部矩威水部布古德部納哈塔部伊勒敦部阿克占部錫默部星羅棋布各據一隅時叛時服無可稽考是遼之時吉林全境西北爲東京之通州黃龍府西爲上京之長春州南爲長白山部西南爲輝發部東南爲博羅滿達勒部東北爲女真烏舍鐵驢鞞鞞等部也

第六節 金

女真之先本出於靺鞨始附屬於高句驪五代時附屬於契丹初爲完顏女真部崛起於圖們江流域金太祖實錄云遼以鑛鐵爲號取其堅也鑛鐵雖堅終有損壞惟金一色最爲眞寶金之色白完顏色尙白况所居按出虎水之上於是國號金其建置仿於遼設五京復增一京爲六分十九路滿洲共設九路上京路金史地理志上京路即海古勒之地金之舊土也天眷元年號上京海陵遷都於燕創上京之號止稱會寧府大定十三年復爲上京其山有長白青嶺瑪奇嶺溫都爾水有阿勒楚喀混同江拉林松阿哩鴨子河會寧府金史地理志會寧府下初爲會寧太宗以建都升爲府天眷元年置上京留守司以留守帶本府尹兼本路兵馬都總管後置上京海蘭等路提刑司東至呼爾哈路六百三十里西至肇州五百五十里北至扶餘路七百里東南至率賓路一千六百里至海蘭路一千八百里縣三海蘭路金史地理志海蘭路設總管府貞元年改總管爲尹仍兼本路兵馬都總管承安三年設兵馬司副總管有伊勒呼水西北至上京八百里東南至高麗界五百里又率賓路節度使遼時爲率賓府置刺史本率賓故地太宗天會二年以札蘭路都貝勒所居地瘠遂遷於此以海陵罷萬戶置節度使因名率賓路節度使西北至上京一千五百七十里東北至呼爾哈一千一百里西南至海蘭一千二百里北至邊界幹罕阿林千戶二千里恤品河流經建州東南一千五百里入於海又呼爾哈路國初置

萬戶海陵例罷萬戶乃改置節度使西至上京六百三十里北至邊界哈喇巴圖千戶一千五百里又肇州下防禦使舊珠赫店也天會八年以太祖兵勝遼肇基王迹於此遂建爲州天眷元年置防禦使隸會甯府海陵時嘗爲濟州支郡承安三年復以爲太祖神武隆興之地升爲節鎮軍又隆州下利涉軍節度使古扶餘之地遼太祖時有黃龍見遂名黃龍府天眷三年改爲濟州以太祖來攻城大軍徑涉不假舟楫之祥也置利涉軍貞祐初升爲隆安府又泰州德昌郡節度使遼時木契丹二十部族牧地海陵正隆間置德昌郡隸上京大定二十五年罷之承安二年復置於長春縣以舊秦州爲金安縣隸焉又長春縣遼長春州韶陽軍天德二年降爲縣隸肇州承安三年來屬有達嚕嚕河鴨子河必埒布泉又咸平路金史咸平路領府一曰咸平當在今開元縣境其所屬有歸仁玉山二縣金史地理志歸仁縣遼舊隸通州安遠軍本渤海強師縣遼更名金因之北有細河又玉山縣章宗承安三年以穆蘇集平郭林河之間相去六百餘里之地置貞祐二年四月升爲節鎮軍曰鎮安

按上京路爲海古勒之地金史獻祖徙居海古勒水始有棟宇之制遂定居於阿勒楚喀之側今阿勒楚喀城東北二十餘里有海古水即海古勒也俗稱爲大海溝小海溝合流入阿勒楚喀河今阿勒楚喀城南四里有白城即上京會甯府地據松漠紀聞徐

夢莘北盟會編許亢宗奉使行程錄以道里計之毫無疑義徐云近闕去繳蓋有岡阜圍繞高丈餘皇城也城中有一小城基址疑係當年之禁城方約二里南面有土阜對峙其高阜數層皆在子城想即當年宮殿遺址也海蘭路在今延吉海蘭之流域所云西北至上京一千八百里東南至高麗界五百里者據朝鮮史云遼金與高麗舊界在今咸興府南之定平府咸州等九城乃高麗所築尋即撤還所謂九城者即今之慶源鏡城富寧會寧鍾城興京穩城等府終金之世圖們江南岸之九城不能爲高麗有故史云西北至上京一千八百里東北至高麗界五百里由今之海蘭河計之北至阿勒楚喀城南渡圖們江而至朝鮮之定平道里適相符合率賓路爲渤海率賓故地今之綏芬河也其疆域與唐大略相同所云札蘭率賓相去千里札蘭或云即海蘭一作耶懶又作阿懶金史高麗傳所謂耶懶以南者當即指此惟海蘭河在甯古塔城南四百一十里相距並無千里通志謂綏芬河以東千里許入海之水有雅蘭河相去適符千里之數庶幾近之呼爾哈路以河得名即瑚爾哈河瑚爾哈初稱虎爾哈又譌和羅曷故改里自甯古塔以下至三姓混同江岸皆呼爾哈路也北至邊界哈喇巴圖千戶一千五百里其部落雖無可攷然自甯古塔至混同江六百餘里過江九百里當在索穆河以北所謂邊界是也肇州據金史上京會甯府西至肇州五百五十里以地望診之

當在今伯都訥史言隆州有納爾琿河河爲伯都訥舊名在金爲肇州嘗爲濟州支郡故以屬之舊珠赫店即出河店也金史太祖與遼將都統蕭嘉里副都統托卜嘉將步騎十萬會於鴨子河北太祖自將擊之黎明及河遂登岸與遼兵遇於珠赫店今伯都訥遜札堡站東北十餘里珠赫城俗呼朱家城子即此地也隆州本龍安府明一統志龍安一禿河在三萬衛西北金山全遼志龍安城在一禿河西金山東冊說城周七里門四旁有塔亦名農安今吉林西北二百八十里農安縣在伊通河西二里城基與冊說合西門外半里有農安龍塔知農安安即隆州也泰州德昌郡所謂舊泰州金安縣其地無可考新泰州置於長春則金安當去長春不遠至云契丹二十部族牧地即今科爾沁左翼前旗及郭爾羅斯地也長春縣遼史地理志長春州韶陽軍本鴨子河春臘之地興宗重熙八年置又遼史上京有他魯河金史長春縣有撻魯古河遼聖宗四年正月如鴨子河二月己未臘撻魯河詔改鴨子河爲混同江撻魯河曰長春河金史收國元年太祖自將攻黃龍府進臨益州州人走保黃龍留羅索尼楚赫守黃龍上自率兵趨撻魯噶城時遼天祚帝率藩漢兵十餘萬出長春路太祖乘其未陣三面擊之天祚大敗退保長春乘勝遂克黃龍撻魯噶城即遼之長春州金復置爲泰州德昌郡即長春縣治所在也以泰州北至邊四百里推之金與遼皆北至臚胸河爲極止所謂

北至邊即臚胸河也至肇州三百五十里今自長春至遜扎堡站東北之珠赫城道里相符咸平府遼時爲咸州東北分界入山谷至粟末江中間所居之女真隸咸州兵馬司與其國往來無禁謂之輝發金史咸平有梅赫河雅哈河梅赫河則入輝發河雅哈河則入赫爾蘇河赫爾蘇河即遼河也出奉天園場經赫爾蘇邊門入昌圖境與西遼河合南流入奉天開原界咸平所屬歸仁玉山二縣皆在今伊通州境元史金主遺宣撫萬努領軍四十萬攻瑠格逆戰於歸仁縣北河上金兵大潰萬努收散卒奔遼東縣北河即伊通河也遼志開原北第三站曰歸仁站當即歸仁縣境玉山縣史謂以穆蘇集平郭林河之間相去六百餘里之地置考穆書河爲今伊通州境東北之河自開原至其地尙不出六百里之內則兩縣應均在伊通州左右無疑是吉林在金時南爲上京海蘭路東南爲率賓路東北爲呼爾哈路北爲肇州會甯府西北爲隆州及東京之泰州西爲東京咸平路屬之歸仁玉山二縣

第七節 元

元滅金後世祖奄有中夏建國號曰大元以京畿爲中書省分其領土爲十一行中書省置總管府滿洲爲遼東行中書省設治遼陽分轄各路吉林則爲開元咸平海蘭府碩達勒達等路及肇州地開元路元史地理志開元路古肅慎之地隋唐曰黑水靺鞨唐以其

地爲燕州置黑水府東瀕海南界高麗西北與契丹接壤即金鼻祖之部落也太祖阿古達旣滅遼即上京設都海陵遷都於燕京改爲會甯府金末其將布希萬努據遼東元初癸巳歲出師伐之生擒萬努師至開元率賓東土悉平開元之名治見於此乙未歲立開元南京二萬戶府治黃龍府至元四年更遼東路總管府二十三年改爲開元路領咸平府後割咸平爲散府俱隸遼東道宣慰司元一統志開元路南鎮長白之山北侵鯨川之海三京故國五國舊城亦東北一大都會也咸平府元史地理志遼平渤海以其地多險隘建城以居流民號咸州金升咸平領縣六兵亂皆廢元初因之隸開元路後復割出隸遼東宣慰司元一統志遼河從咸平府界流經瀋陽西北達廣甯路境海蘭路元史地理志海蘭路碩達勒達等路土地廣闊人民散居元初設軍民萬戶府五鎮撫北邊一曰屯一曰呼爾哈一曰烏圖里一曰托果琳一曰布苦江各有司存分領混同江南北之地其居民皆達勒達女真人各仍舊俗無市井城郭逐水草爲居射臘爲業故設官牧民隨俗而治有海蘭府碩達勒達等各相統攝焉續通志合蘭府碩達勒達等路金扶餘海蘭率濱和羅曷等路及肇隆信三州地也肇州元史地理志至元三十年以納延故地曰阿巴拉呼者產魚以伊斯壇哈喇蘇濟奇爾濟蘇三部人居之名其城曰肇州元史兵志肇州屯萬戶府元貞元年以納延布拉曷齊及打魚碩達勒達等戶於肇州旁近地開耕

按元自成吉思汗首略中央亞細亞初建都名曰和林格倫至太宗始滅金世祖建國兵威所及至於歐洲其疆域之廣甲於前代以東三省之大僅設一遼陽中書省以吉林之大僅設開元海蘭兩路可謂節疏目闊毫無建置矣開元路據元史云唐以其地爲燕州置黑水府唐之黑水在今黑龍江地面又一統志三京故國五國舊城則自長白山至黑龍江沿江瀕海之地皆隸開元路矣史云乙未歲立開元南京萬戶府治黃龍府遼之黃龍府即金之隆州亦即農安境則移開元於農安已非黑水之地矣至元四年更遼東路總管府二十三年改爲開元路領咸平府是又移開元於今之開原縣明洪武改元爲原設開原衛即今開原縣非元初之開元也咸平府金時領縣六其在吉林僅歸仁玉山二縣疆域與金略同其東南斜抵鴨綠江接於高麗海蘭路與金之海蘭路同名異地金海蘭路在延吉海蘭河流域元時海蘭路之所治據滿洲源流考云海蘭路即設萬戶府於甯古塔之境又元史瑚爾哈路有瑚爾哈河並混同江又有海蘭河入於海則海蘭府當在今甯古塔境內矣然元之海蘭府與金代異處而海蘭路則固轄有金海蘭路之地也其軍民萬戶五今雖無可攷以史文分領混同江南北之地斷之知爲混同江近岸無疑一曰屯當即窩稽之名通志謂發源屯窩稽之屯河應即其地呼爾哈路在今之三姓烏圖里疑即烏蘇里烏圖烏蘇譯音相似且在混同

江近岸當即是也至托果琳布固江今已無可考矣肇州元史云大德二年撥扶餘路蠻軍三百戶屬肇州元一統志上京之北曰肇州攷上京之稱不一有渤海之上京有遼之上京有金之上京元時所稱之上京當仍金舊號在會甯府則肇州應在黑龍江呼蘭府地然以金史會甯府西至肇州五百五十里之文證之則又顯相牴觸通志謂在伯都訥境正在阿勒楚喀西五百里許與史文合知肇州不得在上京北也惟史文附注廣甯府無稽攷耳通志據孫子耕友流努兒干送至肇州之文遂謂與甯古塔近不足據也

第八節 明

明至成祖時廢元之遼陽行中書省置定遼都營於遼陽後改爲遼東都指揮使司轄衛二十州二於今之黑龍江吉林二省置衛三百八十四所二十四明一統志女真東瀕海西接烏良哈南鄰朝鮮北至努兒干北海自開原迤北因其部族建置都司一衛一百八十四所二十官其酋長爲都督都指揮指揮千百戶鎮撫等職給與印信俾仍舊俗各統其屬以時朝貢明史兵志羈縻衛所洪武永樂間邊外歸附者官其長爲都督都指揮指揮千百戶鎮撫等官賜以敕書印記設都司衛所又都司一努兒干都司明實錄永樂二年忽刺溫等處女真野人頭目把刺答塔來朝置努兒干衛以把刺答塔阿刺孫等四人

爲指揮同知古驢等爲千戶所直撫七年閏四月設努兒干都司明會典永樂二年女眞野人來朝其後悉境歸附九年始設努兒干都司

按明代置衛所皆自永樂始其城站地面計在吉林者二十九努兒干明一統志女眞北至努兒干北海正在今混同江兩岸爲費雅喀奇勒爾各都所居惟努兒干都司實錄謂七年設而會典云九年設按之努兒干永甯寺碑中所言當以九年爲是女眞有三種海西者爲海西女眞建州毛憐者爲建州女眞極東爲野人女眞會典所云女眞野人悉境歸附始設努兒干都司則努兒干當在今三姓柳邊紀畧謂在甯古塔或者努兒干都司移駐於甯古塔未可知也其衛計三百八十四在今吉林府境則有薩里衛塔山衛額伊瑚衛達喜穆魯衛蘇完河衛巴延衛烏拉衛穆陳衛布爾堪衛哈達衛伊罕河衛瑪延山衛齊努溫河衛伊努山衛阿濟衛訥穆河衛佛爾們河衛伊拉齊河衛呼蘭山衛阿魯河衛推屯河衛雅哈河衛烏爾堅山衛伊實衛恰庫街羅羅衛奇塔穆河衛赫通額河衛農額勒衛穆勤衛噶哈衛塔克題音衛哈爾費延衛尼馬瑚山衛伊屯河衛伊爾們河衛勒克山衛薩喇衛法河衛雅奇山衛烏蘇衛鄂山衛赫什赫河衛呼魯河衛富爾哈河衛薩爾達衛庫埒訥河衛康薩衛勒富河衛阿林衛松阿哩衛札哈衛穆蘇衛屯齊山衛賽音衛伯都訥則有三岔河衛賓州有肥河衛費克圖河衛

岳喜衛阿實衛五常有摩琳衛默倫河衛雙城有拉林河衛寧古塔境有窩集衛窩集左衛窩集右衛窩集後衛堅河衛沙蘭衛伊爾庫魯衛斐森衛穆陳衛薩爾濟衛窩集前衛穆倫河衛沃楞衛穆克圖哩山衛多林山衛海蘭城衛鄂古河衛塔拉衛烏蘇哩河衛們河衛穆瑚埒河衛呼爾哈河衛赫圖河衛富勒堅衛富倫河衛尼滿河衛費雅河衛額喀河衛噶穆河衛托罕河衛實爾固辰衛札津衛祐實哈哩衛錫璘衛蘇穆噶河衛佛訥赫河衛呼勒山衛札穆圖衛穆當阿山衛克音河衛呼濟河衛拉山衛法勒圖河衛伊魯河衛布拉衛薩爾布衛布達衛興凱衛三姓有屯河衛穆勒肯山衛喜塔爾河衛克默爾河衛奇集河衛綽拉題山衛猷特哩衛福題希衛奇穆尼衛希禪衛額勒河衛弼勒古河衛實爾固辰衛和羅噶衛和爾邁衛利屯衛第拉衛瞻屯衛敦敦河衛幹賚城衛阿奇衛蒐里衛格根衛穆蘇衛海楚衛瓊春有率賓江衛雙城衛塞珠倫衛穆霞河衛慶金河衛烏爾琿山衛額哲密河衛通墾山衛舒緡河衛密拉衛阿布達哩衛富色克摩衛布爾哈圖河衛錫璘衛瑚葉衛吉朗吉爾珠倫河衛舒爾哈衛愛丹衛哈瞻衛所二十四有窩集屯河所喀勒達所呼特亨所德里沃赫所阿實所鄂爾琿山所法坦河所窩集奎瑪所窩集沃勒齊所岳色所窩集堅河所索爾和綽河所窩集色勒所城站地面五十八喜嚕林城佛多和站伊罕河衛哈必蘇站富達里站武都

奇站博和弼站赫勒哩站們河地面薩哈地面尼滿河地面噶穆地面額圖密地面烏爾固辰地面錫伯河地面松阿哩地面奇集河地面伊津河地面伊屯河地面果埒亨河地面蘇穆嚕河地面穆倫河地面綏哈河地面納敏河地面布爾哈圖河地面塞珠倫河地面綏芬河地面錫璣地面拉林口必興河口以上據吉林通志所載衛所地面城站關外建置略具於此攷明代疆域極於開原永樂時設努兒干都司以資控制而宣德中亦失哈以太監將數千之衆蹕行萬里之外前後三次用兵東北勒碑而還其威稜所及可謂遠矣然各衛所鎮撫聽其自治不能臣服其人民徒擁虛名羈縻勿絕而已當景泰間建州衛指揮董山糾毛憐海西諸夷盜邊殺掠明遣都御史李秉靖等督師入搗其巢諸夷稍削猶能乞款入貢至神宗時建州奴兒哈赤襲殺酋骨猛孛羅後邊更不敢與較至三十四年建夷遂不復入貢擁衆要挾憑陵開原疆吏禁悻莫可如何各酋長因之輕視中國自此邊疆迄無寧日而各衛與明之關繫名存實亡一有觸發全局瓦解觀明代邊疆之債事皆由於經營疏略以至於是有國家者可以鑒矣

第九節 明季清初

前清先世發祥於長白山之東姓愛新覺羅氏名布庫里雍順是爲始祖定三姓之亂遂居俄漠惠之野俄朶里城建國號曰滿洲數傳至肇祖居瓜爾佳城舊名赫圖阿拉地又

數傳至太祖於明萬歷十四年取尼堪外蘭次年環境諸國多以次削平其時滿洲有蘇  
 克素謬河部渾河完顏部棟鄂部哲陳部等五部長白山二國有訥殷部鴨綠江部扈倫  
 國有哈達部葉赫部輝發部烏拉部東海有窩集部瓦爾喀部庫爾喀部滿洲及長白山  
 二國為明之建州衛東海國為野人衛扈倫為海西衛前清開國方略太祖於萬歷十六  
 年有蘇完部長索爾果率部眾來歸十九年收服鴨綠江部二十一年取珠舍哩部訥殷  
 部二十三年攻輝發部多璧城二十五年平輝發國二十六年克烏拉宜罕城四十一年  
 平烏拉國是年征葉赫降烏蘇城及葉赫所屬璋城吉當阿城雅哈城赫爾蘇城和敦城  
 喀布齊資城鄂吉岱城及屯寨凡十九處四十七年清天命四年滅葉赫國其東海窩集部瓦  
 爾喀部之噶嘉路安楚拉庫路內河路於二十六年招降之三十五年征窩集部之赫席  
 赫路鄂謨和魯蘇路佛納赫托克索路三十六年取窩集之呼爾哈路瑚葉路三十八年  
 招降窩集部之那穆都魯路綏芬路甯古塔路尼馬察路三十九年取窩集之烏爾固辰  
 及穆稜二路四十二年征窩集之雅蘭路錫琳路三十九年克呼爾哈部札庫塔城崇禎  
 二年清天聰三年那堪泰路之呼爾哈人來歸命於甯古塔邊地駐牧崇禎十五年清崇禎七年  
 征松阿哩松江之呼爾哈部十屯人民俱降之此外有奇雅喀喇則天啟四年清天命九年  
 招服也庫爾喀部崇禎元年清天聰二年來朝人貢也赫哲喀喇費雅喀奇勒爾至康熙十

年降服之其庫頁部及海中各島萬歷四十五年清天命四年遣兵於海邊諸部凡散處部衆悉收之其島居負險不服者悉小舟盡取之而還

按長白山之東布庫哩山下有池相傳爲天女浴躬處當時池畔有朱果吞之遂生子是爲清之始祖語涉荒誕節詞附會亦襲姜嫄履跡之意也清之始祖體貌魁異適三姓人爭爲雄長日構兵亂推爲國主乃定居俄朶里城一作鄂多哩城又作額多力城亦作阿克敦城今通呼敖東城在敦化縣越數世以不善撫其衆國人叛戕害宗族有幼子名范察者逃於野幸得免至肇祖慨然恢復爲志誅先讐之後以搜舊業距俄朶里城西一千五百餘里即今奉天蘇克素河嘉哈河之間太祖時環境諸部漸已削平國勢日盛乃招撫長白山鴨綠江路盡收其衆萬歷二十一年葉赫哈達烏拉輝發科爾沁錫伯卦勒察珠舍哩訥音九部合兵三路來侵太祖自將擊敗之十月以珠舍哩部長助葉赫諸部來侵遂遣兵征克珠舍哩部獲其部長釋其罪遷以歸瞻養之時段訥部亦以兵助葉赫諸部至是聚七寨人據佛多和山寨而居閏十一月命額亦都安費揚古曠蓋率兵千人圍攻佛多和山寨三月乃下斬其部長藪穩色克什取訥音部二十三年因輝發貝勒拜音達哩前與葉赫諸部一再來侵太祖率兵攻之克其所屬之多璧城三十五年平輝發國輝發之先木姓伊克得哩黑龍江岸尼瑪察部人有星

古禮者自黑龍江載木主遷於札嚕居焉因呼倫國之嚕揚阿圖謨圖二人居於璋地姓納喇欲附其姓殺七牛祭天改姓納喇是爲輝發始祖生子備臣備臣生納靈阿納靈阿生拉哈都督拉哈都督生嚕哈禪都督嚕哈禪都督生齊訥根達爾漢齊訥根達爾漢生旺吉努招服附近諸部築城於輝發河邊呼爾奇山號輝發國是時蒙古察哈爾國托薩克圖圖們汗自將圍其城不克而還旺吉努卒孫拜音達哩殺其叔七人自爲貝勒至是國亡輝發在遼東河傍即今奉天省先設後裁之輝發廳土人名其城曰輝發城三十六年太祖命褚英同舒爾喀齊之長子阿敏率兵五千征烏拉宜罕山城克之先是葉赫合九部兵來侵烏拉貝勒滿泰村弟布占泰爲清兵所擒釋還歸國時滿泰往所屬蘇幹延錫蘭地脩築邊濠淫村中婦其夫夜入殺布占泰歸遂主其國與清脩好後復背盟並侵所屬窩集部之呼爾哈路四十年太祖親征之克其臨河五城又取金州城次年先取遜札塔城進克郭多鄂謨二城翼日布占泰率兵三萬越富勒哈城清兵擊之布占泰遁投葉赫遂平烏拉國烏拉之先以呼倫爲國號姓納喇與哈達國同以納齊布祿爲始祖納齊布祿四傳都爾機都爾機生子二長克什納都督次古對珠延古對珠延生泰萬泰萬生布延布延收服附近諸部築城於烏拉河岸洪尼地國號烏拉自稱爲貝勒生子二長布罕次博克多

三十五年爲清  
貝勒代善陣斬

布延卒子布罕

繼之布罕卒子滿泰繼之至滿泰弟布占泰國乃亡烏拉在今省西北七十里松花江上之烏拉街舊有宜罕山城伊罕河出焉是年秋七月清太祖因布占泰投葉赫遣使語葉赫貝勒錫台什布揚古令執布占泰以獻使者三往不從太祖率兵四萬征之降烏蘇城盡焚葉赫所屬璋城吉當阿城雅哈城赫爾蘇城和敦城喀布齊賚城鄂吉岱城及屯寨凡十九處葉赫遣人訴於明曰哈達輝發烏拉三國滿洲已盡取之今復侵我其意即欲侵明取遼東以建國都使開原鐵嶺爲牧島之場矣明遣游擊馬時楠周大岐等率千人爲葉赫守衛東西二城四十七年命代善率兵五千守札喀關以防明兵親統軍征之自克依特城尼雅罕案盡取葉赫所屬蒙古游牧畜產整兵而還離葉赫城六十里駐之葉赫遣使向明開原總兵馬林告急馬林率兵助之至葉赫城四十里見清兵甚壯不戰而退八月滅葉赫國葉赫之先蒙古國人姓土默特滅呼倫國所居璋地之納喇部遂據其地因姓納喇後遷於葉赫河岸建國故號葉赫國其始祖星根達爾漢生錫爾克明安圖錫爾克明安圖生齊爾噶尼齊爾噶尼生楚孔格楚孔格生台楚台楚生二子長青嘉努次揚吉努兄弟綏服葉赫諸部各居一城哈達國人多歸之青嘉努揚吉努遂皆稱貝勒歲甲申明甯遠伯李成梁受哈達國所賂金及黑狐紫貂聽讒搆以賜敕賞賚爲名誘青嘉努揚吉努兩貝勒至開原並從兵三百皆殺之

青嘉努子布齋揚吉努子納林布祿各繼其父爲貝勒李成梁率兵取其杜喀尼雅罕二寨戊子年又率兵圍攻納林布祿所居東城大傷兵卒不克而歸乃與和好焉納林布祿弟錦台什布齋子布揚古嗣爲貝勒分居東西城至是葉赫遂滅葉赫今爲赫爾蘇邊門內之葉赫站在今省西四百九十五里明於此置鎮所謂北關是也扈倫四部葉赫烏拉輝發皆在吉林惟哈達在奉天海龍府境明代疆域極於開原葉赫偪在開原於此設關開通互市故以哈達爲南關葉赫爲北關也東海瓦爾喀部先是烏拉布占泰歸主其國以滿洲所屬瓦爾喀部安楚拉庫路內河路衆所推服之三人送葉赫引其使人招誘安楚拉庫路內河路清遣費英東初征瓦爾喀部取噶嘉路殺部長何球降其衆二十六年以安楚拉庫路舊屬瓦爾喀部復命統兵一千征之取屯寨二十餘招降萬餘人而還天聰九年十月復征瓦爾喀分八旗爲四路兩旗合進一路兩黃旗進兵之地曰額赫庫倫曰額勒約索兩藍旂進兵之地曰阿庫里曰尼滿兩白旗進兵之地曰阿羅曰諾萬崇德二年七月征瓦爾喀兩紅旗一路率綏芬雅蘭瑚葉烏爾吉壯丁兩藍旗一路率額赫庫倫額勒以東寨木克勒以西壯丁崇德五年征瓦爾喀輝克地方朱吉喇來朝是十地屬瓦爾喀部之證也瓦爾喀部沿瓦爾喀河入鴨綠江瀕海兩岸在興京南近朝鮮沿鴨綠圖們兩江之間及諸海島窩集部之赫席路以附

烏拉清遣人招降不從三十五年命貝勒巴雅喇巴圖魯額亦都札爾固齊費英東侍衛扈爾漢率兵千人征窩集部取赫席赫路鄂謨和蘇嚕路佛納赫托克索路鄂謨和蘇嚕路即今額默和索羅站佛納赫托克索路今佛多和河在額默和北三十六年呼爾哈路侵甯古塔城清駐防薩齊庫路兵擊敗之生擒人馬鎧匹餘衆悉降旣而降人有逃至窩集部之瑚葉路者次年命扈爾漢率兵千人征瑚葉路取之瑚葉路在興凱湖東之瑚葉河西北入烏蘇里江路以河得名綏芬路歸附後其路長圖楞爲窩集部之雅蘭路人所掠明年清遣額亦都率兵往窩集部之那木都祿綏芬甯古塔尼瑪察四路招其路長來歸額亦都旋師至雅蘭路並擊取之綏芬路即綏芬河也烏爾固辰路先是窩集部來歸路長僧額尼喀哩二人以太祖所賜甲四十副置綏芬地爲烏爾固辰穆稜二路兵掠去遣呼爾哈部長諭歸還所掠弗從乃命阿巴泰等征烏爾固辰穆稜二路烏爾固辰即庫爾布新河在興凱湖東北穆稜路即穆稜河均入烏蘇里江雅蘭路四十二年因雅蘭路掠綏芬路長至是征之降雅蘭錫琳二路雅蘭路即雅蘭河出錫赫特山南行入海呼海爾哈路札庫塔人來降旣又貪烏拉國布匹受其貝勒招撫三十九年額亦都等率兵克之那堪泰路之呼爾哈人來歸命於甯古塔邊地駐牧崇德七年清命沙爾琥達等率兵征松阿哩江之呼爾哈部十屯沙爾琥達等遣人

還奏喀爾喀木遮克特庫塔圖庫福提布鄂爾琿斡齊奇庫巴察拉額提奇薩里尼葉爾伯十屯人民俱已招降則十屯人與札庫塔城那堪泰路均爲呼爾哈屬也呼爾哈路據開國方畧云天聰二年長白山迤東濱海呼爾哈部頭目來朝則呼爾哈當仍是牡丹江沿岸處也奇雅喀喇音達琿路塔庫喇諾羅錫拉忻路滿洲源流考云自甯古塔東行千餘里在烏拉哩江兩岸者曰穆倫穆倫又東二百餘里往尼滿河源者曰奇雅喀喇一曰恰喀拉恰喀拉散處於琿春沿東東海及富沁岳色等河是也其音達琿三路則天命元年九月招服之音達琿即今音達穆河塔庫即達卜庫屯喇喇今拉哈蘇蘇此合三地爲一路也諾羅路即諾羅河今稱撓力河錫拉忻路今奇納林河均奇雅喀喇所屬也庫爾喀部文獻通考云琿春河左右皆庫雅喇人等所居滿洲源流考謂在圖們江北岸與朝鮮慶遠相對赫哲喀喇費雅喀奇勒爾部會典圖說三姓東北海外地皆諸部所居也赫哲喀喇康熙十年世祖諭甯古塔將軍巴海曰飛雅喀赫哲雖已降服然其性暴戾當善爲防之以是知赫哲諸部至康熙時始征服也赫哲一作赫錦亦作赫真又作黑津所稱薙髮黑津是也又有額登喀喇則爲不薙髮黑斤通稱曰黑哲今自烏蘇里江以下阿吉以上土人呼曰短毛子其人皆薙髮自阿吉以下至黑勒爾以上土人呼曰長毛子其人皆不薙髮能以舟行水上駕以犬所謂使

大國也赫哲又東北行七八百里曰費雅喀一作飛牙喀俗與額登喀喇同今自黑勒爾以下至東北海口合奇勒爾俄倫春二族凡居江沿者皆稱濟勒密即費雅喀也奇勒爾一作欺勃爾今自索倫以南松花江以北凡游處山林者皆曰奇勒爾部庫葉部古爲女國亦名毛人國明稱苦兀今稱庫頁皆莫叟轉音魏源云庫頁部海島廣袤埒臺灣近混同江口其島雜有赫哲費雅喀鄂倫春之人而庫頁爲大雖一洲島幅員千里爲混同江口一大謬沙其間打牲部落曰庫頁曰費雅喀曰俄倫春歲時貢貂皮於吉林環庫葉之島大小數十若東海沃新楚魯峰島崗勒庫島雅普格哩島及海內天然八島所謂島居負險不服者乘小舟盡取之當即指庫葉並諸小島也至是吉林全境咸隸版圖自康熙二十八年討羅刹後邊患亦少息矣

## 第二章 疆域

### 第一節 幅員

吉林極幽燕之東北控遼瀋之上游襟帶江山表裏華甸峨峨高原地跨形勝幅幘寥廓實爲邊陲重要之區由省城計里核算東至密山之松阿察河與俄之東海濱省分界之亦字界牌一千八百餘里南至濛江之湯河口與奉天撫松縣交界五百餘里西至伊通外之威遠堡邊門與奉天開原縣交界五百六十餘里北至濱江之松花江與龍江呼蘭

縣交界六百餘里東南至琿春與俄分界之土字界牌一千二百餘里東北至綏遠縣之烏蘇里江混同江黑龍江三江交匯與俄分界之耶字界牌二千五百餘里西南至磐石與奉天海龍縣交界四百餘里西北至農安與郭爾羅斯前旂交界五百餘里計吉林統部東西二千四百餘里南北一千五百餘里

第二節 地方行政區域

吉長道道尹轄境

按清光緒三十三年設置原名長春兵備道宣統二年改西南路分巡兵備道兼管長春關稅及商埠交涉事宜加參領銜民國二年改叫南路觀察使三年改吉長道道尹駐長春屬縣十一曰吉林長春伊通濛江農安長嶺樺甸磐石舒蘭德惠雙陽

吉林縣

舊名船廠北魏靺鞨粟末部唐渤海爲涑州遼金屬甯江州明季屬扈倫之烏拉部清康熙十五年移甯古塔將軍於吉林遂爲省城雍正四年設永吉州隸奉天府尹乾隆十二年改理事同知光緒八年升爲府民國二年改爲縣各府廳州均於民國二年改縣後倣此設經歷一員今裁省城在京東二千三百里東界敦化西界雙陽南界樺甸北界舒蘭

長春縣

舊名寬城子遼屬上京路金承安二年移泰州於長春縣元屬開元路清嘉慶五年借郭爾羅斯前旂地置長春理事通判名長春廳設治於新立屯距今縣治五十里道光五年移住寬城子光緒八年改撫民通判並增設農安分防照磨十五年移農安照磨駐靠山屯十六年又移駐治東北九十里朱家城子十五年升爲府今改縣設經歷一員今裁省西南二百四十里東界吉林西界奉天之懷德南界伊通北界德惠

### 伊通縣

地名伊通河又作伊圖河伊屯河史名一禿河皆伊通之轉音治在上游金咸平路明爲伊屯河衛地後爲扈倫族之葉赫部清嘉慶十九年設伊通分防巡檢光緒八年升爲州又於州迤北九十五里赫爾蘇邊門設分防州同今改爲佐治員宣統元年升伊通州爲直隸州今改縣設吏目一員今裁省西南二百八十里東界磐石西界蒙古之郭爾羅斯前旗南界奉天之西豐北界長春

### 濛江縣

土各二道江因縣境有頭道江二道江設治在珠子河北岸濛江口故名江下流入頭道江爲松花江之正源濛江滿語爲恰庫金爲舍音完顏部明季屬訥殷部清光緒三十四年增設濛江州今改縣省南三百六十里東界奉天之撫松西界奉天之輝南通

化南界奉天之臨江北界樺甸

### 農安縣

因縣旁有龍安塔音譌爲農安土人又訛爲龍灣故名塔建於遼聖宗時在今縣西北數里唐爲渤海之扶餘府遼太祖平渤海至此有黃龍見於城上更名黃龍府金太祖改爲濟州後改爲隆州又改爲隆安元初立南京萬戶府治黃龍府至元間更遼東路總管府改爲開元路即置開元路總管於此明爲伊屯河衛旁境清光緒八年借蒙古郭爾羅斯前旂地設分防照磨屬長春十五年改爲縣設巡檢一員今裁省西北三百六十里東界榆樹西界長嶺南界長春扶餘北界長嶺及郭爾羅斯前旂

### 長嶺縣

地名長嶺子新唐書渤海國長嶺瑕領府河二州滿洲源流攷河州在黃龍府北有河流入松花江當即此地又縣治北四十六里有古城疑係長嶺府故址元屬開元路明爲伊屯河衛旁境滿語果勒敏珠敦果勒敏長也珠敦嶺也清光緒三十四年由農安及續放荒地分設縣治今仍之又縣南新安鎮於光緒三十年設分防主簿今改名新安佐治員省西五百二十里東界農安西界蒙古邦爾羅斯之前旂南界奉天之奉化北界扶餘

樺甸縣

原名樺皮甸子故名原勘縣治在樺樹林子因其地人烟稀少現移駐官街金爲赫舍哩部明爲法河衛之東境明季屬白山國之訥音部清初概屬封禁地光緒三十四年析吉林磐石敦化地增設縣省東南二百七十里東界敦化及奉天之安圖西界磐石南界延吉北界吉林長春

磐石縣

因縣治北山有石如磨盤故名磨盤山金爲尼瑪察部明爲扈倫之輝發部清初南境屬奉天今海龍縣之圍場光緒八年設伊通分防巡檢十三年裁設分防州同二十八年因於永安屯改設縣設巡檢一員今裁省西南二百里東界濛江西界伊通南界樺甸及奉天之海龍北界吉林長春

舒蘭縣

以其地有舒蘭河站爲省北台站之一土名朝陽川滿語舒蘭果實也境內本屬前清貢山爲采貢小山紅梨山檀之地明屬阿林衛清宣統二年析吉林府北界增設縣省北一百八十里東界五常西界磐石南界吉林北界德惠

德惠縣

地名大房身子在長春西北二百二十里舊屬長春清宣統二年由長春之沐德懷惠二鄉及東夾荒地增設縣省西北三百六十里東界松花江沿西界伊通河南界長春北界伊通河

### 雙陽縣

地名蘇幹延因境內有雙陽河故名蘇幹延滿語濁流也即蘇完河遼金爲寧江州旁境明爲依爾們衛蘇完河西與蒙古郭爾羅斯接壤清宣統二年析吉林西北地長春東地伊通北地增設縣省西一百九十里東界吉林西界伊通南界磐石北界吉林濱江道道尹轄境

按清宣統元年設置原名濱江兵備道二年改西北路分巡兵備道兼管濱江關稅及商埠交涉事宜加參領銜民國二年改兩北路觀察使三年改濱江道道尹駐哈爾濱屬縣八曰扶餘雙城賓縣五常榆樹濱江同賓阿城

### 扶餘縣

原名伯都訥又名那拉街爲省西台站之一又爲西通蒙部之邊驛有新站舊站清康熙時遣戍人悉在於此三十二年另建甌城於站南別於舊站因曰新城北魏靺鞨伯咄部遼爲達魯噶部隸北府節度金爲肇州元立屯田萬戶府仍爲肇州明初爲三岔

河衛後被蒙古科爾沁侵掠清廷撫定蒙部設伯都訥站於納爾渾之野始畫江爲界康熙二十三年設副都統宣統元年裁據吉林外紀云又有錫伯喀爾喀巴爾虎瓜爾察等佐領管理各旂戶後裁雍正四年設長甯縣隸奉天府尹乾隆元年裁併歸永吉州二年設州同十二年裁改設巡檢二十六年裁巡檢置理藩院蒙務主事以理蒙事嘉慶十六年裁改理事同知添設巡檢二員分駐伯都訥孤榆樹光緒八年廳治移駐孤榆樹改爲撫民同知三十二年升爲新城府還治伯都訥民國二年改縣三年因與直隸山東江西浙江貴州重複改名扶餘縣設府經歷一員今裁省西北六百里東界榆樹雙城西界松花江及郭爾羅斯前旂長嶺南界松花江農安北界松花江與嫩江合流處及郭爾羅斯後旂

雙城縣

本阿勒楚喀境許亢宗奉使行程錄渡拉林河至矩古貝勒寨達河寨布達寨皆在縣境因其地有雙陽堡亦名雙城子按雙城子有二一在綏芬河旁俄名尼格來司元史至正二十年遣軍淘金雙城明有雙城衛皆在綏芬河旁今屬俄之東海濱省之雙城子也雙城縣在金爲上京會甯府之西南境舊有二十城對峙故名明季爲拉林河衛後屬烏拉部清嘉慶十九年置協領隸阿勒楚喀副都統光緒八年設撫民通判宣統

元年升爲府今改縣設巡檢一員分防拉林城巡檢一員今併裁省北四百里東界賓  
縣西界扶餘南界榆樹北界松花江

賓縣

地名葦子溝松漠紀聞契丹徙翁舍展國於黃龍府南曰賓州又云自上京百五十里  
至拉林河百十里至賓州金上京即今阿城縣洪皓當日行程實由會寧向西行今賓  
縣治實在阿城東北地望適相差越金上京會寧府東境矩威部圖塔部女真所居明  
爲費克圖河衛今蜚克圖站爲縣西與阿城交界地清光緒六年築土城八年設撫民  
同知並設分防巡檢駐縣東南燒鍋甸子即今同賓縣治宣統元年升爲府今改縣設  
巡檢一員今裁省東北六百一十里東界方正同賓西界阿城雙城南界五常北界松

花江

五常縣

因其地分仁義禮智信五區故名舊名五常堡距今縣治三十里北魏靺鞨安骨車部  
遼爲阿延女真部各錫部長名號契丹國志稱爲東南五節度是也清同治八年設協  
領於五常堡光緒六年於歡喜嶺旁另建土城八年設撫民同知宣統元年升爲府今  
改縣設巡檢一員又於光緒八年設山河屯分防府經歷藍彩橋設分防巡檢今併裁

省東北三百六十里東界同賓西界榆樹南界舒蘭北界賓縣  
榆樹縣

地名孤榆樹故名北魏靺鞨伯咄部遼金賓州地明初爲三萬衛後爲三岔河衛終屬烏拉部清嘉慶年裁伯都訥蒙務主事分設巡檢二其一即設孤榆樹光緒八年改伯都訥理事同知爲撫民同知移註於此而移分防巡檢於伯都訥光緒三十一年設新城府還治伯都訥此處設榆樹縣宣統元年升爲直隸廳今改縣設巡檢一員今裁省西北二百八十里東界五常西界扶餘松花江長春南界吉林北界雙城

濱江縣

本雙城府治設治時因土名哈爾濱其地緊傍松花江故名江左近郭爾羅斯後旂地蒙人以此地草甸平坦遙望如哈喇蒙語因稱爲哈喇賓土人又譌轉喇爲爾遂稱爲哈爾濱金爲上京會甯府西北地元屬達勒萬戶府明爲岳希衛阿實衛塊清宣統元年設分防廳今改縣設巡檢一員今裁省北五百六十里原鞞傅家甸子四家子兩處地面不足十里嗣益以雙城阿城之地東界阿城西界俄暫租界之糧台南界秦家岡之鐵路旁北界松花江岸

同賓縣

地名燒鍋甸子又名瑪琿河滿語瑪琿肘也謂河流灣抱如人肘也因縣治東有大小長壽二河故名長壽縣金爲上京會甯府稱烏濟赫部明爲瑪琿河衛清光緒八年設燒鍋甸子巡檢屬賓州二十八年改設縣民國三年改名同賓設典史一員先時設一面坡分防巡檢一員今併裁省東北八百六十里市界甯安方正西界雙城阿城南界五常北界賓縣

### 阿城縣

本阿勒楚喀水名即今阿什河金史所謂按出虎水是也爲完顏本部地金上京會甯府今縣迤南四里有古城土人名爲白城即此城也元屬碩達勒萬戶府明爲岳希衛阿實衛境清雍正四年置協領乾隆二十一年設副都統宣統元年裁增設縣省東北四百八十里東界賓縣西界濱江南界雙城北界黑龍江

### 延吉道尹轄境

按清宣統元年設置原名琿春兵備道二年改東南路分巡兵備道兼管延吉琿春等處關稅邊務加參領衛民國二年改東南路觀察使三年改延吉道道尹原駐琿春改駐延吉屬縣八曰延吉甯安東甯琿春敦化額穆汪清和龍

### 延吉縣

地名延吉岡又名南岡本琿春治烟集岡是也金置海蘭路總管府明爲錫璘衛布爾哈河愛丹衛清初爲南荒圍場後因境內韓民越墾衆多光緒二十八年設延吉撫民同知宣統元年升爲府今改縣省東南七百六十里東界汪清琿春西界敦化南界和龍及朝鮮北界汪清甯安

### 甯安縣

地名甯古塔滿語甯古塔六數也爲東方肅慎之故墟縣西南七十里有古城遺址四圍幾及四十里即洪皓松漠紀聞所謂肅慎城也北魏靺鞨拂涅部唐渤海大榮祚建國於忽汗稱上京龍泉府唐書渤海王都下臨忽汗今古城西南鏡泊湖是也遼爲天福城金置呼爾哈路萬戶元置呼爾哈軍民萬戶府明設奴兒千都指揮於此統治諸衛清順治十年設副都統於古城在今城西北五十里康熙五年築新城後改爲甯古塔將軍十五年將軍移駐吉林城仍置副都統於此雍正五年置泰甯縣屬奉天府尹旋裁光緒三十二年裁副都統僑置綏芬廳宣統元年移廳治於三岔口增設甯安府今改縣省東南八百里東界穆稜西界五常南界延吉北界依蘭

### 東甯縣

本綏芬廳嗣甯由古移塔廳署於三岔口因名東甯唐渤海爲率賓府金屬恤品路明

爲綏芬河地面率賓江衛清光緒三十三年設綏芬廳宣統二年改名東甯廳今改縣  
省東一千四百里東界俄國之五站西界寧安南界琿春北界額穆

### 琿春縣

滿洲語琿春邊地也金烏庫哩部穆宗本紀圖們琿春之交烏里部與率賓部起兵夫  
祖往攻之撫甯諸路是也明琿春衛密札衛清爲南荒圍場康熙五十三年設協領兼  
管捕獮牲丁光緒七年增設琿春副都統宣統元年裁設琿春廳管密江站以東之地  
今改縣省東南一千二百里東界圖們江西界延吉南界圖們江北界東甯

### 敦化縣

俗名敖東城又名阿克敦城土人相傳爲高麗故城敖東滿語本音作鄂多哩設治時  
舊名阿克敦故稱敦化渤海建州元置斡朶里萬戶府明初建州農額勒赫什赫河等  
衛後爲窩集部之赫席赫路縣東有布庫哩山山下有池相傳爲天女浴躬吞朱果誕  
生聖子之說至清景祖兄弟六人分居遂號甯古塔貝勒滿語貝勒  
部長也清爲額穆赫索羅  
佐領所轄光緒八年新築城於舊城迤二里增設縣設巡檢一員今裁省東南四百七  
十里東界延吉西界吉林南界樺甸北界額穆

### 額穆縣

即額穆赫索羅站爲省城東台站之一清祖始居鄂謨輝之野以額穆和湖得名額穆和即俄摩和變音滿語額穆赫水濱也索羅十人撥戍之所也元爲開元路海蘭路分張廣才嶺東西爲界嶺東爲海蘭路嶺西爲開元路明爲翰朶里衛秃屯河衛同稱窩集部清初設佐領管轄台站旂丁向屬敦化宣統二年析敦化甯安五常之地增設縣省東三百八十五里東界甯安西界五常南界敦化北界甯安

### 汪清縣

以縣治有大小旺清河故名滿語本音作旺欽堡壘也清初爲庫雅拉部鈕呼特氏居此爲世管佐領在今大坎子地方宣統二年析琿春延吉甯安增設縣原治在旺清河南岸之哈順站旋移治於距延吉九十里之百草溝省東一千零二十三里東界東甯琿春西界甯安南界延吉北界甯安

### 和龍縣

地名和龍峪又名大嚕子明爲賡金衛明史永樂五年置賡金等五衛賡金河即賡吉音河今縣治西陰陽河是也清光緒十一年開放和龍峪光霽峪西步江三處爲中韓互市地韓民越壑日衆二十八年設和龍峪分防經歷屬延吉廳管圖們江越壑各地宣統二年改爲縣省東南八百里東界朝鮮之鍾城會甯等府界西界奉天之安圖南

界圖們江朝鮮之茂山府北界延吉

依蘭道道尹轄境

按清宣統元年設置原名依蘭兵備道二年改東北路分巡兵備道辦理邊務交涉兼管依蘭等處關稅加參領銜民國二年改東北路觀察使三年改依蘭道道尹駐依蘭屬縣十日依蘭同江密山虎林綏遠穆稜方正樺川富錦饒河

依蘭縣

係宣統元年奏准俟墾地漸闢人民日衆再行設治民國元年秋銜寶清民人之請暫設分防經歷屬同江二年改爲佐治員

又依蘭道道尹所轄十縣外尚有寶清勃利臨湖三縣均

地名三姓爲清始祖肇居之地史稱三姓構兵奉以爲主即此地也

說見前沿革篇滿語依蘭

喀喇依蘭數之三也喀喇姓也今截取上二音故名一作茂山樹多也元史海蘭路設萬戶府五一曰屯明爲和屯衛又爲野人衛窩集部屬之和屯噶珊之野清康熙五十四年置協領雍正十年設副都統光緒三十二年裁副都統設依蘭府今改縣設經歷一員今裁省東北一千六百里東界樺川西界方正南界擬設治之勃利北界松花江江北即省之湯源縣

同江縣

地名拉哈蘇蘇黑斤語老屋之謂以其地當松黑兩江之匯口故名金爲黑水靺鞨明

季爲使大部黑哲喀喇世族所居柳邊紀略所謂薙髮黑斤是也清光緒年編入旂籍黑哲即靺鞨之轉音今又變音爲黑斤渤海以後世爲靺鞨種族無疑光緒三十二年設臨江州宣統元年升爲臨江府民國二年改縣三年因與奉天省重複改名同江縣設巡檢一員今裁省東北千七百八十五里東界綏遠西界富錦南界饒河北界松花江東半渡江爲俄阿穆爾省西半渡江爲江省黑河道治

### 密山縣

地名蜂密山設治時部頒發印譌蜜作密遂仍之渤海湖州境明爲松阿察河地面清光緒三十四年設密山府今改縣省東北一千三百里東界虎林西界穆稜南界俄之都魯克

即快當壁

北界同江

### 虎林縣

地名呢嗎河呢嗎滿語山羊也因境右岸有七虎林河故名一名希呼林河明爲呢嗎河木倫河地面呢嗎河又爲尼滿河即奇雅喀喇部木倫河即今穆稜河清宣統元年設呢嗎廳分防同知嗣因呢嗎河皆在俄境遂改虎林廳今改縣省東一千九百里東界烏蘇里江右岸爲俄屬西南界密山北界饒河

### 綏遠縣

縣治在依力嘎山東北境內三面扼烏蘇里混同江之口唐渤海勃利州境金爲黑水  
靺鞨清宣統二年設州今改縣省東北一千五百里東界中俄分界耶字界牌西界同  
江南界饒河北界混同江江左爲俄阿穆爾省

穆稜縣

因穆稜河中貫縣境故名又名摩琳滿語謂馬爲摩琳以其地素產馬也金爲女真別  
部世祖本紀拉必瑪察據穆稜水使阿里罕往撫之即此地也明爲木倫河衛一作毛  
憐衛  
清初仍稱木倫路開國方略明萬曆三十九年辛亥秋七月取烏爾固辰穆稜二路是  
也光緒年間因韓民越界衆多設穆稜河分防知事宣統二年改設縣省東北八百一  
十里東界東甯西界甯安勃利南界甯安北界密山

方正縣

地名方正泡元屬呼爾哈萬戶府明季屬呼爾哈部清光緒三十三年設大通縣於松  
花江北崇古爾庫站嗣因吉江兩省畫分以松花江爲界大通屬江省宣統元年移治  
松花江南一作方正泡迤南設方正縣設巡檢一員今裁省東北九百零五里東界依蘭  
西界同賓南界牡丹江北界松花江江北即江省大通縣

樺川縣

地名悅來鎮一名蘇蘇屯以縣境東有樺皮川故名渤海以後爲靺鞨族所居即今之黑斤人也明季爲使犬部之音達埠路清天命元年八月招取南岸諾羅部及使犬部之音達埠音達埠即今縣境東之音達木河是也宣統二年設縣於佳木斯三年因水患移治悅來鎮省東北一千三百八里東界富錦西界依蘭南界擬設治之寶清北界松花江江北即江省湯源縣

### 富錦縣

地名富克錦滿語作夫替新今縣城即古代黑斤人建築古軛城渤海以後世爲靺鞨族所居今縣境左右古代留遺之城郭壁壘完全者計有數處縣西八十里有古城曰瓦利活吞滿語活吞城也縣東二百四十里有古城曰烏龍活吞縣西十五里有古城曰夫替活吞又縣南七里是河岸南北對峙有二古城土人但以對面城呼之又縣西門外有小古城名活吞吉利大約均爲黑斤部落墜居之地清爲黑斤人本部清光緒八年設協領以統新編土著之黑斤人後設富克錦巡檢宣統二年改設縣省東北一千八百里東界同江西界樺川南界寶清北界松花江江北即江省湯源縣

### 饒河縣

以撓力河得名滿語曰諾羅爲禽鳥衆多棲集之地漢音則譌爲撓力明爲尾瑪河地

面後爲竊集部之諾羅路縣境內黑斤人族居清宣統三年設縣省東一千九百四十二里東界烏蘇里江西界寶清南界虎林北界同江

### 第三章 山川

#### 第一節 吉林境內長白山支脈攷

長白山爲東方諸山之主峯吉林城東南六百餘里突兀聳秀樹峻極之雄觀萃扶輿之靈氣山之上潭曰闔門源深流廣松花江發源於其北鴨綠江發源於其西圖們江發源於其東奉吉兩省天然界限山之南麓分爲二幹一幹西南指者東至鴨綠江西至通加江高麗諸山皆其支裔也其一幹自西而北至納祿窩集復分二支北支至盛京爲天柱隆業二山折西爲醫巫闔山西支入興京爲啟運山自納祿窩集而北袤延四十里土人呼爲果爾敦敏即長嶺也長白山滿語果勒敏珊延阿林果勒敏長也珊延白也阿林山也古名不咸山漢稱單單大嶺魏曰蓋馬大山後魏曰太白山又曰太徒從太皇皆一山也長白山之名則自金始又稱白山俗亦稱爲白頭山蓋以山頂四時積雪故也回旄盤曲綿亙數千里吉林境內之山皆發源於長白山之東北二麓今將長白山山脈在吉林省之統系者約分三支以牡丹松花兩江爲斷凡在牡丹江以東者命名爲東部牡丹江以西松花江以東者命名爲中部在松花江以西者命名爲西部東部白奉天安圖


入吉林和龍縣之英額嶺經黑山嶺其分嶺有雞冠嶺子城牆嶺子廟嶺牛心山雞爪頂子大嶺子由英額嶺而北則爲敦化之恰爾巴嶺其分嶺有大青背駱駝嶺子延吉之二青背嶺北大頂子西四方台土頂子由恰爾巴嶺向東北則爲義松嶺其分嶺有禿老婆嶺烟筒嶺子再東則有老松嶺居延吉甯安汪清東甯四界之區此山綿亙數百里寔爲東北一大支幹由長白山東北百廿里俗呼爲老嶺其分嶺南有燈草頂子烟筒嶺子太平嶺汪清縣境東北有關老婆嶺荒頂子烏拉草頂子東甯縣境西北有馬鞍山盧家屯子臥龍屯甯安縣境迤東則入穆稜境爲穆稜窩集嶺以森林茂密故名其分嶺有狐狸密嶺四個頂子西北有樺麪石黑王嶺甯安縣境東北有黃窩集山密山縣境由穆稜窩集嶺至依蘭之察庫蘭嶺經哈達嶺至密山之奔松子嶺其分嶺有發希山虎林境之七虎林山半拉窩集山涼水泉山蘇爾德山由奔松子嶺迤西而北經對頭嶺子依蘭縣境葛蘭棒子山同江縣境至阿爾金山其分嶺有牛心嶺子烏爾根山其西樺川境有七星嶺子小青背大青背哈達密諸山由阿爾金山迤西北轉而東向入富錦境之雙崖山再東北則有別拉音山又東北爲烏爾古力山同江之西太平長春嶺楊木岡綏遠之太平山轉而西北行有孤山子小白山至喀爾布蘭山蘇杜立喀蘭山至科勒木山隣韓崎河通江再東則爲耶字界牌俄之伯力及東海濱省矣中部則由奉天安圖縣入吉林敦化縣之牡丹嶺即牡丹江發源處也由

牡丹嶺西北至敦化樺甸交界之富爾嶺逕新開嶺三個頂子其分嶺有牛心頂子太平山雙廟嶺烏松嶺子雞冠嶺子威虎嶺敦化縣境由富爾嶺別分一支有帽兒山五虎石樺甸縣境及舒蘭之玲瓏嶺滾馬嶺再北則至額穆縣之張廣才嶺一名長嶺即嵩嶺也東西三十餘里層松飾巖列柏綺望綠天樹海蔚爲鉅觀聳立吉林東部其山脈散布者有禿頂子北洋山牛心頂子太平山琵琶嶺子老黑嶺舒蘭縣之呼蘭嶺大禿頂子四方頂子臧麓嶺鞦韆嶺烟筒嶺子再北則爲吉林境之老爺嶺南慶嶺由張廣才嶺迤東北則有甯安額穆交界之老嶺其分嶺有五常之摩天嶺九十五頂子金炕山雞冠嶺子大青頂子馬鞍山再北則有甯安五常交界之茨老茅山甯安之圍場荒山至畢展窩集嶺其分嶺有五常之東西螞蜒窩集嶺雞爪頂子四方頂子大紅頂子二紅頂子索多和山碩多庫山長壽之牛高嶺樣子嶺螞蜒河嶺長壽山迤北則入方正縣之龍爪溝山東老嶺阿穆達山城牆嶺子老爺嶺烏槍嶺子七個頂子關門咀北界松花江其西部則自奉天輝南入吉林之濛江州斐德里山其分嶺有窟窿頂子七個頂子豐坡山四方頂子經三岔嶺二岔嶺至濛江磐石樺甸交界之那爾轟嶺其分嶺有樺甸之錯草嶺大小簸箕岡由那爾轟嶺西北至磐石之呼蘭嶺其分嶺有官馬咀子山土門嶺杉松嶺老毛山黑風頂子狍羊礮子雞爪頂子牛心頂子磨盤山逕東西老爺嶺馬鬃嶺至庫勒嶺其分嶺有雞冠山

猪腰嶺烟筒山紅石襪子青頂山伊通縣之一步山老爺嶺雙陽之小雙頂將軍嶺光僻山黑頂子再西北則爲伊通邊門之克勒山經馬鞍山摩里青山黑頂子至長春之白龍駒山接奉天之懷德縣此就吉林境內長白山脈之統系約略具此其他孤立無聯以及零星諸小山名目繁多不能備載姑從闕焉

第三章 山川


# 江河圖



例 圖

山	+	—	—	○	○	—	—
界	界	界	界	村	縣	湖	江
界	界	界	路	鎮	城	湖	河

一 分 万 百 一



圖們江流域 附圖

圖們江在琿春城東南四百里其南即朝鮮咸鏡道漢之樂浪郡也出長白山南麓分水嶺東麓曰土門色禽其源有二一爲正源紅丹水一爲分源石乙水紅丹水出小白山正東之三汲泡泡水東北伏流八里有泉湧出是爲紅丹水之源自泉湧東北二十五里受柳洞河水又東流五十里與石乙水匯焉是爲圖們江之正源亦即吉韓之分界也石乙水東北流二十里受紅土山水又東南流二十里與紅丹水匯焉是爲圖們江之分源紅丹石乙二水匯流以下始爲圖們江之正流自江源交匯後又東流十七里受紅溪河又東流至三江口受西豆水亦稱魚潤江圖們江自合西豆江水後水勢始盛又東北流逕望台山受外六道溝外五道溝石洞子溝折向東北流徑東景德又北流經懷慶街受小鍾城歲諸水北流入汪青縣界逕豐都鎮折而東受十三道嘴雅河諸水一名哈哩河與朝鮮分界受薩奇庫河三道河牛圈溝河石頭河經凉水泉子東入琿春琿春西南爲朝鮮界東流至黑底入境又東受乾瞻河又西北受檳榔溝北受拐磨子溝又南逕荒山坡受陰陽河南流至紅旗河口受紅旗河水又南西岸界朝鮮南流至大黑嶺子受蓮花泡河逕雲台山受圈兒河又南逕土字界碑出境經日俄交界注於海案圖們江之名稱始見於遼史遼天祚五年命駙馬蕭特默等將旗兵五十萬伐駝門敗績當時所謂駝門即圖們也

金史世紀景祖兵勢稍振統門水溫特赫部來附所稱統門即圖們轉音耳前清聖武記作圖們通典通攷一統輿圖皆稱圖們俗稱土門何秋濤朔方備乘乃作徒門總之駝統皆圖之雙聲而土徒又同音之輕重讀也滿洲語圖們者衆水聚匯有包藏萬有之義圖們江源流長千有餘里實爲朝鮮與中國天然界水齊召南水道提綱於圖們江下游除詳晰中國國境外並於江之南岸朝鮮六鎮及有名城市均已備載茲不復贅




松花江流域附圖

松花江本名松阿哩烏拉滿語謂天河也魏書勿吉傳國有大水闊三四里曰速末水遼日鴨子河聖宗大平四年改鴨子河爲混同江明一統志混同江俗呼爲宋瓦江本名宋瓦河至宣德八年始改爲松花江松花江發源於奉天長白山北所謂黑水是也北麓滙諸水爲二道江西麓滙諸水爲頭道江蜿蜒周折數百里入吉林由兩江口合流受葦沙溝色勒河至烟筒砬子納輝發河卡倫又北流受穆奇河至樺皮甸子由沙石澗東北流受海青溝溫德河至吉林省城南又北流受犍牛河興隆河經烏拉街至泡子沿受四家子河與舒蘭交界又北流至上河灣五十里入德惠縣與榆樹縣分界又西北流經蓮花泡南直西流逕鷹山南岸界蒙古郭爾羅斯前旗界逕伯都訥城西南又約六十里東分一水爲二道河又西北至三江口折成三角形來會古諾尼江卽嫩江也混同江之名自此始折東流北岸界黑龍江省南受拉林河入雙城又東流二百餘里受葦塘溝河朝陽河入濱江縣城北又屈曲行七十里受阿什河至斐克圖河入賓縣境又東流受烏爾河葦子溝河夾板河恒道河淘淇河擺渡河又東流四百餘里入方正受螞蜒河東北流與黑龍江省分界入依蘭縣南會牡丹江受達林河大小古洞河又東北二百五十餘里入樺川受小鈴璫麥河音達子河汶澧河又東北入富錦受哈達密河安邦河柳樹河又東


流與俄國分界經富錦縣城一百三十里入同江與黑龍江合其交匯處名黑河口又東流入綏遠州城北會烏蘇里江與黑龍江三江合匯入俄屬案松花混同實皆一水伯都訥以上直稱松花江自三江口與古諾尼江來會遂以松花混同爲上下游之稱且其地爲黑龍會流之處黑龍混同聲音相類故金史世紀直云混同江亦號黑龍江非無因也金史又云上京有混同江鴨子河宋瓦江是當時雖屬一水已分松花混同爲二名至所稱鴨子河係指長春一隅而言唐書靺鞨傳粟末之東曰北山部注他漏河爲今滔兒河於伯都訥西北境注嫩江而同入松花江是唐時粟末之稱僅至嫩江而止并非上下通稱也總之自長白山以下宜稱曰松花江至會嫩江黑龍江達烏蘇里三江之水直定曰混同江名義符合確無疑義元一統志以混同江源出長白山經舊建州西故上京下達五國頭城東北注海按建州今敦化縣上京今甯古塔是以牡丹江所經之地爲混同江則更誤矣

# 江丹壯



○	○	湖	江
村鎮	縣治	湖	河
——	——	——	×
縣界	鐵路	道路	舊驛站

尺之一分万百一



牡丹江流域附圖


牡丹江發源敦化縣牡丹嶺長白山北徑三百餘里之幹山東北匯為鏡泊湖者也自東南嶺流受四道荒溝大荒溝大黃泥河小牡丹江大石頭河諸水經敦化縣城南又北流二百五十里受風溪河又其北有蝦蟆塘河自西來入之珊延穆克河自東來入之又北入額穆縣北流受朱爾德河大沙河亦號大鱗流河與雷風溪隔一山折向東流則都林谷河自北合數水來入之郡林谷河今呼曰郡陵河源出塞齊窩集南又東流受當石河又東有塔拉河合阿拉河一曰阿爾自北來注之又東流托罕河大小空其木河自東南來注之又東北數十里受諸水匯為巨澤曰畢爾騰湖即所謂鏡泊湖也一作阿卜湖唐稱呼爾海金稱阿卜薩湖明志長七十里南北徑二十餘里牡丹江水入湖之處則在西南有一崖曰呼克圖作鏡泊湖

峯瀑布高懸水聲砰訇土人名曰發庫滿語即唐人所謂渤海王城臨忽汗海想即在此處也湖之南曰南湖頭有夾濱河注之湖之北曰北湖頭有海蘭河一曰駭諸水注之出湖口受阿布河沙蘭河楊木台諸水東南至京城受瑪展河經甯安縣城受哈瑪河河出城南


老松嶺兩源歧發曰二道河曰三道河合沿北流至拉古口迤東尼葉黑河諸水注之西北流折而北廟兒嶺水自西來注之又北過扁擔嶺逕三站受三道河入依蘭境東北逕城牆礮子東五個頂子西受烏斯渾卡倫烏斯渾河又西受尼什哈一河又東北逕松樹嶺東受伯勒河又東北過三姓城西

二里許北入混同江會流入俄屬案牡丹江唐曰忽汗河金稱瑚爾喀羅嚙胡里即呼里改路元曰忽爾喀路明一統志所謂胡里改江出建州東南山下東北入鏡泊者也滿語稱虎爾喀又作呼爾喀後人誤以興凱湖爲瑚爾喀非也興凱湖在混同江甯古塔東四百里明一統志云鏡泊之北有小湖曰達巴庫是也瑚爾哈出敦化縣由甯古塔西源流迥別又齊召南水道提綱以爲即按出虎水按出虎水今阿勒楚喀河爲完顏故部在金之上京會甯府道里懸絕又豈可執彼以混此哉

# 烏蘇里江



尺之一分万百二



## 烏蘇里江流域附圖

烏蘇里江一名烏子江又稱戊子江源出錫赫特山在甯古塔東瑋春南即渤海東京龍原府元合蘭路屬利羅噶里路地也錫赫特山爲吉林東南部一大分水嶺山東之水入海山西之水入烏蘇里江混同江烏蘇里江自錫赫特山發源逕能圖山東受能圖河水又西逕瑚葉昂阿昂阿滿語口也北瑚葉河東合小水一自南注焉又折而北逕富特勒庫山東瑚爾穆河自東注焉又北西受伊魯河又東北受噶爾瑪河入虎林境會松阿察河北流與俄國分界受大小穆稜河又東北受七虎林河阿布沁河大小木克河又東北受獨木河至外七里星河入饒河縣境與俄之東海濱省分界又東北大小別拉抗河自西來注之又西北受大帶河西北雞心水河匯之又西北受小安河外奇勒沁河至撓力口受撓力河又東受固米小河入綏遠境又東北迤折而西受畢拉音河又西南受畢爾賓河至窩集口受窩集小河水由窠集口西分一支流名通江入混同江東北正流入黑龍江與混同江交匯其中間之地作三角形混同江烏蘇里江通江環其三面中俄耶字界牌立於此對岸即爲俄之伯利伯利即唐之勃利也按照咸豐十年條約云東界定爲什勒額爾古訥兩河會處即順黑龍江下流至烏蘇里江會處其北邊地屬俄羅斯國其南邊地至烏蘇里江口所有地方屬中國往時耶字界牌在伯力對岸俄人迭次擅移侵佔內地

## 第三章 山川

六十

八九十里現在通江口以下無論南岸北岸漁獵樵採皆納俄稅均非我所有矣是烏蘇里江爲中俄天然界限不以正流爲界而以尾閭處通江之支流爲界國疆交錯視爲歐脫而任棄之良可慨也烏蘇里江自東南海岸錫赫特山源流經虎林饒河綏遠等處畢會混同江凡二千四百餘里由此而北卽爲俄之東海濱省矣

## 吉林彙徵卷下

合肥郭熙榜伽園甫著

## 第四章 政治

## 第一節 職官

## 行政

吉林爲滿洲祖居部落前此無官制可考清朝定鼎自順治十年設昂邦章京於甯古塔以鎮其地康熙元年改爲鎮守甯古塔等處將軍十五年移駐吉林乾隆二十二年改爲吉林將軍所轄有副都統參領總管協領防禦驍騎尉等官而於吉林伯都訥甯古塔阿勒楚喀三姓各設副都統一員至參領以下各官時移時裁不能細載將軍署則有戶兵工刑四司以及主事筆帖式等官雍正初年設滿漢御史不久裁去民官之設始於老三廳老三廳者吉林伯都訥設理事同知長春設理事通判專理旗民詞訟交涉事件然旗民亦有竟訴於協領防禦各旗署者光緒八年將軍銘安奏設吉林分巡道兼按察使八年奏請改吉林理

吉

林

彙

徵

事同知爲府改伯都訥爲撫民同知長春爲撫民通判兼管旗民凡舊有旗署不得與聞地方詞訟事舊制已稍有變更嗣後增設府廳州縣駸駸乎有行政規模矣光緒三十三年改東三省爲行省裁將軍都統設總督巡撫東三省設總督兼將軍吉林設巡撫兼都統事以治旂民總督駐奉天兼轄吉林兩省吉林巡撫奏事須由總督會銜方能上達四月奏請於三省各設行省公署做照京都辦法督撫與司道同署辦事公署分設二廳曰承宣廳掌一省機要總匯考核用人各事曰諮議廳掌議定法令章制各事設左右參贊各一員分設八司曰交涉曰旗務曰蒙務曰民政曰提法曰度支曰提學曰勸業各設司使一員承宣廳及各司均設分科每科設僉事及一二三等科員以佐之諮議廳不設官缺酌派議員副議員顧問官額外議員至陸軍關係重要另設督練處以擴充軍政司法分權專設提法司理刑法督撫各設秘書無定額此原奏吉省官制之情形也嗣將原有之吉林分巡道裁撤增設民政交涉提學度支提法五司勸業一道設民政使司民政使除掌警政自治等項外做各省布政司兼管府廳以下升調補署事件設首科僉事一員旋裁改總科長分設五科曰

民治曰警政以衛生科附焉曰疆理曰營繕曰庶務警察有城局鄉局城巡則設總局鄉巡則設分局而以地方官爲監督歸其節制省城設有高等警察學校各屬設有教練所以儲警務人材又有田野之警察以護民屯墾戶有國際之警察以保車站商埠有山林水道各警察以安林礦行旅並飭各村莊編練預備巡警俾其守望相助而衛生中之潔清驗疫等類亦時附見焉交涉則設交涉使司交涉使專辦交涉事件設首科僉事一員旋裁改總科長分設三科曰互市曰界約曰總務委用科長科員另設日俄英等語譯員度支則以所有財政各局所及從前之戶司併入設度支使司度支使管全省財政事務設首科僉事一員旋裁改總科長分設三科曰總務曰賦稅曰俸餉總務科設文牘稽核會計庶務四股賦稅科糧租稅釐兩股稅務科專理收入俸餉科則專筭支出而以總務集其成凡司署所設各科地方府廳州縣文件各以類附屬各科辦理改學務處設提學使司提學使筭全省學務設首科僉事一員旋裁改總科長分設四課曰總務曰普通曰會計曰圖書初吉林科舉時代生童歲科兩試赴奉天寄考同治九年經將軍奏請奉天學政按臨並准黑龍江生童附

吉

林

業

徵

試光緒三十年省城設全省學務處先後設師範學堂並小學堂僅六處近年學務冊表計全省中小學蒙養男女師範女子兩等小學農工商礦等實業學校已有一百餘處至全省民刑設提法使司提法使掌全省民刑總匯監督各級審判檢審廳及辦理司法上行政事務設首科僉事一員旋裁改總科長分設四科曰總務曰民事曰刑事曰典獄至勸業一道則以農工商礦林業各局併入管全省農工商務及各項交通事務設首科僉事一員旋裁改總科長分設五科曰總匯科曰農科曰工科曰商科曰郵傳科總匯掌擬訂各項章程掌筭文件及辦理會計庶務各事宜農科掌屯墾農田水利蠶桑水產森林畜牧狩獵各事工科掌工藝機械製造檢定度量及礦務事宜商科掌商會商標保險及公司注冊各事郵傳科掌鐵路航路郵政電報文報各事凡道屬各局及地方府廳州縣文件均以類附屬各科辦理旗務暫不設司以舊有兵司與調查旗務併改爲旗務處設總理協理幫辦各一員仿照奉天旗務處各設分科畫爲四股曰儀制掌筭朝賀典禮陳設祭品常年例貢例請旌表各事曰軍衡掌管旗員升調補署軍政京察挑補兵缺驛站馬政各事曰稽賦掌管旗屬官

兵俸餉紅白郵賞隨缺地畝徵收旗地各項租賦添置牛具並田房稅契旗丁戶口三代冊籍等事曰庶務掌堯調查旗丁職業貧富籌畫歸農勸學宜講籌辦實業逐日收發文件監用關防出納欸項及各項雜務等事設正管股五員幫管股十一員額外幫管股一員由部發給木質關防文曰吉林全省旗務處之關防以舊有烏槍營署爲吉林全省旗務處改股爲科蒙務處以奉天已有東三省蒙務總局則吉林蒙務處即以旗務總理兼辦並派協理一員餘酌設文牘繙譯等員參贊所領之承宣諮議兩廳暫不設缺由秘書文案處辦理以從前之印務併入暫就撫署改設行省公署辦事處另立印信並訂規則三十四年三月起每日午後兩時各司道齊集公署遇有應行酌議事件即時面請督撫示遵辦理每件應歸某司道承辦即由本員交各科員擬稿呈判各府廳州縣除刑名案件由提法司勸轉外餘皆逕達公署毋須分詳分稟一洗從前散漫牽制積習宣統元年復定省外官制舊有吉林琿春三姓伯都訥甯古塔阿勒楚喀各副都統先後裁撤長春於三十三年已設長春分巡兵備道是年增設濱江琿春依蘭分巡兵備道兼辦交涉邊務及有關者監督關稅二年改

吉

林

蒙

徵

爲西南西北東南東北四路分巡兵備道分轄新添及原有府廳州縣各府亦不設首縣自理地方事以祛層累積壓之弊計府十一曰吉林長春雙城新城五常賓州延吉甯安依蘭密山臨江直隸州一曰伊通直隸廳一曰榆樹撫民同知一曰琿春分防同知二曰濱江虎林撫民通判一曰東甯州二曰濛江綏遠綏設州一曰寶清縣十八曰磐石樺甸舒蘭雙陽農安德惠長嶺長壽阿城和龍汪清敦化額穆方正穆稜樺川富錦饒河綏設縣二曰勃利臨湖分防州同一赫爾蘇州同府經歷六吉林長春新城五常依蘭寶清巡檢九農安磐石雙城賓州五常榆樹濱江敦化方正分防巡檢三拉林分防藍彩橋分防一面坡分防典史一長壽主簿一長嶺縣新安吏目一伊通此前清吉省職官之大概也民國肇建政治改革吉林巡撫改稱都督畫分省治不受轄於奉天二年軍民分治都督專治軍事設民政長爲行政長官吉林則以民政長兼都督事畫一行政官廳制公署設總務處秘書科長科員技正改民政司爲內務司度支司爲財政司提學司爲教育司勸業道爲寔業司各司仍分司任事均爲佐治官與各縣無直接公牘亦無印信提法司一缺司法獨立不屬行政範圍由

吉

林

彙

徵

司法部改稱司法籌備處旋裁交涉司由外交部改爲特派吉林交涉員專辦交涉財政部復添設國稅廳籌備處專司征收國稅四路道改稱觀察使府廳州統改稱縣以昭畫一所有府廳州縣所屬之州同經歷巡檢吏目典史主簿一律裁撤僅留赫爾蘇州同新安主簿寶清分防經歷均改爲分治員以資佐治三年改民政長爲巡按使管轄全省民政各官及巡防警備等隊受政府特別委任監督財政及司法行政暨其他特別官署之行政事務裁內務教育財政實業四司公署設政務廳置廳長一員掌政務廳事務內設總務內務教育實業各科改科長爲主任科員爲主稿由巡按使自委掾屬佐理各項文牘事務四路觀察使改爲道尹受巡按使委任監督財政及司法行政事務西南路爲吉長道道尹西北路爲濱江道道尹東南路爲延吉道道尹東北路爲依蘭道道尹分轄各縣一如舊制焉

### 司法

吉林刑名詞訟向由將軍署之刑司核轉光緒八年設吉林分巡道將吉林伊通敦化長春農安伯都訥五常賓州雙城等處民刑案件改歸該道核轉而各城所屬旗人案件仍由副

都統逕達將軍署刑司核辦二十二年將行營發審局所設之裁判所改爲高級審判廳三十三年設吉林提法使掌全省民刑總匯監督各級審判檢察廳及辦理司法行政事務設總務民事刑事典獄各科次年復將刑司裁撤歸併按照新章將行政司法畫分原有高級審判廳改爲吉林地方審判廳另設高等審判廳辦理全省上控案件設地方審判廳第一第二初級審判廳辦理地方訴訟案件各廳附設各級檢察廳以維持監督之設高等審判廳丞高等檢察廳長推事等官地方審判檢察等官由吉林推廣長春賓州延吉農安新城依蘭各屬並設模範監獄罪犯習藝所審判講習所檢驗學習所旋改司法養成所又設司法會議廳宣統三年賓州農安新城依蘭各審判廳先後停辦改設幫審員民國元年改高等審判廳丞爲審判廳長改提法司爲司法籌備處二年裁司法籌備處

## 財政

吉林財政向隸將軍署戶司而局所紛岐雜出事權不一有山海土稅局菸酒木稅局餉捐局糧餉處木植公司官帖局官棧局棧藥稅局寶吉銀元局自光緒三十三年設度支司使

吉

林

榮

徽

度支使設總務賦稅稅務俸餉四科將從前軍署戶司裁撤所有租賦倉糧銀庫旂營官兵俸餉及各項財政出納事均歸統一各局有已歸併未歸併者局雖仍舊均隸司屬民國二一年改財政司是年財政部並設國稅廳籌備處專司徵收國稅財政司僅筭句稽簿冊而已三年裁國稅廳籌備處裁財政司另設財政廳設廳長一員隸財政部受巡按使監督全省財政事務仍掌堯焉

#### 軍政

吉林自光緒三十二年將軍達桂創設常備軍按照新軍軍制應於省會地方設立督練公所並參仿北洋章程以本省將軍爲督辦以下設參議一員兵備參謀教練三處總辦各一員並於三處分設幫辦提調各一員文案各二員兵備處分設考功執法籌備軍需醫務五股參謀處分設謀畧調查運輸測繪四股教練處分設教育校兵二股每股股員二員各分職掌三十三年准陸軍咨以吉林創練常備軍僅止步隊一協遽援照陸軍一鎮以上章制設立督練公所未免稍涉鋪張應改爲兵備處就近練督於是三處有歸併兵備處之議是


吉 林 彙 徵

年改建行省以東二省陸軍應歸統一奉天創設督練處以吉林原設之督練公所併入改爲吉林兵備處兼理參謀教練事宜以總督爲總辦吉林巡撫爲會辦設兵備參謀教練總辦一員幫辦一員三十四年改三處總辦爲幫辦改各股爲科宣統元年裁參謀教練兩處幫辦歸兵備處兼理改爲督練分所二年十月改編成陸軍一鎮參謀教練兩處復先後分委幫辦三年改兵備參謀爲參議官參謀官由軍諮府奏派吉林設參議官兼參謀官改編爲三局曰糧餉局曰籌備局曰軍械局各設局長一員一二三等科員書記等官民國元年改巡撫爲都督畫分省治吉林督練公所治軍事歸吉林都督不受轄於奉天二年軍民分治都督專理軍事吉林則以民政長兼都督事督練公所改稱都督府八月裁吉林都督歸奉天都督兼任三年改奉天都督爲鎮安上將軍督理軍務吉林設鎮安左將軍督理軍務改都督府爲將軍署仍隸奉天

外交

吉林自光緒二十二年將軍延茂以吉省邊界與日韓俄接壤時有交涉奏設吉林交涉總

局於省城凡邊務礦稅森林之事路電租借等類皆隸焉二十五年以哈爾濱爲吉江兩省緊要門戶又爲東清鐵路總支線集合適中之地俄總監工擬設鐵路公司乃奏設鐵路交涉總局於哈爾濱並設分局於沿綫各處派員分理地方稅務鐵路警局亦附屬焉遇有華俄訟事由公司派員會審三十一年吉江兩省將軍會奏請於哈爾濱添設道員專辦交涉並徵關稅故濱江道兼交涉局會辦三十三年督撫會奏吉林省城長春哈爾濱開關商埠長春設交涉局以長春府爲總理三月建行省改省城交涉總局爲交涉司署而哈爾濱交涉局附之長春交涉局歸併西南路道兼辦吉林設交涉使司交涉使設互市界約總務各科另設日俄英等語譯員民國二年各省交涉歸外交部專辦改爲外交部特派吉林交涉員長春哈爾濱添設交涉員本年十月裁長哈爾濱交涉員三年以四路道道尹仍兼交涉員辦理交涉事宜



第二節 兵制

吉林東西四千餘里南北二千餘里東北與韓俄水陸毗連邊防要地須駐重兵戍守南綽長白山外直達朝鮮袤延奧衍林密山深盜賊充斥素爲逋逃淵藪兵至則藏兵退則出此擊彼竄豕突狼奔窮追則路僻未諸分防亦力難兼顧內虞伏莽外迫強鄰此地勢之難以控制而兵事不可不講也吉省兵制除八旂駐防外有練軍有吉字營練軍有靖邊軍捕盜軍等名目練兵之創始於同治六年爲專辦馬賊而設將軍富明阿奏准就通省內外各城額兵西丹選練至光緒三年規制始備計馬隊二千分爲七起每起名爲四紮蘭步隊七百有奇以紮蘭分者四爲數四百六十有九皆以全營翼長統之其下有總理會辦統領各級其兵分駐各城鎮自一二十數十百人零星散布虛聲鎮懾而已光緒十一年以籌備東三省邊防於本省練軍外招練新軍名吉字營練軍持簡練兵大臣會同各將軍分別辦理時福州將軍穆圖善實始其事初年挑選兵丹五千人成軍次年撤半歸旗續調二千五百人補之又次年再撤半歸旗續調二千五百人補之期以三年成練軍一萬人吏番加練周而復始其兵制分左右兩翼練軍營除練兵大臣以下有總統幫統營務總辦左右翼兩軍各設統領一員左右馬隊各一營步隊四營每營二百五十名隸海軍衙門管理餉械亦由海軍衙門關領並由京帥神機營王大臣奏請仿照從前伊犁養兵之費半資屯田之法以旗

漢兵每年分撥四成屯田六成差操更番爲之庶可持久吉林荒地極多借使於經制兵內仿伊犁成法抽調若干成授地墾荒鑿渠灌溉以資生計等語是猶古者寓兵於農之意法至善也乃卒未能行原定換班之期大臣按臨會將軍選調兵丹以合於營制總統幫統躬親其役季課月校稽其勤惰乃換班之始大臣穆善圖遽以疾卒以黑龍江將軍代之後數年來大臣並不親行每歲冬操遣總統一人來吉閱視一年之事數日而畢草草從事賞罰視爲具文有名無實而已先是光緒六年將軍銘安與三品卿吳大徵先後奏請添練防軍名曰靖邊軍專爲邊防而設原練步馬隊五千人嗣庫倫辦事大臣喜昌奏請續練五千人喜昌旋以一千人帶赴庫倫吉林實有防軍九千人七年銘安奏裁二千實以七千人分防寧古塔三姓瑯春要隘以吳大徵爲督辦立鞏衛綏安及靖邊各軍之名十年吳大徵調往北洋選帶馬步三千人前赴天津其督辦邊防事宜以吉林將軍兼之初時練隊皆湘淮勁勇將軍希元兼督辦招募本處西丹以足吳大徵帶往天津之數並撤去鞏衛綏安名目專以靖邊爲名分爲五路嗣後有缺即以旗丁補之於是防營無不西丹其營制初定仿湘淮軍步隊五百人馬隊二百五十人爲一營十一年裁減勇數中前左右四路並親軍步隊以四百五十人馬隊以二百五十人爲一營惟後路三營以地要兵單仍如原定之數此外將軍長順達桂先後募捕盜軍吉勝吉南吉強等軍三十營捕盜軍專辦勦匪吉強軍專駐延

吉圖們江北岸前此撥分靖邊軍九營駐紮琿春蓋注重防俄吉強軍則專防韓民之不靖也三十三年徵有陸軍步隊一協三十四年改捕盜吉勝等軍爲巡防馬步三十三營分中左右前後五路分駐各處其營制仿各省巡防宣統二年改編軍制經督撫會奏以延吉關繫防緊要前路一軍巡防駐防延吉暫緩改編外其餘中左右後四路連同原有步隊一協一並改編成鎮以記名提督孟恩遠暫充統制當經陸軍部核定爲第二十三鎮後改稱師三年武昌起義人心惶惑因防範盜匪招募六營名曰新練巡防營駐紮長春民國二年尋將新練巡防改編混成一協此前後三十餘年吉省兵制之大略情形也案吉省幅員遼廣又係邊塞要衝時有鞭長莫及之慮當官統二年督撫會奏時內稱吉省至少非練陸軍三鎮不敷分布以一鎮駐紮三姓臨江東北一帶一鎮駐紮延吉琿春東南一帶更以其餘一鎮分紮內地爲防勦鬪匪之用庶幾邊腹相聯緩急可恃等語查吉省東北與俄之東海濱省毗連俄駐重兵於海參威雙城子又別屯師於嚴杵河摩爾威諸處而以駐紮伯力總督聯絡其間簡練軍實建造營房不遺餘力近且逼琿春爲壘開通圖們江北岸以窺朝鮮北境行船松花江以窺三姓上游至延吉琿春其西南接朝鮮之慶源慶興兩府一葦可杭毫無障礙三姓水路上距伯都訥之三岔口一千餘里自三岔口西南陸路由蒙古郭爾羅斯界經蒙古草地直抵奉天之法庫邊門更爲便利是駐重兵於三姓延吉等處一以保

護朝鮮北境一以屏蔽我松花江上游腹地非有兩鎮之師不足以資控扼惟現在餉項支絀業已竭澤而漁引惟有實行徵兵政策編伍成軍授地墾荒仿屯田之法將來日漸推廣作爲常備之軍有事則用以征調平時則資以捍衛於籌防節餉之中寓移民實邊之意亦可潛消內患外禦強鄰一舉而三善備焉是所望於當軸者

第三節 交涉

中韓圖們江勘界始末

圖們江為中韓兩國天然界水前清之世屢生界務交涉自康熙五十一年遣烏拉總管穆克登查邊卒長白山嶺審視鴨綠圖們兩江之源俱發軔於分水嶺嶺之西為鴨綠江源嶺之東為圖們江源故於分水嶺上立碑曰審視碑後為韓民移至長白山東南麓穆既尋得圖們江源遂與朝鮮接伴使樸權等自江源至近茂山處設界柵以杜侵越以土門江西南屬朝 東 屬中國即以此為吉韓界水在茂山惠山相近無水之地勘定界址誌標兵守帥衆人知有邊界案朝鮮之惠山鎮治在小白山東南茂山府治居三江口東南既曰與茂山相近則此間之界自當順小白山南以東至三江口其上有紅丹水發源於分水嶺之三汲泡於此立碑與東為土門西為鴨綠江之語適相符合是由三汲泡順紅丹水以至三江口確為吉韓分界之綫乃韓民預為侵界地步移至長白山東南麓與紅土山水源相對故後執紅土山水為圖們江源即據於此並謂土門豆滿兩江之間作為荒地海蘭河布爾哈通河即上門河亦即交界江又於長白山北之東麓有石堆數十皆順黃松溝子兩岸黃松溝子朝鮮名伊嘎力為松花江上游遂指為吉韓分界之據光緒初年圖們江一帶韓民越墾日益繁多七年吉林將軍銘安督辦邊務吳大澂奏准將韓民分歸琿春敦化管轄入我版籍八年韓王奏墾

吉 村 彙 敬

願將流民刷還九年韓遣經略魚允中招徠吉林瑋春等處流民彼流民戀茲樂土乃欲利其混界之辭以緩其刷民之令飾詞強辯冀免驅逐我邊臣再三爭辯十一年韓王以勘界請清廷允之於是派瑋春協領德玉督理吉林朝鮮商務委員秦煥招墾局委員賈元桂會同朝鮮安邊府李重夏履勘江源查明圖們江源有三南源爲西豆水正源爲紅丹水北源爲紅土山水惟紅丹水在白山東正對鴨綠江源與碑文東鴨綠西土門之意相合且勘明原碑應在三汲泡之分水嶺上今碑實爲後人所移因定以紅丹水爲界韓人知江已勘明乃改而專執長白山北之碑堆爲據舍江流而求土門舍圖們江源而求松花江源我員知終難語屈遂各繪圖而罷十二年更派德玉秦煥方朗會同韓使李重夏履勘韓使自知理屈多方推延至十三年始同再勘茂山以西之江界是時茂山東業已勘定無異議適又查出石乙一水爲圖們江北源雖非江源之正略與原界不合而發源處尙在白山東麓我員見圖們江界既已勘明所未決者不過源頭數水意在從速了事遂欲姑讓數十里循石乙水爲界乃韓使已知前此所指海蘭河布爾哈通河即土門河亦即交界江之說與圖們豆滿爲二江之誤不能強執遂又改而爭紅土山之一小水以爲圖們之源是其無據之說至此已三變矣是時韓官金允楨筆述土門江事曰土門圖們不須論如不獲已從賈元桂之論賈論未詳又曰中朝不欲以碑爲證只從江源定界土門圖們豆滿果係一江變音則只當以

豆滿一帶限南北而為江源有數處其一西豆水若以此水源流為定則茂山一境半屬中國其一紅丹水若以此為定則茂山之長坡草村屬於中國均無此理其一紅土山水此水距碑下土堆盡屬杉浦約四十里白山水伏流至此出現流入豆滿江此水即茂山邊界紅丹水以南依舊屬之茂山以北屬之中國兩無相失各得其平夫紅土山水即為石乙水北之小水彼既知須勘江源不指石乙水為界而乃專欲以最北之小水為界是仍假持平之論以隱寓侵界之謀然自此但爭水源不及其他矣是年勘界員德王秦煥方朗稟覆勘吉韓界務情形於吉林將軍云原勘祇有西豆紅丹紅土三水合此次尋出之石乙水共有四流又云此次該府使目見紅土山水不接與碑堆又兩不相貫即董棚南面向東北流之水亦與碑堆不相關涉知非當年舊界祇因政府授意未能作主可否仰懇憲台詳加察核轉咨總署奏明請旨定界再界址定後遵當另立界碑申明舊界所有穆克登所立之碑既與界址不相關涉而土堆石堆又相引至松花江岸上此時若不將此碑毀去仍恐將來別生枝節且於松花江有礙如以石乙水源定界則自小白山北東麓起至茂山城止自應摘要立碑庶幾界劃分明等語並擬華夏金湯固河山帶礪長十界碑處

華字碑立於小白山東麓溝口距碑五里固字碑立於石乙水出處距湯字碑十二里河字碑立於石乙紅土兩水匯流處距山字碑二十三里礪字碑立於長坡浮橋南岸距河字碑八十八里帶字碑立於石乙紅丹兩水匯流處距山字碑二十三里礪字碑立於三江口之鬪們江西豆水匯流處距帶字碑三十六里長字碑立於陶們江樓河匯流處距礪字碑三十一里

年總署即奏請覆勘奉旨依議而該國則故意延宕再三催促韓使李重夏始會同往勘及再勘時我員秦煥以石乙水爲定界彼仍執紅土山水爲言往來談判照會閱月細商兩相爭執以致所擬界碑迄未能立甲午以日人因韓與我構釁後強使韓之自立己伏併吞之意此後韓國對外關係主權已屬於日三十年中韓兩國俱欲派員會勘界務永息爭端而日本以日俄戰役爲詞百端阻遏勘界之議因之中止乃戰役既終日人所繪地圖如阪本嘉馬紀念大地圖龜井忠一最新滿韓地圖皆將朝鮮國界拓入我國領土之內三十三年日人遂有派員越境之舉藉口馬賊及無賴之凌虐遺齋藤入我領土保護韓民並不俟我國之允許先行派員後始照會我國飭其撤回堅執不允與之交涉至宣統元年七月日本使伊吉院彥吉與我外部尙書梁敦彥在京定約七條大旨以圖們江爲兩國之界其江源地地方自訂界碑至石乙水爲界開放龍井村四處爲商埠日本設領事館住之所有江北越墾韓民裁判法權仍歸中國日本可派員聽審應納稅項與一切行政皆與中國民同日本統監府派出文武各員限兩月撤退彼此簽約蓋印而數百年未清之界務至此遷就始定綜觀以上所列案據其因循輾轉貽誤事機約有三期自光緒九年以豆滿土門圖們土門爲二之說互相爭執往復辯論迄無歸宿至十一年十三年一再覆勘源委旣明即當審定界址豎立碑據以杜糾葛乃於紅土石乙兩小水相持不決轉成疑案種種狡賴緣此而生

其誤一也圖們江以北爲控制朝鮮要害前清視爲發祥重地悉爲封禁致使神皋隴區夷爲榛莽平原沃野未能繁殖地有餘利鄰人生心而韓民以國土逼狹無地可容是以越墾衆多遂百方狡展希圖混界但知目前之私利而不顧他人之伺其後者日人利用其說遂妄指爲未經確定之領土而我於沿江數百里聽其自由移住毫無限制喧客奪主幾有尾大不掉之勢其誤二也法律行政國有主權我國往時對於韓民毫無法律之裁判韓民之移入我國者亦無國籍之區別儼成一化外之民族民事刑事無裁判權間有犯法韓民仍是送韓官辦理是自棄其法權何怪日人之藉口保護以侵我領土主權其誤三也今者韓社已墮壞地猶錯昔爲藩服今則強鄰况日人恒有言曰開發東三省富源者日本國民之天職也南滿經營勢力澎漲主客之勢已成倒置日人之私計將欲劃吉林東清鐵路幹綫以南縱橫數千里之地悉入範圍而以圖們江一帶爲著手之起點蓋既羨其土地之沃饒礦產之美富森林之茂殖漁獵之利藪其地勢形便若據有圖們江北則江以南可水固無患且以附海參威之背而斷俄人之右臂以佔進攻退守之優勝地步將來得隴望蜀勢所必有此固有識者所共見也我惟先事豫防以鞏固東亞大陸現有之實權無使日人先我著鞭也



## 中俄界始末

吉林地處邊陲東南界朝鮮東北毗連俄境界居兩國之間華離交錯被山帶河爲東北屏蔽自日俄戰後俄人經營旅順者一蹙而落入日人之手南滿政策又爲日人佔據幾有不能南下牧馬之勢於是高掌遠撫注重北滿冀以收亡羊補牢之助此俄人所以處心積慮思以侵略我東北利權者也我國與俄壤地相接門戶洞開藩籬盡撤俄人之入我堂與駭駭乎有反客爲主之勢追原禍始邊疆債事不自今日始也自清廷康熙二十八年俄羅剎侵擾我黑龍江松花江一帶出師討之底平與俄媾和收回克薩微地立碑額爾古納河畔遣內大臣索額圖與俄費岳多議劃興安嶺至海爲界以烏底河以南至索倫河爲甌脫地是爲尼布楚之約互相遵守二百餘年未有侵暴之患是即清廷與俄定界之始亦吉林與俄分界之始也咸豐初年值洪楊之變俄人乘我多事發生邊界問題咸豐四年俄人托詞防英吉利帶兵乘船駛入關吞博勒奇吉各屯及費雅喀人等所居伐木通道建築砲台將廟兒地舊有分界石牌鑿毀五月吉林黑龍江庫倫三省委員在關吞屯地方與俄使木里斐岳幅會勘俄人指出格爾畢齊河長起至興安嶺陽面各河長止俱俄羅斯界欲將黑龍江松花江左岸以及海口分給該國保護七年俄使普提雅廷赴黑龍江與黑龍江將軍奕山會同查勘奉諭所有海蘭泡關吞屯精奇哩等處俄人蓋房佔住飭其先行撤回是年冬

吉 林 彙 徵

間英佛稱兵佔倨廣東省城俄使普題雅達忽於米夷照會內附呈咨照軍機處中稱分界地址與安嶺並非直達東海不能分作兩國邊界應以黑龍江左岸爲俄邊界中國滿漢人等悉移右岸又欲將烏蘇哩河下游右岸入海河汊分作海岸即以海岸爲斷等語不知中國與該國以格爾畢齊河與安嶺分界百餘年並無更改忽稱與安嶺不通東海欲另闢一直達東海之路以便人船來往八年奕山與俄使木哩斐岳幅至黑龍江會議俄使以黑龍江一帶均係俄國地方現在江左滿洲屯戶均應遷至江右又云兩國界址自河比奈嶺迤東至額爾古訥河入黑龍江烏蘇哩江松花江至海凡沿河各岸一半可屬中國一半可屬俄國江內只准我兩國人行船他國船不能往來奕山與之爭執次日俄使復遞文云今將黑龍江左岸北自精奇黑河南至霍勒莫爾津屯其中原居滿洲屯戶仍令照舊永遠安居其餘空曠地方均與俄國爲界以便屯兵防範英人爲請奕山當以所議各節與我屯丁耕作生計無妨惟文內以河爲界字樣應宜刪改該使大怒是夜左岸砲聲不絕陸屯水船號火極明奕山懾於兵威其餘松花江烏蘇哩江綏芬河距與安嶺之遠近亦尙未能悉概行允許約內並云由烏蘇哩江往彼至海所有之地如同接連兩國交界明定之間地方作爲兩管之地當時冒昧畫押是爲愛璉條約於是開門揖盜自此沿江無要害矣七月俄人闖越黑河口欲由松花江西上又欲將烏蘇里河至海爲中國與該國同管之地並在烏蘇里

右岸圖勒密山向西安設砲台並欲在河內上下左右岸至牝牛河一帶蓋房修道奕山遂派副都統富隆額圖帶同佐領三隆親赴綏芬烏蘇里等處履勘適景淳亦奉命查勘松花江烏蘇里江綏芬河一帶是否空曠地方能照黑龍江辦理而副都統吉拉明阿遂許俄使木哩斐岳幅於冰泮時馳往綏芬烏蘇里查勘再立界碑而原立字約十四條有二年後差學生到俄國學藝等語當將吉拉明阿撤任九年俄使石沙木勒幅等聲稱係木哩斐岳幅遣赴興開湖勘辦烏蘇里綏芬等處地界命署吉林將軍特普欽督同署三姓副都統富尼揚阿曉諭俄使興凱湖等處本不與俄連界無可會勘俄使以前約內有烏蘇里江至海爲中俄同管之地再三辯駁俄終不允三月特普欽奏俄國人船欲赴三姓貿易又在烏蘇里江建房墾地俄使木里斐岳幅遣員隨帶兵船由水陸分赴琿春並強赴興凱湖勘烏蘇里綏芬河地清廷震怒奕山革職吉拉明阿以擅許勘界拏赴烏蘇里地方枷號示衆十月俄使復往黑龍江城遣副都統愛仲泰至海蘭泡與之會晤富尼揚阿亦隨至愛輝曾晤詳爲開導以示綏芬烏蘇里等處不肯輕讓之意十年九月奕山奏俄使照會請派大員商酌嗣奉命云該國要求本在意中所稱未了之事即令瑞常等告以綏芬烏蘇里等處均照奇吉關屯之例借與居住十月奕訴奏俄約已換惟地圖一分係綏芬烏蘇里河分界之據前定條約曾添入空曠之地遇有中國人住漁獵之處俄人均不得佔之語一經畫押漫無限制

吉

林

彙

徵

明春須派員互勘未即畫押旋派倉場侍郎成琦馳往吉林會同景淳辦理在烏蘇里河口會齊遂議自烏蘇里江口而南上至興凱湖以烏蘇里江及松阿察河作爲中俄交界其二河迤東之地屬俄羅斯迤西之地屬中國自松阿察河之源踰興凱湖直至白稜河口順山嶺至瑚布圖河再由瑚布圖河口順琿春河及海中間之嶺至圖們江口其東屬俄其西皆屬中國蓋實讓地二千七百里而俄界已漸逼吉林矣是爲天津之約約文與下牌文略同十一年成琦景淳與俄使阿迪米拉勒喀咱切斐齊會勘由烏蘇里江至圖們江口界址共立界牌八處曰耶字亦字喀字拉字那字倭字帕字土字作記繪圖畫押鈐印彼此互換俾永遵守並勒牌文云此次會同查勘分界原爲兩國和好今地界既經議定自應按照上年續定條約設立界牌以清界綫東界定爲由什勒額爾古訥兩河會處即順黑龍江下流至烏蘇里河會處其北邊地屬俄羅斯國其南邊地至烏蘇里河口所有地方屬中國自烏蘇里江口南至圖們江口其東皆屬俄羅斯國其西皆屬中國上所言乃空曠之地遇有國人住之處及中國人所占漁獵之地俄國均不得占仍准中國人照常漁獵從立界牌之後永無更改並無侵占附近及他處之地所有東邊界內原住之中國人民其向來謀生出入行走之路應聽其便俄國人不得攔阻爲此特立界牌永遠遵守兩國人民咸各知之勿違自立界牌後至光緒十三年命太僕寺卿吳大澂會同副都統依克唐阿赴俄境嚴杵河俄使

館會同俄使巴拉諾伏舒利經克拉多馬秋甯勘界旋奏云查土字界牌不知何年毀失無從查究自璋春河至圖們江口五百餘里竟無界牌一個黑頂子瀕江一帶久被俄人侵佔議定展界在沙草峰南越嶺而下至平岡盡處豎立土字牌再舊圖八處內拉字那字兩牌之間有瑪字界牌記文則缺而未立條約內帕字土字兩牌之間有拉薩二字界牌地圖記文略而不詳現應補立舊立木牌年久易於朽壞鄉民有燒荒之例野火所焚延及牌木難免燬損改用石牌較爲堅固至兩國交界地段太長牌博中間相去甚遠路徑紛歧山林叢雜本未立牌之地難免越界之人自宜酌擇要地多立封堆挖溝爲記奏入允准後遂與兩使勘界前後共立界牌十一個計立封堆記號二十六處繪圖畫押鈐印互換此屢次中俄分界之大要也綜觀以上各節知俄之思欲侵削滿洲得寸進尺已非一日而我之割盟縮地敗壞邊事皆由於一二齟齬之庸員約而言之可分三期一在康熙年索額圖與俄所訂尼布楚之約輕棄興安嶺北麓東注海之地與俄並以烏底河至索倫爲甌脫地而黑龍江上游之形勢已失俄人居高馭下遂開鐵騎南下之漸是爲第一期失敗之地咸豐八年奕山愛琿之約又割黑龍江東北數千里興安嶺南盡入俄國烏蘇里江沿江各河復爲兩國共管並許以烏蘇里松花兩江航路權於是吉江之屏蔽盡失而俄人遠東政策遂侵入吉省自此東陲無安寧之日是爲第二期失敗之地咸豐十年奕詝天津之約以綏芬烏蘇里

河爲界自圖們江以東沿海二千七百餘里盡失尤可惜者海參崴一港不獨爲吉林東南部之關係我國欲振興東亞之海權必憑藉此港爲海軍座地且足以制俄東海之勢力自此港落於俄人之手而東方水陸兩路之根據盡失是爲第三期失敗之地嗟呼烏蘇里江沿岸俄之阿穆爾省東海濱省執非吾向者之故土耶赫赫版圖今竟爲俄人經營重鎮之區而一入我境則榛蕪如故也墟落如故也破國人民並時有越境而取我物產之菁華盜憎主人可爲浩歎雖然前車已覆來軫方道一着之輸全碁皆負毋使神州膏腴之產唾手而委棄於虎狼之族籌國防者其加意焉

土字界牌

瑋春屬界距圖們江三十里案此界牌早經毀失吳大澂與俄使勘界時俄使僅就咸豐十一年成琦所換地圖上界綫盡處爲原立土字界牌之所惟是年所換地圖內英尺一寸係俄國二十五里合中國五十里俄一里即中國二里圖上界綫末處與海口相距幾及一寸係俄里二十餘里以中國里數計之實係四十五里惟條約內云兩國交界與圖們江之會處及該江口相距不過二十里而兩國交界道路記內亦云圖們江左邊距海不過三十里立界牌一個上寫俄國土字頭查十一年所立土字界牌之地並未照准條約記文二十里之說說使遂指海灘二十里俄人謂之海河除去海河二十里方是江口吳大澂以爲

薩字界牌

在俄鎮阿濟密與琿春交界之路

啦字界牌

在蒙古街

帕字界牌

在瑚布圖河源分水嶺上

倭字界牌

在甯古塔屬界瑚布圖河口案咸豐十一年成琦會同俄使原議在瑚布圖河口西邊因當時河口水漲木牌易於衝失權設小孤山頂距河二里吳大澂恐以立牌之處即爲國界定址則小孤山以東至瑚布圖河口一段又將割爲俄地與俄使巴啦諾伏議將此牌改立瑚布圖河口山坡高處正在兩國交界之地又據近人閻啟瑞調查云此牌應在五站左右訪該處交涉局鄭委員稱伊到此時並未聞有何界牌惟鐵軌旁有俄官私立三角鐵牌文西面爲東清鐵路東界東面爲東海濱西界前哈爾濱關道杜與東清鐵路公

司定購地條約自此以東十五里尙有小站准彼買地五百畝足證也東十數里尙爲我界但此五站勢亦岌岌矣有誰能過問其小站也並何得覓其爲倭字牌也

### 那字界牌

在橫山會處案此牌本在荒山榛莽中人跡不到中俄均以此牌失毀漫無稽考光緒三年甯古塔副都統雙福與俄官廓米薩爾秋甯補立那字界牌在瑚布圖河口正北山距綏芬河與瑚布圖河交會之處不及二里倭那二牌相去太近又非橫山會處吳大澂派佐領托倫托塔同俄人入山訪得木牌一座上多朽爛僅存二尺餘字蹟剝落無存按其地勢正在橫山會處始立石牌將原木牌毀去

### 瑪字界牌

在塔俄交界大樹岡子

### 拉字界牌

在白稜河小漫岡上據土著人云此牌與喀字牌相隔僅二十餘里立於平地砌以亂石聞前無此牌光緒二十一年有人採菌玉至此忽見斷碑不知何日豎立因查瑪字界牌西行四十餘里至老黑山背有石匠汪姓詢稱此山頂曾有界牌以分水嶺爲天然界自二十一年此牌忽然不見於西岡上突出一小石牌高不過二尺兩面皆無字俄人即指

此爲界遂焚中國人已有房屋並不准中國人在此伐木彼此相懸恐拉字界牌自他移來也案白稜河本無其名由俄人混指一處欲由松阿察河掘通墨稜河以行舟楫而窺甯古塔琿春三姓等處遂稱九年立約時寫在約中有云土爾必拉亦須割與後經勘出所稱土爾必拉係在興凱湖東北岸奎屯必拉之右距墨稜河尙有四百餘里蓋經成琦等據此力辨俄始強必拉之分支小河水即爲白稜河之訛蓋欲藉白稜河爲日後佔據墨稜河地位也又光緒十三年吳大澂查勘兩國交界道路記內云計自拉字界牌至喀字界牌十六里四百五十一薩仁我國一薩二約中國七尺有奇再自拉字界牌至白稜河口十七里七十五薩仁是拉字界牌至喀字俄十六里即中國三十二里至白稜河口十七里即中國三十四里其非在原立之處爲俄人所私移確無疑矣

### 喀字界牌

在白稜河口興凱湖西北快當別地方畢姓門前據閩啟瑞訪畢姓云先年分界在此西南約五十里有西來入湖之長流名勿邑七河爲共有水經甯古塔副都統設有卞倫被俄人將駐防者拘留於紅土岩備文索回後遂無人問津矣光緒十三年吳大澂勘界監此碑於現在處與俄人遂有以白稜河爲界之說查此水無非一溝僅十餘里由西北來入湖迤西無水處俄人任意侵越二十二年此處尙無快當別屯有民人楊永芳網魚於

此界牌下被俄人奪魚驅逐經畢姓代訴俄雙城子審判得直今楊永芳仍得網魚於此界牌下故此牌亦得存於今日矣

亦字界牌

在松阿察河口

耶字界牌

在綏遠屬烏蘇里河口據土著老黑津人稱咸豐十年曾立有木牌伯力銅人下自吳大澂勘界又暨耶字牌於伯力對岸約失二十餘華里後歷經俄人擅移光緒二十一年又移至通江子東岸此時烏松兩江間周圍二百餘里之土地已非我主權所有如漁獵樵採等事皆爲俄人納稅矣三十三年又移至通江子一小流名倭七河者爲共有界使通江子南段江權盡歸俄人掌握查此江爲我國松花江入烏蘇里江必由之路自失此江權之後凡我船過此江者彼或扣留或罰金或課稅一一聽命於人使烏蘇里江名爲共有實爲俄獨有也案咸豐十年以前伯力尙屬我國故界牌在此現在隔烏蘇里江遙對俄齡維克維次屯<sub>二站</sub>亦名查此處形勢彼岸高山此處乃爲低灘日後如有冲刷之慮俄人又必有代爲移置之詞據光緒三十三年俄伯力總督咨覆我國以該江隄岸被水冲刷代爲移置無少危處等語吉林交涉司尙有案可查

第五章 種族

吉林爲滿洲舊居其土著以滿洲人爲最多此外則有漢軍蒙古咸同以後始漸有漢人流寓於此蒙古漢軍中又有新舊之分滿語謂舊爲佛新爲伊徹一作異齊開國時編入旗者爲佛滿洲內又有貝國恩布特哈之分貝國恩滿語爲戶乃協領佐領由京師補放子孫遺居立戶於此也布特哈滿語爲獵乃舊在白山一帶漁獵爲生者也伊徹滿洲內又有庫雅喇之別庫雅喇非一姓一族有以庫雅喇爲姓者有庫雅喇人而別姓者與伊徹滿洲實截然二項庫雅喇居甯古塔以東清初征服入旗伊徹滿洲居三姓烏蘇東西里入旗亦在庫雅喇後三者皆滿洲者也蒙古亦有新陳之分順治九年以前編旗者皆陳蒙也九年以後入旗者則爲新蒙古漢軍則編入滿洲鑲黃正白兩旗者皆爲陳漢軍其後安置者則爲新漢軍滿洲八旗與漢軍界限甚嚴飲食坐臥均不能在一處出軍則漢軍備充前敵駐紮則別爲一管官階祇就漢軍中升擢不能與滿洲八旗攙越其歧視如此又有併入烏槍營則由台站水手營閒散官莊打樺皮壯丁揀選充也台丁者當邊台查邊及設立棚壕差使站丁者當驛站馳送文報差使壯丁者當官莊種地打樺皮差使水師營則於順治康熙間造船之役揀選各丁人爲之故於蒙古滿洲漢軍之外又有各丁之籍至康熙乾隆後又有盛京旗人及盛京兵部工部內務府之莊丁王公宗室並旗下家奴來吉耕種乾嘉道年間

吉

林

蒙

徽

又有京旗之移駐屯田今旗籍之務邊業者蓋即此種人當時禁令甚嚴內地人私人墾闢者皆號為流民乾隆三十四年在阿勒楚喀喀拉林地等地查出流民二百四十四戶俱自雍正四年至乾隆三十二年陸續存住者盡驅至伯都訥地方每戶撥給空甸一具令人籍墾種是為漢民入籍之始嘉慶五年復查出郭爾羅斯地方流寓內地民人二千三百三十戶均係節年租地墾種因為劃清地界並設立通判巡檢各一員彈壓即今長春府等地也其後漢人移殖者益衆雖經歷代諭禁亦不能止大抵以山東直隸二省人為多光緒八年吉林將軍銘安遂奏請添設賓州廳五常廳敦化縣且採用分巡道吳大澂議於吉林邊境設招墾局於是漢人移殖者益衆及俄築鐵路招來山東工役之人愈復繁盛其久住或土著者約居十之六七而漢人之外又有回人大抵皆以商販隨漢人流入者其邊境臨江富錦依蘭密山甯安又有赫哲之舊種族其近朝鮮境如延吉濛江和龍等屬又有歸化之韓人以延吉一帶為尤多此吉省種族之大概情形也

滿洲八旗氏族甚繁其姓氏最著者曰瓜爾佳氏音東曰鈕祜祿氏音亦都舒穆祿氏

揚古利之後那拉氏屬倫業赫部棟鄂氏世稱順治帝祝髮於五台之清涼輝發氏屬倫輝

今奉天輝馬佳氏屬海伊爾根覺羅氏費安古之後出姓乃另為一部族與覺羅各別如蘇蘇覺羅西林

兩廳西北賜姓覺羅氏屬海以上八氏尚選公主不出乎此餘則完顏氏等二百九十餘姓其希姓則有

精吉氏薩爾都氏等三百四十餘姓又滿洲旗內蒙古姓氏有博爾濟吉特等二百三十餘姓又滿洲旗內之高麗姓有金韓李樸等四十三姓又滿洲旗內之漢軍有張李高雷一百六十餘姓其姓字大抵係滿音譯成以別漢族前清季年許滿漢通婚姻化除種族界限然言語闕隔則情意難通姓名睽殊則習尚亦異今則漢軍俱復舊姓即旗族亦各冠漢姓五族一家共趨大同十年以後絕無滿漢名義矣

甯古塔之東北海島一帶唐書所云少海之北三面阻海人依島嶼散居有魚鹽之利者人有數種鄂倫綽其一也在近海之多羅河強黔山游牧其人男女皆披鬚跣足以養角鹿捕魚爲生所居以魚皮爲帳性懦弱

奇稜部性强悍以捕魚打牲爲業男女衣服皆鹿皮爲之無書契其土語謂之奇稜話

庫雅喀部男雍頂心以前之髮而蓄其後至肩即截去草笠布衣綴紅字於肩背亦有衣魚皮者性好鬪出必懷利刃婦女幼時即以鍼刺脣川煤烟塗之土語謂之庫野話

費雅喀部沿海島散處以漁獵爲生男女供衣犬皮夏日則用魚皮爲之性悍好鬪出入常持兵刃

恰喀拉部散處於琿春沿東東海男女俱於鼻傍穿環綴寸許銀銅人爲飾男以皮爲冠布衣跣足婦女則披髮不笄而衿衽間多有刺繡紋其屋廬舟船俱用樺皮俗不網罟以魚

射獵爲生性游惰無蓄積土語謂之恰喀話

七姓部性多醇樸地產莠麥雖知耕種而專以漁獵爲生遇冬月冰堅則足踏大板溜水而射其婦女亦善伏弩捕貂衣帽多以貂爲之土語謂之烏迪勒話

黑津部名目不一有薙髮不薙髮黑斤自阿吉大山以上沿松花江兩岸居者通稱黑斤即赫哲部也其男皆薙髮亦呼短毛子女未字則作雙髻已字則爲雙辮鼻端貫金環婦女用布一幅曰勒勒自喉至頸下寬以蓋兩乳爲度腰以上翦色布或魚皮爲花貼之腰以下用銅片圓徑一寸及二寸許者共二十餘枚各鑿雲紋孔呼曰空盆以次垂布上富者用繩貫珠貧者貫銅叩擊勒勒於頸後走則丁冬有聲喜用紫色袖口束以花帶足著魚獸皮鳥喇自膝至踝亦翦色布或魚皮爲花下連烏喇男人多戴耳環無文字削木裂革以記事不知歲月問年則數食達巴哈魚幾次以對夏捕魚作糧冬捕貂易貨爲生計其俗能知親愛敬禮子弟或遠行自外歸皆右執壺左捧杯請父母兄嫂坐依次跪進一巡再酌則父母兄嫂僅各一沾唇令子弟自飲親戚往來以抱見爲禮親喪則子翦髮尖夫喪則妻纏白布衣蓋樓聘娶男携酒壺入女家先飲後議銀上者以綢緞羔皮代次者以布女與父母俱允即同宿一夕再約期送女不親迎無論冬夏生子皆用冷水沐浴自阿吉大山順松花江西北行至黑勒爾地方沿江兩岸居者通呼長毛子謂之不薙髮黑斤風俗習尙與薙髮黑斤同惟

言語差異男不薙髮垂辮以弄熊爲樂遂與薙髮黑斤爲兩類夏航大舟冬月冰堅則乘冰牀用犬挽之故稱爲使犬國其土語通謂之赫哲話

以上諸部其源流支系已無可徵僅就往史述之聊存參攷今則均已歸化惟赫哲部尙仍舊習即俗所稱爲魚皮韃子是也此種人性最愚蠢每苦不諳交易往往藉山東人爲經營故一魚皮韃子家恒用一山東人名曰山東棒子亦謂爲管家人財產悉爲所握並佔其妻亦不爲怪其人食魚火毒最重身有膠臭最患天痘據云清初時即有四百餘戶在臨江富錦一帶三百年來仍不加增蓋是種人患痘獨烈易有天折也

第 五 章  
種 族



第六章 風俗

案吉省風俗與內地絕異雖經高麗之統治渤海遼金之崛起中原肅慎舊俗尙難革除自前清改建行省後漢民漸次移置滿洲人民稍有合同而化者其間如赫哲蒙古尙甘自樸陋何也政教之失於治也久逸惰之中於習也深其心思智識皆相安於譴陋難以家喻而戶曉矣夫禮教者風俗之本而法律又政治之原也歐洲各國以禮歸於宗教法歸於政治雖宗教之勢力漸衰而政治之範圍乃愈廣是故風俗之優劣關於公衆之治安者可以法律治之關於私家之道德者不可以法律治之而其能濟法律之窮者則又恃有教育吉林民智初開文化未能普及爲今日計宜以教育代宗教取宗教之精神納諸教育於冠婚喪祭飲食日用酌予變通善者導之敝者革之惡劣者嚴禁以防之敗壞者因勢以救之迷信之儀式虛僑之繁文必與湔除編簡易白話隨時發布更遍設鄉約多方講演斟酌損益參之以禮條舉利害動之以情以去窳敗頑固之舊習民間耳目使之一新而又能持之以恒行之以漸化民成俗其庶幾日起而有功乎編風俗類因述此意以告當世焉

第一節 滿漢婚禮之異點

婚嫁無定制以東三省爲最惡習古者三十而娶二十而嫁具制最當三省男女每在十四

五歲即已成婚有害於身體與智識學術生計莫此爲甚其聘金無論貧富所在皆有富者固無論矣其貧賤者禮物不求過多聘金需吉錢四五百串是故婚嫁之費中人之家約吉錢二三千串照合銀約四五百兩往往有貧寒力不足婚娶則婿至女家就婚者謂之倒找門如女家無力作嫁則於聘禮之外多索聘金以爲嫁資謂之養聘錢以至上品之族因愆期而多怨驕下流之民起爭端而成攘奪此爲三省最大惡俗至聘禮納采昏期行親迎禮與內地常俗大致相同惟合昏禮後女家戚黨偕至謂之送親午膳後女之弟姪輩延婿升炕食水角謂之管小飯出堂同婿祀竈拜舅姑及族黨姻戚畢婿家備酒肴延婿及婿並舅姑尊長等再食侑以鼓吹謂之管大飯宴畢婿即席前拜女族親長各以金銀品爲賜如娶繼室前妻母家亦如之日暮入洞房伸麵爲條曰長壽麵次日婿家尊長媼姪咸集引婿拜見之分大小亦各以金銀品物爲賜婦以女紅分獻翁姑及尊長謂之散箱又次日姑嬭引拜祖祭奠猶有三日廟見遺意也嫁之日親舊男婦各數人從曰新親嫁之次日親舊仍往曰裝枕頭數日後迎婿及女至家享以盛饌曰回門匝月後迎女歸曰住對月此各屬漢人之通行昏禮也至滿蒙婚禮則與漢人異者在未嫁前男家帶婿詣岳家納米行裝烟叩頭禮婚亦親迎婿家室門外支布爲帳帳內設短几婦及門先進帳房男女分東西向交拜食盞起男挽女袖繞几三匝理女髮易笄而髻謂之上頭出帳房男女向長者行跪拜禮男女

侍立門右裝烟肅客云

第二節 喪葬特別之禮俗

喪禮夜革後子號哭擗踊去冠婦女去笄喪主婦使子弟護喪事治襲殮之具計於戚友踰時奉湯及巾櫛入婦女出婦喪則男出沐浴仕宦按品具衣冠帶舄庶人亦袍靴纓帽女則衣青藍素綢服無緣飾不論寒暑襲衣皆綿含尸以銀屑三已襲幃堂殮尸於床當日成服子衰絰寢苦枕塊於床側五服之親各服其服擇入斂之期不出三日及殃煞起落曰開殃榜屆時執事者以棺入棺內奠七星板藉褥施錦衾垂其裔於四外奉尸入棺喪主以下憑棺哭踊盡哀乃蓋棺加錠施漆棺殮之日親朋具香楮來弔喪家札青白彩具飲食款之午後送靈於土地祠鼓樂前行次則執事僧道祭品札彩又以紙繪爲冥具執刑杖棒香爐者各數人以青紗輿篋昇靈位男女孝服以從戚友亦至曰送三三或作山以其送葬於山也俗例病者氣絕時卽焚紙車曰倒頭車駕車者男札馬女札牛滿人院中豎幡竿漢人門外掛紙幡如死者歲數曰過頭紙送三之日束草帚象尸掃過頭紙附帶上孝子負於背繞棺呼號出門詣土地祠扶帚於椅媳女輩持梳櫛舉鏡奩自帚作理髮照面如生狀孝子升高而呼曰上西南大路以帚加札彩焚之延弔者向火舉哀致奠閱六日爲迎七昏暮設祭於烟筒下合家哭拜名曰上望每七日舉祭禮焚楮設奠擇期發引殯之前三日爲展弔門內

## 第六章 風俗

1011

外高建樓棚設鼓樂札彩先一日成主家祭安葬日出大扛三日復往負土培墳曰圓墳滿洲舊俗不奉木主亦無銘旌於院中立桿掛旛每日叩奠三次而已

## 第三節 滿洲祭祀

滿洲每逢春秋祭祀前一日以黍米煮熟搗作餅曰打糕糕薦享後以食合族及親串此猶寓古者酢賜之意有祭星祭祖獻牲於神前名曰阿瑪尊肉撤燈而祭名曰避燈肉祭肉不出門惟避燈肉可以饋親友祭時族人戴尖帽如兜鍪緣簷綴五色紙條下垂蔽面外懸小鏡二如兩目狀身著布裙徧繫銅鈴擊鼓而舞口誦吉詞衆人擊鼓相和曰跳家神此外又有跳大神蓋以治病類神巫也次日祭院中桿以豬腸及肺肝生置於竿頂之碗中以祭烏鴉用豬喉骨貫於桿梢再祭則以新易舊而火之祭之第三日曰換鎖換鎖者換童男女脖子上所帶之舊鎖也其鎖以綫爲之

滿洲祭桿以肉飼鴉蓋由其先祖名范察者逃難山谷遁於荒野幾爲追者所獲會有神鴉止其首追者遙望鴉棲處疑爲枯木中道而返乃得免隱其身以終自此後世俱德鴉誠勿加害焉其桿名挈臘竿蓋其先人入山挖稜用以披草芥而備捍獸者桿之頂有圓碗式挿之於地就碗以貯食物食餘招烏鴉飼之今旂人祭桿並置豬腸肝於桿頭碗中猶是當年飼鴉意也八旂內室供奉神牌只一木版並無一字亦有用木龕者室之中西壁北壁一龕

凡室南向北向以西方爲上東向西向以南方爲上龕設於南龕以黃雲緞爲簾帷亦有不  
用者北龕上設一椅椅之下有木五形若木主之座西龕上設一杌杌之下有木三春秋擇  
日跳神其木則香盤也以香末灑於盤上燃之所奉之神默謂觀音伏魔大帝土地也故用  
香盤三

#### 第四節 風俗雜誌

人民居住多仍舊俗土房草屋比比皆是湫隘卑陋習爲故常屋有起脊有平頂者然院落  
四周立大木必以板爲障高與檐齊室以內靠壁設土炕或南北二炕或東西二炕或南西  
北接繞三炕空其東各方面多開窗戶有如炕大者俱從外閉其一方面皆窗者謂之明裝  
每方面僅開中央一窗者謂之暗裝此等形式無貴賤貧富皆然居民有室無堂寢食起居  
待客均於土炕炕高尺有咫闊高五六尺男女各盤膝坐南爲尊西次之北爲卑夜臥則頭  
臨炕邊腳抵窗無論男女尊卑皆並頭如足向人則謂之不敬惟妾橫臥其主腳後頭不近  
窗者蓋因天寒窗際冰霜衾稠爲寒氣所逼故交秋之後則生火於下非此不足以禦寒也  
滿洲大燕會主家男女必更疊起舞舉一袖於額反一袖盤旋作勢曰莽勢中一人歌衆以  
齊空二字和之蓋即以此爲壽也先送烟次獻乳茶終進犧牲以解手刀割而食之  
元日於門前植松樹二株上貼桃符張燈彩元宵節以粉簞祀祖張燈彩三日有旱船秧歌

竹馬諸雜劇男女皆艷服出游或步平沙謂之走百病或聯袂打滾謂之脫晦氣二十五日俗稱龍封日各家皆懸獨頭蒜於門前以避瘟疫小兒女剪五彩布爲圖形穿以彩綫佩之名曰小龍尾又食合菜以爲豐年之兆且多於是日作黍飯以祀倉名曰添倉端陽日門懸蒲艾掛葫蘆婦女以彩絲爲帚製五色緞製荷包葫蘆諸小物簪髻上中秋節陳鮮果供月合家聚食不出外曰過團圓節十月朔展墓祀祖謂之送寒食除夕焚冥資於巷口曰燒包袱祀竈日供糖糕謂之過小年前後數日人家以肉糜包水角以糖包麪蒸糕曰蒸餠餠與魚肉肴蔬足儲半月之食

松花江十月杪即凝堅冰名曰封江城南沿江岸旅店至冬乃鑿冰立柵於江中以作市廛貯野鳧山雞獐麇鹿豕之類居人購之作度歲之饜儼然一市埠焉

東三省素產菸酒自縉紳之家以及農工下級勞動者無不有煙酒之癖其嗜烟尤甚雖髫年女子行路亦以長桿烟袋攜於手中其俗以送烟爲敬客故男女老幼無不嗜者

吉林背山面水宜於漁獵向無公司之聯合又無區域之限制故營其業者大半屬於農民兼業推臨江之赫哲人漁獵則經官允准其餘漁業中有納魚尾或網底稅者要皆爲旗官管轄亦無定例採珠打牲吉林五常敦化之屬則有禁令平民不得私業事由烏拉總管衙門經理設有專役皆屬滿人密山之採珠打牲多屬魚皮韃子新城延吉賓州多屬旗人濛

江方正多屬漢人臨江多屬赫哲人長嶺多屬蒙古人漁獵器械約有十種曰漁網曰釣竿曰漁叉曰擋亮子曰冰川冬至凍合用冰川兩口距離約數丈漁者攜網具赤身縋而下由此逕穿彼口復牽網縋而上舉網得魚此爲冬令取魚之法以上六種爲漁具曰鎗曰拍鉤曰壓排子曰柵子以上四種爲獵械均沿用舊式惟近今吉林依蘭濱江臨江敦化長壽各處於獵械多改用外國新式槍彈然究非獵業中之特別品也

吉林地處偏僻精於方伎者少懸壺市上賣卜街前大都外來者多有醫業而兼設藥局者名曰坐堂聲價稍高次則有一種游食之民手懸招牌背負藥囊游行村市沿門售技者曰散醫鄉屯常見之巫業多屬嬾人其方法則繫鼓搖鈴蹈舞申禱於神前俄而代神宣言名曰神附其身延巫之家或因疾病或因邪祟有所祈禱巫以符水藥餌等物治之此風迷信者頗多亟宜禁之

北方花會亦博戲之一山東直隸皆有之而吉省尤甚其爲害鄉愚無老幼男女無不沈迷近年雖經官署之嚴禁山盪水陸此風猶不能免其中情形多不可解茲就土人所述之其會分三十六門每門俱有姓名亦有獸目係以職業如林姓中有林太平者皇帝也陳姓中有陳吉品者狀元也如劉井力係漁夫趙天申係樵童蘇青雲係婢女周青元係寡婦之類蓋三十六人名別其行業與歷史凡有六盜六女二童子各等之稱說如婢女寡婦及六

吉

林

彙

敘

女中之二也所著姓氏皆著望南中關外殊少推之百年前則並無漢姓莫謬其原始何時顧與委巷中人詰詢現在某官姓名何茫十九者如任舉花會中人名一人無不了了更言其行業關係者博者孤注一博進之可獲三十倍日開一次或二次博局主人掣籤揭規則大呼某門中彩往博者先以紙裹錢自書所押注何名一一懸於博場博主懼邏者偵伺日遷其處或婦女以道遠勿能至故必有奔走爲撮合名曰跑封常人一入此殼輒神魂顛倒晝占巫覡夜占所夢至傾家而後已因是僥得僥失迷信愈深其家必供一神朝夕禱拜胡三太爺之淫祠所以遍於通省者此耳

結會聚衆以邪說煽惑愚民者有黃天道教及在禮會之兩類黃天道教勸人以持齋念佛愚民迷信者多心醉之其會有老爺會首之目隨處結會向無定所顧其底細外人亦難知其詳在禮會託以禁烟戒酒爲宗旨又有五句真字之秘受其會亦無定所隨地約日坐壇謂之坐日子入會者各納市錢二緡謂之奉日子錢黃天道教不見有口號道標幟入在禮會者其口號彼此相呼於姓名下各稱爺名曰道親其標幟以灰色帶子繫腰極易辨認入會者以農民及下級勞動人爲多

吉林深山叢林中盜匪出沒時有強劫行旅者有戒心焉統名之曰紅鬍子立說不一有謂匪人常戴假紅鬍以飾真面目如南方盜賊以色塗面妨人易識也有謂往時土鎗常用紅

布塞其口射擊時紅布以口啣之人遠望以爲紅鬚不知其地爲胡地故稱其匪爲胡匪後人譌以胡爲鬚子耳胡子隱語甚多如擄人勒贖曰綁票不贖則殺之曰扯票膀子爲槍腿爲馬一行一動皆有代詞外人不得而知也

棚邊紀略云十年前行邊外者率不裹糧遇人居直入其室主者盡所有出享或日暮讓南炕宿客而自臥北炕馬則糞豆麥剉草飼之客去不受一錢他時過之或以鍼綫荷包贈則又糞乳豬鷄雞以進蓋是時俗固厚而過客亦不若今日之多也今則走山者以萬計蹤跡詭秘倉卒一飯或一宿再宿必厚報之而居者皆巧於計利於是乎非裹糧不可行矣然宿則猶炕炊則猶給樵蘇飯則猶助瓜菜尙非中土所能及

邊外文字多書於木往來傳遞者曰牌子以削木片若牌子故也存貯年久曰檔案曰檔子以積累多貫皮條掛壁若檔故也然今之文字書於紙者也呼爲牌子檔子蓋前清時多沿用滿洲舊名也

生子三日浴兒親友餽以雞子麪食曰送粥米彌月親友各携繡績兒飾相賀曰滿口小兒一月後下搖車所謂搖車者以篩板圈做兩頭高中凹每頭兩孔內外用綵畫墊薄板懸於梁上離地數尺或懸炕上繫之以鈴縛小兒製其中使不得動哭則搖之口念巴不力明妃出塞馬上琵琶近惟蒙古之郭爾羅斯前後旗婦女多能於馬上彈之他處則不及見

也其琵琶較常用爲稍大至羌箏胡笳篪篥鼓蘆管方響箏笙大鼓拍板尙有之餘則不習見焉至腰鼓篪篥等樂中國失傳日本婦女多有能之想亦由中國輸入也

士大夫家於冬日喜作冰燈以礬水凝雪成冰鏤八仙觀音等像於薄紙片裁以作燈夜燃竹放光幾如刻楮之亂妙不可階能久至二三月方解又有練燈俗名霞棚以米糠和水順手粘麻楷逆則不可燃曬乾長三尺餘插架上以三岐木爲架鑿空其堵橫糠燈於中或削木牌鑿眼於上懸之梁上光與燈相等

童子相戲以獐鹿等獸髑骨用錫貫其竅或三或五堆地上擲之骨一具四面不同擲以四枚視偃仰橫側爲勝負各得一色則爲四色全中者盡取所堆以去不中則與堆者一枚其用圓薄石擊之則曰帕格又曰羅丹

耙犁用轆木作底立挿四柱高三寸許上穿二橫木或鋪板或搪木坐人拉運貨物皆可用前轆上灣穿以繩套一馬服駕輕捷過於車若馳驛更換馬匹冰雪之地可以日行三四百里並有作車棚於耙犁上設旁門套鹿皮圍謂之暖耙犁

滿洲舊俗向用遼金語故其稱父曰阿馬母曰葛娘大伯曰昂邦阿馬叔曰曷克赤子曰濟女曰义而漢濟甥曰濟頒即哈夫曰愛根妻曰义而漢男人曰哈哈女人曰赫赫兄曰阿烘

弟曰多嫂曰阿什姊曰格格妹曰那小厮曰哈哈朱子了頭曰又而漢朱子年高者曰馬發  
 朋友曰姑促好曰山音不好曰曷黑吃飯曰不打者夫吃肉曰烟立者夫吃酒曰奴勒惡米  
 吃燒酒曰阿而乞惡米讀書曰必帖黑呼辣米射箭曰喀不他米書曰必帖黑筆曰非墨曰  
 百黑紙曰花傷硯曰硯注金曰愛星銀曰蒙吾錢曰濟哈水曰目克木曰木土曰鼈烘火曰  
 托族曰牙哈有曰畢無曰阿庫是曰音諾不是曰吞喀富曰拜央窮曰呀打人曰亞馬坐曰  
 突立曰衣行曰弗立米走曰鴉波睡曰得多密去曰根喇蜜來曰朱要曰該蜜不要曰該辣  
 庫小曰阿即格大曰昂邦買曰烏打蜜音曰溫嗟蜜兩曰央一曰曷木二曰朱三曰衣朗四  
 曰對音五曰孫亥六曰佞我七曰那打八曰甲工九曰烏衣十曰壯百曰貪吾千曰銘牙萬  
 曰土墨貂皮曰色克人褻曰惡而訶打小船曰威呼竈突曰呼蘭耙犁法曰喇榆柳小弓曰  
 斐蘭匙曰賽斐攔板曰額林木箭曰施函圻廡所綴麻曰拉哈糠燈曰霞棚紙曰豁山鹿蹄  
 跪骨戲具曰羅丹樺皮房曰周斐皮鞋曰烏拉烟函曰摩呼郎紅曰富勒佳哈黃曰蘇延幹  
 黑曰薩哈連白曰珊延獸曰堪丹牛曰依罕驢曰愛罕驢曰瑚蘭山羊曰尼滿熊曰勒富善  
 狼曰鈕赫猪曰烏勒間狐狸曰小多壁烏鴉曰嚙哈鷄曰錫勒們雉曰烏勒呼瑪鷄曰科齊  
 克鷹曰拉呼塔蝴蝶曰敦敦魚曰尼瑪瑚小魚曰尼石哈鴨曰聶赫豆曰圖哩草曰富赫舍  
 庫麻曰奇穆尼葫蘆曰呼倫生菜曰納穆野菜曰塞珠倫山崖曰崇普陡崖曰固拉庫山陰

第六章 風俗

曰阿嚕路曰札穆圖大曰安巴小曰阿濟格圓曰穆哈連扁曰哈勒費延臥曰克卜特水曰  
穆克河曰畢喇大河曰昂邦畢拉細流曰畢拉罕溝曰烏蘭渡口曰多觀正面曰奇音橫曰  
哈圓潔淨曰博勒和淨曰納恩圖以上第就滿洲現時之沿用語錄之以存舊俗其他如  
山川地名及日用語尙多不能備載茲特記其一隅耳

第七章 地產

第一節 礦產

案吉林礦產向稱宏富其礦質五金與煤俱備統計全省金礦四十三處銀礦五處銅礦三處鐵礦五處錫礦三處鉛銻鈔礦四處水晶礦三處其最著者爲夾皮溝及甯古塔三姓琿春等處之金吉林之煤天寶山之銀黑石鎮之銅鉛外人艷羨著爲論說自光緒季年開辦甯古塔蜂蜜山等處之金礦時開時禁天寶山富太河之銀銅礦曾經開採現亦封禁甯古塔炸子窩營盤溝等煤礦二十餘處商民開採尙未發達其中尙有幾經交涉者如杉松官街頭道江各煤礦夾皮溝甯古塔琿春各金礦依力嘎之石山等曾與俄人交涉石牌嶺天寶山等處又與日人交涉有與我定約開採亦有逕行開採者漫藏誨盜經訓有徵地寶不興強鄰虎伺邇者日方垂涎於南俄人經營於北兩國調查驛使相望於道而我之富力蘊厚聽其秘藏貨棄於地殊爲可惜茲就前人所已經調查礦產地點錄列於後

金礦 吉林夾皮溝三五道火籠五道霍羅八道河輝發河 伊通半拉山門 磐石窩瓜地當石河墻縫樣子溝扇車山駝佛鼈 樺甸樺樹林子 賓縣烏吉密一面坡黑龍宮 延吉西二道溝西三道溝西南灑金溝七八道溝汪清溝東三道溝柳水河子涼水泉

吉

林

彙

總

子西北岔香房溝東四道溝蜂蜜溝天寶山 東甯小金山萬鹿溝小綏芬馬家大營牡  
丹江右岸 依蘭二道河子楸皮溝黑背 樺川樺皮溝 同江太平溝石門子 密山  
南綫毛老綫毛楊木岡  
銀礦 吉林柳樹河子呼隆川石咀子 伊通九台子 延吉天寶山 依蘭樺山子  
銅礦 吉林富太河朝面山 磐石黑石鎮  
鐵礦 吉林牛頭山大豬圈 伊通影壁嶺子納祿子 延吉稽查處  
錫礦 吉林呼隆川 磐石半截河 延吉天寶山  
鉛鋅礦 吉林大尖山呼蘭川濫泥溝 磐石黑石鎮  
水晶礦 吉林西石嶺子石道河帽兒山  
煤礦 吉林啞叭溝濫泥溝泥球溝乃子山杉松屯沙河子小河台歪石嶺子涌氣溝台子  
溝二道河子分水嶺荒山子葦子溝鍋盔頂子長嶺子輝發河半拉窩雞溝公郎頭絃子  
溝柳樹河子高家燒鍋半截河子 長春四道溝石牌嶺陶家屯大頂子 伊通影壁嶺  
子半拉山門放牛溝四台子四角山磨礪 磐石呼蘭川花曲柳岡 樺甸樺樹林子  
賓縣團山子大青山高力帽山大溪河好石林子老山頭老龍山雙陽山大石嶺西烏吉  
密東烏吉密 同賓一面坡 五常太平河缸窰林子 延吉老頭溝頭道溝稽查處涼



樺 皮斑文色殷紫如醬中豆瓣故曰樺醬瓣狀似白楊皮似山桃有花紋紫黑色可裹弓及鞍鐙諸物山中皆有之而嫩江混同江之間尤多烏拉有樺皮屯設壯丁採皮亦可作箭竿其木癭紋極細夏間剝其皮入汙泥中謂之糟糟數日乃出而曝之地白而花成形者貴特設樺木廠有章京有筆帖式有打樺人每歲打樺皮入內務府遼東樺皮遂有市於京師者有以樺皮作船大者能容數人小者挾之而行遇水輒渡游行便捷又以樺皮蓋窩棚並有剝簿皮綴綴爲油布大雨不濡

櫟 葉大黑皮紋細微赤者曰紫櫟人棲生於其下王漁洋池北偶譚載高麗採棧贊云三極五葉背陽向陰欲來求我櫟樹相尋櫟音買葉似桐質白者曰穉櫟其皮可製繩引火鎗軍中需之櫟類銀杏可爲器其皮可代瓦浸水久之可索綯又有一種白櫟木葉大如團扇初生時可蒸冷淘霜後則鮮赤如楓其皮可治繩爲魚網之用烏喇網大魚常用之香樹 莖直叢生花黃長白山最多可焚以祭神土人取作香生近山崖者有節名竹根香根往年作箭砲頭安春香生山巖潔淨處高一尺許葉似柳葉而小味香可供祭祀長白山所產尤異常香俗呼爲安息香又七里香枝葉似安春香葉大而厚惟產於長白山他處不見

六棱木 枝幹皆六棱最堅實

暖木 或云即黃蘗木皮溫厚可墊鞍鐙心及包弓靶細者可爲鞭桿又烏拉出小暖木形

類杉松木質尤堅

楛 一名雉尾荆色赤可爲矢世傳肅慎氏楛矢或即此據楊賓柳邊紀略云楛木長三四

寸色黑或黃或微白有文理非鐵非石可以削鐵而每破於石居人多得之虎兒喀河相傳肅慎氏矢以此爲之好事者藏之家非斗粟疋布不可得楛矢自肅慎氏至今凡五貢中國勿吉室韋之俗皆以此爲兵器或曰鐵鏃或曰楛箭歷代史傳言之娓娓余所見直楛耳無有所謂鏃與箭也按滿洲源流考引元戚輔遼東志略云肅慎東北山出石其利如鐵取以爲鏃即石弩也而楊賓以爲楛木蓋誤以石弩爲楛矢耳

榛 樹低小如荆叢生開花如櫟其實作苞三五相黏一苞一實生青熟黑殼厚而堅仁白而圓香美甲於他省

凍青 寄生樹上葉微圓子赤凌冬不凋青蔥可愛

草荔枝 叢生朱點味甘似普盤而無子內地所無烏拉間則有之

烏拉草 出近水處溫輒細長三稜實其中穢而撻之以木椎數十下則輒於緇用以絮皮鞋內雖行冰霜中足不知冷諺云吉林有三寶人獲貂皮烏拉草又名護臘草履也塞路多石磧復易沮洳不可以履縫革爲履名烏喇烏喇堅足不可裹澤有草柔細如絲草無

名因用以爲名

鷹 遼以東產鷹自東海來者謂之海東青遼人酷愛歲歲求之女真至五國戰鬪而後得  
竊古塔尤多每年十月後即打鷹總以得海東青爲主鷹生山谷林樾間視其出入之所  
繫繩張網晝夜伏草間伺之又有蘆花鷹極貴重鷹純白爲上白而雜他毛者次之若得  
色純白者必送之內務府海東青身小而健其飛極高能擒天鵝搏兔亦俊於鷹鵠皆  
有窠巢多緣峭壁爲之人不能上惟海東青從未見有巢輟耕錄海東青羽中虎也此能  
制之羣集緣撲即墮以小制大物性往往如此猶黃腰啖虎之類也李太白詩翩翩舞廣  
袖似烏海東來蓋東海有海東青俊鵠白詩言其舞如海東青也

雕

似鷹而大色黑出竊古塔諸山其品不一上等黑者曰皂雕有花紋曰虎斑雕黑白相  
間曰接白雕小而花者曰芝麻雕羽宜爲扇雕之大者能捕麋鹿中間有之翅若車輪  
爪同鋒刃雙眸噴火長喙反鉤颯風有凌雲之志鷲鳥之雄也

雉

黑水靺鞨俗插雉尾爲冠飾近時俄婦人仍效此粧椎俗呼野雞遼東野雞頗有名惟  
吉林之野雞最肥油厚寸許出獵秋間號打野雞圍

沙雞

似雉而小脚有毛爾雅謂之鷓鴣俗呼沙半斤亦名樹雞多出林中不在沙漠之內  
土人所謂飛龍或即此也

虎 喜跳盪故多居深山叢林中不常見土人多諱言之曰山神莫之敢撻也又稱老媽子

白質黑章者尤猛擊虎晝伏夜行獵者恆蓄犬獵犬不畏威聞虎嘯則驅虎前而吠嗥虎怒逐之將及犬則匿於林內驅虎再奔再匿虎去已遠其犬乃歸獵者捕虎總在冬令以其毛穠厚始有價值也每於雪中伺虎行跡虎前行必尋舊路歸獵者輒於路張機其法橫繫一銅綫一端曳於引滿之機關弓架入銃機虎觸之彈發恰中其前胸既負傷輒奔越數里按其血跡追尋乃就斃所而後敢取焉

豹 似虎而小白面團頭色白者白豹黑者曰黑豹文圓者曰金錢豹最貴重文采長者曰艾葉豹

豺 足似狗瘦如柴擊猛善逐獸獵者畏猛獸恆作嘯聲呼豺至啖以乾糧繞其居遺溺而去豺溺最羶百獸皆畏故聞之俱引避也豺性最慈仁而世以豺狼並稱殆未能識其性也

狼 吉省到處皆有惟東北諸山之狼皮爲最厚蓋其地氣候嚴寒故也以皮毛青白者貴可爲坐褥性最險能出人不意故人皆避之

熊 大者爲羆小者爲熊熊各處皆有熊惟盛京吉林始有之他處所無俗呼爲黑瞎子以其目甚小睫毛厚而易蔽也有馬駝狗駝二種其實即羆熊也馬駝高四五尺重千觔狗

駝高二尺餘重亦五六百觔性悍而有力馬駝常與虎鬪胸腹有白毛者爲最悍力能拔樹亦能升樹每端坐樹上角前掌折樹枝壓於股下有時樹折墮地則矗立狂嘯如人笑聲獵者恒畏之不食肉入冬則蟄伏洞中俗曰墩倉在樹窟爲天倉巖洞中爲地倉終日舐掌若以療饑或云熊性愛掌平時在砂石行走冬後不能行故日以牙齒磨礪洞中氣燄蒸薰霜雪中一望而知獵者恒於洞中射殺之性最慙生犢必兩懼獵者偵其穴一日輒數移焉熊攜子過河不論深淺必先覓一石壓其子已乃偕其一過河登岸又覓石壓之遂返而相尋覓石取其重大者往往壓斃熊揭石見其子已死復趨彼岸壓斃亦如前輒號呼奔走狼之黠者每伺以果腹富玉蜀黍熟時熊入禾叢中人立而掌掠之且掠且挾於肘肘甚直每挾旋落地禾稼蹂遍肘中終止一黍彼獵者常從望樓中發鎗射之命中與否熊必來將樓推倒凡獸背鎗而走熊迎鎗而撲即彈貫其胸猶能拾泥草自塞其傷狂奔數里乃斃熊膽能療目疾熊掌爲食品八珍中之一熊皮禹貢列入貢品今則不甚寶貴焉

鹿 吉林產鹿最多有馬鹿湯鹿毛鹿合子鹿牡者有角夏至則解牝者無角鹿角鹿頂合燕以北方可車須是未解角之前才解角血脈通好者有人字不好者成八字有髓眼不實者北人謂角爲鹿角合頂爲鹿角合南鹿不實有髓眼不可車北地角未老不至秋時

不車鹿尾亦食中佳品鹿茸以紫茄色者爲上長數寸破之肌如朽木茸端如瑪瑙紅玉者最善

麋 似鹿而色青黑大如小牛肉鬣目下有二竅爲夜目麋角與鹿角不同麋角如駝骨通身可車却無紋鹿頂骨有紋野客叢書麋鹿兩茸性相反麋茸補陽利於男子鹿茸補陰利於女子月令仲夏鹿角解仲冬麋角解鹿以夏至隕角而應陰麋以冬至隕角而應陽故知二者陰陽之性不同鹿肉暖以陽爲體麋肉寒以陰爲體以陽爲體者以陰爲末以陰爲體者以陽爲末末者角也其本末之功用又不同也

麀 吉林所產有鹿形俗呼爲四不象即麀也王會解稷慎大麀孔晁注稷慎肅慎也貢麀似鹿是麀又爲吉林所特產也一名駝鹿色蒼黃無斑頸短項下有肉囊如繁纓角扁而闊瑩潔如玉中有黑理蹄能驅風疾其形蹠似牛頭似馬身似驢角似鹿不芻不豢惟食石花奇勒爾俄倫春人養之用則呼之使來牧則縱之使去性馴善走德同良馬竹葉亭雜俎謂其皮可爲半臂衣之愈久則愈厚亦愈軟若爲油衣所污俟其乾揉之仍復如故凡皮見水則硬衣此者若污可加澀濯焉聞此衣油垢既甚可禦火鎗刀鈍亦不能刺入也甯古塔烏蘇里江時有之一名堪達漢

麀麀麀 皆鹿類麀即甯無角肉亦可食爾雅麀大麀郭璞注麀即麀麀形似麀一名香

麀喜食柏臍血入藥爲麀香不如滇產高麗人來此取之其法於榛莽隙地架長繩中繫繩圈麀穿過則頸套入繫麀之臍成圓頂形割如桃大近今山民恆效弋取之麀色蒼赤形比內地所產稍大味腥皮可禦濕瘳毛長犬足皮堪爲履寫

野豬 黑水靺鞨俗編髮縷野豕牙明一統志野豬女眞出今山中有之大如牛形似彘耳稍小上下齒外出而又灣捲利逾鋒刃馳突時猛如虎兇且過身日襯松油厚有寸許名曰掛甲鎗箭不能入此外又有豪豬身有刺白本而黑端怒則激去其利如矢射人

山羊 生山中似羊而大即羆羊亦名盤羊鹿身細尾兩角盤背上有蹙文善登山皮黑灰色血可治疾又名野羊懸羊類青羊而柔毛過之據本草云山羊即野羊亦即羆羊

狐 皮有黑白黃三種色赤而大夜擊之火星迸出毛極溫暖集腋成裘玄狐出混同江下大於火狐色黑毛煖最貴經年不易得青狐名倭刀黃狐烏稽所產又有沙狐生砂磧中身小色白腹下皮集爲裘名天馬欵皮曰烏雲豹一說狐與貉交生小狐爲倭刀

貂 貂皮爲吉林特產向有貢貂諸部號爲打狐狸部大抵在混同江烏蘇里江南岸貂以毛根色青者爲最佳曰青鞞三姓以東產之毛根略紫者爲紫鞞高麗奉天產之至毛根灰白名爲草鞞各處皆有捕貂之法設一確房於深林曠野地方四方釘確四股每股長周三十里釘確約三百盤四股共千餘盤其確式就倒木或伐大樹爲之左右釘五寸高

木椿兩排每排八株中以兩株爲門椿下置活木滾棒確槽闊五寸許後釘一小椿曰老椿再以丈許徑五寸許之木橫尾刊透豁又於老椿臥槽中橫頭釘一木鉤曰掛鉤左傍樹木有紋用一小木挑杆架於立木以上將木橫挑起下端繩繩尾繫寸長消息木卡於門椿處之活木滾棒再用兩條細棍壓滾棒於確槽中曰橋梁後用分厚之薄板兩片曰橋頁致壓滾棒下沈消息木脫出則木橫下落而壓斃矣以寒露節爲支確期謂之推橋頁霜降後謂之打響草貂踏草有聲善捕灰鼠往往於林中松子熟時伺灰鼠覓食隨後取之而捕貂者亦以是占其蹤迹而兼獲焉至大雪後則又於山深雪地驗貂跡貂嘗眠夜出挨樹竅以捕鼠即伏樹竅內捕者負一背兜內插板斧外具硫黃綫扇風等物踏雪地有入跡無出跡者先以樹塞其口用土屑雜硫磺綫燃之以風扇揚烟入竅燻竅口嚴掩使悶斃樹竅中後伐木取出於皮革毫無傷損亦有用網兜並蓄養獵犬嗅較更捷矣

獐

獐獐孫即土豹類野貓而大耳有長毫白花色小者曰烏倫格致鏡源云事物紺珠

獐獐孫黃黑色皮可裘出女真

狸

冊府元龜唐開元七年韃靼獻白兔貓皮居山谷中狐類口方色黃有斑善搏亦曰野

狸

獐 似狗而短體肥行鈍皮宜裯褱形如狗喙如豕足皆五爪毛深重油能治火湯

貉 狀如狸斑色其毛深厚溫滑可爲裘俗名野馬其皮紋上圓下方寢處其皮者立能解醒設有緊急毛輒豎

鼠 吉林所產之鼠有銀鼠灰鼠豹鼠鼯鼠鼯鼠鼯鼠黃鼠鼯鼠松鼠等名銀鼠毛皮潔白爲諸鼠之冠灰鼠即青鼠灰白爲上灰黑次之豹鼠即爾雅所謂豹文鼯鼠是也郭注鼠文彩如豹鼯鼠狀如小狐肉翅翅尾項脅毛紫黑腳短爪長尾三尺許鼯鼠一名鼯鼠又名黃鼠狼又名鼯鼠其尾高麗人取之以作筆黃鼠契丹志刁約使契丹爲北語詩云密賜十貔狸注形如鼠而大穴居食穀梁肉味如豚而肥今呼豆鼠頭似兔尾有毛黃黑色性好

在田間食豆穀甯古塔紀略烏稽出黃鼠食之最佳如有鼯鼠即田鼠形似鼠而大穿地以行松鼠蒼黑色大尾好食果竈小者不過三寸通身豹文

白魚 廣雅云鮪鱈玉篇鱈白魚鮪一作鮪鮪又名鱈說文鮪白魚也細鱗白色頭尾俱昂大者或長六七十尺松江產者最佳

鱸魚 巨口細鱗四腮與松江鱸魚鮮美無異腹內子大如菘豆味亦絕佳松江鱸魚鮮美久播吟咏松江鱸魚亦膾炙人口時人謂之側鱸魚

鱈魚 俗名秦皇魚鱈魚即鱈魚之誤產盛京最多巨口細睛鼻端有角大者丈許重可三百斤輦以輸京師都人分鱈之目爲珍品遼名色黑麻魚頭大者須一車載之嘉慶前

此物甚賤自京以此骨爲美品魚頭遂不肯售競相晾曬發賣而價亦特貴

烏互路魚七里性魚二魚皆逆海入混同江黑斤濟勒彌人不知歲月皆以江蛾飛時爲捕魚之候江面花蛾變白蛾時值五月烏互路魚入江青蛾初飛時值六月至七月上弦七里性魚入江其至也三四聯貫逆流而上轟波噴浪勢甚洶洶魚日行可六七百里黑斤入於江邊水深數尺多置木椿橫截江流長或二三丈四五丈亦有作方城形虛一面無椿名曰閘橫平置水面下繫以袋網次日操小舟取之每一閘可得魚數十斤

達發哈魚甯古塔三姓琿春諸江河有之秋八月自海逆入江驅之不去充積甚厚腹中子大如玉蜀黍取魚曬乾積之如糧一作打發哈子若梧桐色正紅嫩之鮮皮色淡黃日光映之若文錦可爲衣裳及履襪又名達布哈魚牙最利含小魚黑斤江面小青蛾再飛時值七月下弦至八月晦達發哈魚逆海入混同江

哲祿魚齋祿魚似鱸魚色黑味美不腥出甯古塔赭祿魚細鱗魚頭尖色白

發綠魚似鰻花魚而大色黑夏間最多滿洲人喜食之

縮項魚即鰻魚縮項穹脊扁身細鱗俗呼鰻花一作魴鬚

重層魚即鯊鮪如鯉而狹淡黃色嘗張口吹沙魚長尺餘細鱗如粟金光燦目鱗背上黑點如豆排列成行魚腹一綫中分脊翅後多一輦翅嘴有重層是魚之罕見者

倒鱗魚 出甯古塔船廠城東龍潭山鱗皆倒生相傳以爲龍種尼失哈站南山上有潭產

小魚皆逆鱗人不敢食尼失哈者滿語小魚也

船釘魚 長二三寸大頭闊口黃色有斑見人則以喙挿泥中

箭頭魚 頭尖小如箭

喇啞魚 蟹身魚尾澤畔石下有之

黃花魚 扁身弱骨雜黃色腹鱗可黏物出東海

黃錙魚 似白魚而頭尾不昂闊不踰寸長不徑尺土人呼爲黃骨子

江獺 出混同諸江形似狗而小長尾色青黑亦有色白者獺穴必預度水所不至人以其

爲潦水之候混同江尤多

海狗 獸身獸頭魚尾尾連兩短足毛有斑文油能澄水腎入藥名腦胸臍出甯古塔竹葉

亭雜記云都城市中有戲海豹者圍以布幔索錢入視其物實魚而狗頭喙若虎四足類

鼈黑質黃斑若豹皮長三尺餘其噓如吼與之食物能以前兩足據桶出水而奪之狀甚

猙獰戲者謂海豹按山海經北嶽之山諸懷之水出焉其中多鮭魚魚身而犬首郝蘭皋

謂極似今海狗豈即腦胸臍耶

海豹 出混同江等處長三四尺闊二尺許短毛淡綠色有黑點可染黑作帽叢居水涯常

以一豹護守如雁奴之類其皮可飾鞍褥

海龍 大與海豹等毛稍長純灰色京師人每誤指爲江獺皮

海驢 形似驢常於秋月登島產乳皮製雨具雨不能潤今亦罕見船估有得其皮者毛長

二寸許晴則鬚下垂陰則鬚綵整整也或以製臥裯善人御之竟夕安寢不善人枕藉魂乃數驚島夷詭其靈不敢蓄也

海牛 形似牛鬣脚鮎毛其皮甚輭可供百用脂可燃燈甯古塔恒產今亦不常有

海猪 類江豚生海中形如豕鼻在腦上作聲噴水直上百數爲羣其子如蠶魚子數萬隨母而行人取子繫島中其母自來就而取之狀大如百斤猪色青黑如鮎有兩乳有雌雄其膏最多石石灰船最良有黃肥不可食甯古塔海參歲時有之

哈什蟆 多伏巖中似蝦蟆而大腹又名山哈塞上舊聞錄云長白山之溪谷中產生哈什蟆形似蛙而徧體光滑色淡黑尻無竅不辨雌雄飲而不食不能排泄秋深木落腹輒膨脹累累殭死新雨後腹自生涎雌雄黏合雖力劈之不解涎盡乃離即爲交尾期但不膠卵其遺種何由卒莫能明也剖之腹中滿貯細粒之黑砂有類炭屑兩肋有肪脂質獨瑩白用水漂浸即浮漲色愈潔白如凝脂和以鹽糖作羹醫者云有潤胃養陰之功特自古丸藥不載其名據土人云是物吸飲長白山溪水山多產稜性能補益人云

蚌蛤

附東珠

形長曰蚌圓曰蛤東省江河巨流出此尤以牡丹江上游爲多狹而長內孕明珠往時甯安府城南有珍珠河最多混同江及烏拉諸河亦有之採珠者將蛤排立沙內挨次取視去肉取珠然亦時有時不有即有之亦其小者大而光圓不易得也前清貢入內府故烏拉總管署設有櫃子珠採之以進內若農民於春夏間採之爲珠子櫃所知謂爲私採多方詐索相以爲戒現在所售之珠大都在湯原縣唐王河等處居多珍珠河不易有焉

山蠶 一名樗繭放之樗柞等樹春秋收繭練絲爲紬又有綠繭多生山中杏條上綠色堅韌往時箭扣常用之

白蠟蟲 大如蠶芒種後則延緣樹枝食汁吐涎黏於嫩莖化爲白脂乃結成蠟處暑後則剝取謂之蠟渣過白露則黏住難刮其渣煉化濾淨凝成塊即爲蠟甯古塔漢人能自爲蠟燭滿洲近亦效之

蜜蜂 出吉林諸山土人不知養蜜蜂有採樵者採松子於枯樹中得蜂窩其蜜無數漢人教以煎熬之法始有蜜有白蜜蜜脾蜜尖生蜂蜜蜜蜂在諸山中採食稜花故吉林蜂蜜較他省爲更佳云

蛇 吳振臣甯古塔紀略云余曾於六月中遘一蛇長三四尺以小刀斷爲三四截頃刻即

連又斷四五復接如舊行更速再斷之每斷用木夾牆外擲之有懸於樹上者始不能連後有識者云此即續弦膏弓弦斷處以此膏續之膠固異常雖用之積久他處斷而接處不斷乃無價寶也甚爲惜之

菸

一名淡巴菰即烟草冬可禦寒東三省菸以吉林產爲最佳吉林城南一帶名爲南山菸味濃而香江東一帶名爲東山菸香艷而醇城北邊台菸爲次甯古塔菸名台片獨湯頭溝有地四五响所生菸葉止有一掌味濃而厚此南山東山台片湯頭溝之所分也通名黃菸摺載入關者最夥爲土人衣食所資

磨菇

種類不一生於榆者爲榆磨生於榛者爲榛磨而榆肉生樹窟中味尤美即占所謂樹雞也磨菇有凍青羊肚蒿子雞腿銀盤粉子交烏郎甕子尾等名菌屬巨木雨餘所蒸含苞而毳狀若芝味甘膩甕子尾即猴頭磨菇箇莫大於猴頭味莫鮮於雞殼吉林一省尤爲產磨之數生于倒枯松上圓徑一二尺而色白者爲松花磨最不易獲紫色而散生者爲松散磨斫伐樾樹俟三年後枯朽而生者爲黃磨又名凍磨色深黃生樺木上而有刺者名刺磨經生者爲對子磨秋生者爲花臉磨特性寒不宜多食耳

棧

吉林人棧前清時採禁甚嚴由官設票房領票往採無票則爲私挖有干例禁故土人私挖者隱語曰挖棒槌後改棧稅此禁稍弛矣棧性熱往往產山深不見日光處一苗高

數寸苗頭平分數莖每莖五葉以六莖爲最多根亦最佳間有一二莖其根至美是必原根俗呼爲蘆頭以曾經受傷從旁側生苗幹者也採蓐者名放山每年放山三次三四月爲放草因百草初生蓐芽甫茁也五六月爲放青蓐苗成菜而尙青八九月爲放紅以蓐苗結子淺紅易認也蓐籽落後又曰刷帚頭採後下山曰轆棍皆土人隱語也採蓐者或數十人一羣一羣之中有把頭能辨山脈識蓐苗其占候察驗純乎心得入山中剝樹皮爲屋名窩棚把頭令其夥排列各間一丈地執一棍名擘羅棍以攔捺草挨步注視見有蓐苗則量蓐之大小刈草成圍而後挖用骨簪攔辨草根恐妨蓐之根鬚也挖出後裹以松皮名曰棒槌箬背負下山蓐以野蓐爲最佳次則移山蓐移山者見山中蓐苗移置他處而灌溉也再則有種蓐種蓐但蒔其子其法預將蓐籽窖一年再擇一土性相宜之地攬之鬚細湯撒畦中覆之土灰出苗後三四年又復移直一畦排隴捕蒔用七尺五寸之高板棚覆其上春秋二季揭板曝三五次當陰雨連綿亦放兩三次經三四年始採收製造名曰做貨做時先將蓐用沸水煮半熟以小毛刷將其浮皮洗淨用白綾小弓將蓐紋中塵土剔盡後用冰糖熬清汁浸蓐一二日上火盤烤乾亦有不煮不浸而生刷蒸者名曰麗蓐即假高麗蓐之粗製法大抵移山蓐其佳者與野蓐同功種蓐則不及同屬一物低昂遠判審其貴賤但辨其根有多節質之堅緻而已吉林出口蓐據營口稅關云每年

統計貴賤平均約值出二十五萬餘斤價值三十四五萬餘金焉  
松花石 出混同江邊砥石山玉色淨綠光潤細膩可充硯材品埒端歙滑不拒墨澀不滯  
筆能使松烟浮艷毫穎增輝清高宗有松花石硯銘曰出天漢勝玉英琢爲硯純粹精勅  
幾摘藻屢省成又松花玉甯古塔山有之今俱不能得

第 七 章 地 產



附錄

輿地雜誌

吉林石城名曰船廠據史云順治十八年命昂邦章京薩兒吳代造船於此以備征羅刹之用柳邊紀略載萬季野以爲即明永樂間船廠當有所據而云然也又云聞陳敬尹曰吾初至小烏喇尙無造船之命而穿井輒得敗船板及鏽鐵釘故今之土人尙稱船廠不稱吉林知其稱名由來久也

寧古塔之名不知始自何時柳邊紀略云寧古者漢言六塔者漢言個相傳有老者生六子遂以名其地

三姓爲滿清遠祖所居之地爲渥集部之一所居在牡丹松花兩江岸其部有三曰諾雷一作雷曰克宜克勒一作革曰祜什哈哩一作祜所謂三喀喇是也滿語呼三姓爲依蘭喀喇依蘭數之三也喀喇姓也今之依蘭縣蓋截取上二音羅刹外史東方有四子部其一爲愛新覺羅部即滿清本部譯漢文曰趙姓一爲喀叱克勒部譯漢文曰葛姓其餘二部未審何名但記譯漢文曰蘇姓盧姓想非諾雷祜什喀哩二部也

關外邊隘往時挿柳結繩以定內外故謂之柳條邊吉省邊門有四曰巴彥鄂佛羅邊門曰伊通邊門曰赫爾蘇邊門曰布爾圖庫邊門巴彥鄂佛羅邊門舊名法特哈以山得名省正

## 吉 林 彙 徵

北一百八十里爲伯都訥黑龍江往來孔道東北以額塞哩河爲界邊外皆蒙古科爾沁等部伊通邊門即易屯邊門亦稱一統門省西北一百八十里赫爾蘇邊門即克勒蘇門以河得名省西北四百六十七里布爾圖庫邊門舊名布爾圖庫蘇巴爾漢又名半拉山門蘇巴爾漢滿語塔也以門之東南塔山爲名門外蒙古界省西北五百六十八里自巴彥鄂佛羅邊門至布爾圖庫西威遠堡邊門圍長六百二十二里邊柵高四尺五寸邊濠闊深各一丈吉林城東之龍潭山亦曰厄什哈山山上有潭曰龍潭周五十餘步水色深碧積雨不溢久旱不減周圍叢樹濃蔭遮翳人莫能測其深淺聞有人以繩繫石投之數十丈未得其底潭之西南有二石穴外狹內闊伏而入僅可容身其洞深黑有風颼颼無敢深入者潭之東南林內有樺木一株高九丈餘圍二尺上下標直枝葉翦齊清高宗東巡封爲神樹歲時將軍巡撫往祭之光緒末年其樹忽萎又以近旁之小樹指爲襲承之及清祚已移祀典遂廢而小樹亦就枯萎土人遂訝其樹能與國同休戚愚哉

窩集亦曰渥集一曰烏稽又曰阿機吉林有四十八窩集分爲長白山小白山兩系大抵在林木雜叢夏多哈湯人馬難行之處樹密爲窩可以居集皆稱窩集故自長白山及松花江沿岸以及三姓甯古塔等處號爲窩集部往時因人跡稀少採伐甚渺森林茂密蒼龍彌滿自俄人東清鐵路成後松花江輪舶行駛俄遂組成伐木公司所供燃料取給於我翦伐既

多童山濯濯不獨向之所謂窩集者不復能見將來取用既竭仰求於人異時受困悔之已晚不可不預爲籌也按哈湯即指林中有水而言也

五國城辨

五國城據遼史營衛部族志係五國部曰剖阿里國滿洲源流考今譯改益奴里國今譯改奧里

米國今譯改越里篤國今譯改越里吉國今譯改遼史地理志五國部聖宗時來附命居本

土以鎮東北境屬黃龍府都部署司五國城當別爲五部斷非一地也高士奇扈從錄謂在

羌突哩嚙尙楊賓柳邊紀略謂在三萬衛北一千里自此而東分爲五國或云在朝鮮北境

或云在伯都訥城強爲解說莫能折衷曹廷杰東三省輿地圖說五國城攷以爲在三姓下

自混同江至烏蘇里兩岸之九古城並指希爾哈城爲金徙徽欽二帝之五國城蓋就史稱

自韓州徙來道里計之約略當在此處並無確鑿證據也按五國城當在寧古塔上下數百

里三姓亦五國城之一不當在混同烏蘇里江岸也北盟會編五國之東接大海出海東靑

女真發甲馬千餘人入五國界接東海巢穴取之與五國戰鬪而後得是又明明以五國城

瀕海並非在混同烏蘇里江岸也又金史本紀景祖時五國博諾部節度使叛遼應路不通

景祖襲禽之遼咸雍八年五國穆延部舍音貝勒叛遼應路不通景祖伐之舍音敗走是時

渤海尙屬遼金乘五國各部叛遼襲而取之即爲滅遼張本故女真往五國取鷹與遼有關

係也至五國城之當在甯古塔上下尙有歷史地理可證者宋史建炎二年金徙二帝於韓州四年金將立劉豫乃徙二帝於五國城去上京東北千里今沙蘭河站驛旁有二聖墓沙蘭河南岸有古城則二帝所徙之五國城當即在此所云去上京東北千里按之地道亦適相合況徽欽自徙鶻里改路之後未嘗再徙鶻里改路即呼里改路則以沙蘭河旁之古城爲徙二帝之九國城確無疑義元一統志開元路南鎮長白之山北侵鯨川之海三京故國五國舊城東北一都會也所云三京當在東京張賁東京記甯公台西南六十里曰沙嶺嶺東十餘里有古城焉土人相傳爲東京五國城當即此也又遼史東京遼州始平軍拂捏國部即今甯古塔西南八十里古城俗稱東京城拂涅博諾聲音相類其地接長白山之北跨海之南或即博諾故城歟遼史五國城隸黃龍府都部署司金則改隸瑚爾哈路金史地理志瑚爾哈路西至上京六百三十里案盛京通志滿洲源流考瑚爾哈河南岸有火葦城俗名古大城宮殿舊址猶存金呼爲爾哈路亦統於上京當亦五國城之一也前清聖武記三姓城在甯古塔東北五國頭城在焉甯古塔東三百里有依間哈喇土城即五國城故址是三姓爲五國城之一所云五國頭城者蓋由金上京往甯古塔以三姓當其先路故曰五國頭城至依間哈喇城今雖無地址可考而其爲五國城無疑也又陶宗儀輟耕錄高麗以北名別十八里譯言連五城也元史譯文証補云回語五爲別十城爲八里故又謂五國城在

朝鮮北境以今攷之琿春縣北六十里爲明之密拉衛俗名密江今屬琿春德化鄉有古城一又琿春北俗名陰陽坎距離十二里之半拉城紅溪河南十五里之小城子又河南二十里之碾子山前又東六道溝營城子各有古城計琿春左右二百里間有古城五土人均呼爲高麗遺迹今所謂五國城或即指此然其地去遼太遠按之前史均不符合又嘯亭雜錄謂五國城古稱五國頭城以地據五國總路之首得名設節度餉之屬黃龍府遺址今在何所無可考乾隆中副都統綽克築伯都訥城掘得檀匣宋徽宗所畫鷹軸又古瓷數十件並得碑碣錄宋徽宗晚年日記云於天會十三年寄迹於此業經數載始知五國城即此地是以伯都納爲五國頭城不知當日徽宗遷徙不止一處不得以遺跡所在即爲五國城也

### 謫戍人物考

關東流放罪臣不自清廷始也明代永樂以後文臣武將遷謫於此寔多天順復辟尙書王直故有使我在閩今當不免遼陽之行語但見於明史悉以鐵嶺衛爲戍所初無旁及者至清康熙二十二年割平吳三桂所有罪人悉戍於開原之尙陽堡兩語稱其爲尼台堪蓋亦尼台堪漢人之謂也踵明代舊例耳至後又有羅刹之亂遍設軍台凡遣戍人俱稱台丁給田耕種今所謂站地是也乾隆初謂漢人放逐旣多恐滿人染習下詔禁止惟遣發黑龍江給披甲人索倫赫哲人爲奴終未改耳

吳兆騫字漢槎江蘇吳江人幼慧傲放自矜在塾中見同輩所脫帽輒取溺之塾師責問兆騫曰居俗人頭何如盛溺師歎曰他日必以高名買禍順治三年舉鄉試主試官杭州錢開宗嚴州方猷因通關節物議沸騰達於京師清帝震怒勅部嚴加覆試黜落舉人三十餘名主考官官二十二入刑於市兆騫因不肯就覆試爲言官所劾謫戍甯古塔二十三年以故人顧貞觀百方營救始得赦歸先是明珠當國其子成德夙知漢槎之才而與顧貞觀善貞觀爲漢槎求援於成德成德許之期以十年顧爲泐然曰人壽幾何因譜金縷曲二闋寄吳蓋傷其遇之不終而思所以慰藉之也成德見之泣下曰山陽思舊之作都尉河梁之什並此而三矣不玉成此事非人也遂力言於內納贖始放歸兆騫著有秋笈集子振臣生成所學問淹貫著有甯古塔紀略與兆騫同時謫戍此地計有七人故當時號稱七謫會七謫者張縉彥字公坦兆騫目爲河朔英靈有江左風味江甯姚琢之詩如春林翡翠時炫采色湖州錢虞仲方叔丹孛兄弟三人震澤錢威字德維亦是科舉人與兆騫同謫者議論雄辨詩格蒼老山陰楊友聲鐵面虬髯詩甚清麗此外又有海陵陳編修志紀字雁羣康熙間上書論督撫大吏貪污又勸上用威刑忤聖意遣戍甯古塔與兆騫情致殊深唱酬亦富而從學者閩人陳光啟字昭令秀而好學兆騫謂北州少年此爲之冠以上諸人或賜環歸國或永葬冰天載籍無徵知泯歿者多矣

## 附錄顧貞觀金縷曲詞二闕

季子平安否便歸來生平萬事那堪回首前路悠悠誰慰藉母老家貧子幼記不起從前  
杯酒魑魅捉人應見慣料輸他覆雨翻雲手冰與雪周旋久淚痕莫滴牛衣透數天涯  
團圓骨肉幾家能穀比視紅顏多薄命更不如今還有祇絕塞苦寒難受廿載包胥承一  
諾吟烏頭馬角終相救置此札懷君袖

我亦飄零久十年來深恩負盡死生師友夙昔齊名非忝竊試看杜陵窮瘦曾不減夜郎  
儂德薄命長辭知己別問人生到此淒涼否千萬恨爲兄剖兄生辛未我丁丑共些時  
冰霜摧折早衰蒲柳詞賦從今須少作留取心魂相守但願得河清人壽歸日急翻行戍  
稿把空名料理傳身後言不盡觀頓首

楊越字友聲浙江山陰人明諸生明社既屋散資結客將有所爲未果也其友以起兵下獄  
密書乞援邏者獲烏逮戍甯古塔旣至戍所於其鄉人教以誦書作字暨禮讓之節所在化  
之至同遣者生養死葬婚嫁皆助所不給皆曰楊夫子來晚云卒於戍故事死謫戍者不得  
還葬子賓衰服跪刑部兵部門號泣陳訴越四百五十有五日愴動行路當事者爲求比例  
遂得請賓乃扶柩奉母范歸臨行時甯古塔人設祭相屬於道有持賓號泣如送所親焉賓  
著有柳邊紀略

浙人戚祥麟清翰林侍讀學士精數學能占晴雨不渝暑刻以事遣戍甯古塔嘗語人曰吾不能逆睹免禍亦數也然某年當歸已果賜環

葉之馨四川巴縣人雲南大理府理刑居官有善政恥服滿制衣冠嘗以薙髮爲恨聞吳三桂起兵隻身往從之領一軍攻蜀三桂敗遣戍甯古塔

清康熙中滿洲科臣圖爾泰葉赫巨族也與明珠同族不善所爲嘗劾奏滿臣權重漢人之官六部九卿奉行文書而已滿人馨咳無敢違者殊非立政之體以忤權臣謫尙陽堡尙理學於戍所自置周程張朱四先生祠朝夕禮拜人笑之亦不顧也若而人者殆亦滿族之鐵中錚錚庸中佼佼而已

李光遠蓬萊人清初爲饒陽令後以明崇禎三太子定王案株連遣戍伯都訥初光遠家居時定王教讀山左張岱霖家冒浙籍更姓張號潛齋光遠見其豐標秀整言論儒雅時以文字相往來訂爲莫逆交不知其爲明定王也後光遠宰饒陽定王過饒邑越宿而去又十餘年光遠解任歸定王携眷往依之遂館於其家爲課孫焉越二年因賊黨誣稱扶定王光復明祚爲偵者所知同被逮定王棄市光遠流徙二千里發配伯都訥此案牽連餘人同時發配甯古塔齊齊哈爾城

按三十七名慈恩崇禎第一子近人領帶印著雞林舊聞錄載有李光遠撰張先生傳即定王也傳中述此案本末最詳

吳郡金喟字聖歎少有才名性放誕出詞罔忌初補博士弟子員以歲試文怪誕被黜明年

科試易名人瑞文宗某汝置第一仍復儒冠嘗謂世有才子書六蓋離騷莊子史記杜詩及施氏水滸傳王實甫西廂記也遍加評語批論透關識見精到謂爲金批盛行吳下順治庚子哭廟案金與焉聞是獄之輿爲知吳縣事山西任某以非刑預征課稅生員薛爾張等因民忿鳴鐘擊鼓入文廟哭泣諸生不期而至者百餘人時適清順治帝哀詔至蘇設幕府堂巡撫率官紳哭臨諸生旋道府堂進揭帖而繼至及觀者復有千人羣聲雷動訾逐任令撫臣大駭命執之即獲諸生倪用賓等十一人餘皆星散旋有教授程邑參任令六款而金人瑞十弗見之訕又陰指撫臣撫院朱素性刻忌必欲殺金等而後快遂以特符抗納任令比追遽遭怨謗致當哀詔初臨日集衆千百上驚先帝之靈但邑令命官民稱父母該生等擅敢於哭臨之際聲言扛打似此目無法紀深恐搖動人心等語密疏具奏既上發欽差大臣赴江甯公審獄成奏習倪用賓等於遺詔方到鳴鐘擊鼓糾黨千人倡亂訐告擬不分首從斬決妻子財產入官於是同時死者一十八人爲倪用賓沈昀顧偉業張韓來獻祺丁觀生朱時若朱章培周江姚剛徐玠葉垠薛爾張丁子偉金人瑞王仲儒唐堯治馮郅也嗚呼官吏之淫威文網之嚴密文人苟非韜晦自全鮮有不遭殺身之慘禍者况放誕不羈如聖歎哉當人瑞在獄時付書於妻曰殺頭至痛也籍沒至慘也而聖歎以無意得之不亦異乎故其臨難時口誦一絕云天公喪母地丁憂萬里江山盡白頭

時方大雪

明日太陽來作弔家家檐

吉

下淚珠流其狂誕至死不易也聞聖歎被難之先請卮仙問終身事判云斷牛不解其故及難發後其子流竄至寧古塔見屋後有一斷碣祇存一牛字始悟卮仙斷牛之讖云聖歎子孫遂流落寧古塔今寧安縣東北二十餘里有金家窩棚金姓數家皆聖歎裔也

林

汪景祺錢塘人在年羹堯幕中作讀書堂西征隨筆其所作詩甚多指斥時事又譏議清祖祖諡法雍正年號又作功臣不可爲論以檀道濟蕭懿比年羹堯坐大逆不道斬梟妻子發黑龍江爲奴期親兄弟叔姪發寧古塔爲奴

兼

石門呂留良字晚村薦舉博學鴻詞科不就著有四書講義語錄語類日記諸說篇皆於經義之中寄種族之痛以喚起民人亡國之憤惜其著作在清雍正朝全書焚燬無從考證文字之獄由於湖南曾靜家居憤鬱遣其徒張熙詭名投書於岳鍾琪勸以同謀舉義事未成獄輿詞連留良卅宗嚴治之並將留良所著日記等書追出遂與大獄株連甚多時留良已死其子呂葆中因一念和尚謀叛案亦以憂懼先死遂修呂留良及其子呂葆中屍次子呂毅中斬決孫發配齊齊爾於是漢人之義憤大起甘鳳池輩日從事於暗殺留良之孫女精劍術爲祖父復仇相傳世宗之死即爲其所刺殺云

兼

嚴鴻達亦與留良同黨著有日記內載怪風震雷肆抵清朝因留良株連亦戮屍其孫發甯古塔給與披甲人爲奴又據甯古塔紀略謂婦人跣足露脛敲冰出汲擔頭號哭皆中原貴

族發配此地者惜當日未能詳載姓氏蓋康熙雍正時甯古塔流人最多今已不可考矣

附  
錄  
諸  
成  
人  
物  
考



一  
四  
二

## 金石考

吉林金石自金時始有之迄今所發見者大半屬阿勒楚喀一帶地方爲多蓋阿勒楚喀城爲金上京會甯府故址也今尙有朝門宮殿遺址荒台廢苑舊礎猶存土人掘地往往得金代遺物及古印宋錢之類蓋女真人我中原漸知文化振興學校崇尙儒風於是潤色鴻業紀述豐功勳之於石以期誇耀後世今石刻之僅存者以得勝陀碑完顏希尹碑□同三司代國公六禍雖經風霜剝蝕字漸模糊剔藓剗苔尙有可証餘則盡歸漸滅考古者無從搜輯耳至永甯寺兩碑今已淪入異域此外恐尙有古劍泉刀殘碑斷碣沈埋於荆榛蔓草中者不知凡幾茲就所已出土者以文煩不能備載錄存其目以俟訪古者得所資考焉

## 合重渾謀克印

柳邊紀略云康熙丙寅年沙爾虎舊城掘一銅章傳送禮部大若州印面篆合重渾謀克印六字背左一行楷書如回文右一行刻大同二年少府監造八字按大同遼世宗年號而謀克則世傳金爵也今觀斯印則金未建國號爲遼屬國時已有斯爵而後特廣之耳

## 上京東京等路安撫司印

烟岡集開墾時農人耕地得此印按金百官志承安三年以上京東京等提刑司併爲一提刑使兼宣撫使覆改宣撫爲安撫安撫司掌撫人民譏察邊防軍旅審錄重刑仍專管

明安穆昆金副兵隊之首領曰總管其下有以安有穆昆有京教習武藝及令本土純愿風俗不改安撫使副內差一員於咸平一員於上京分司四年罷咸平分司使在上京副在東京使正三品副正四品志稱三品印方一寸五分半今印得建初尺三寸強得今工匠尺二寸一分強是金官尺長於今尺四寸餘矣

彈壓所印

印在今賓縣城廟內背鑄興定二年按金百官志無此名惟提舉倉場司注載興定五年擬置潼關倉監支納一員兼樞密院彈壓是彈壓所蓋屬樞密或偶置旋罷故志不載印仿建初尺二寸弱以安撫計印度之蓋四品官也

寶山衛指揮使司之印

會城東北小城土人耕地得此印背鑄永樂六年文篆作九疊明史志云三品銅印方二寸七分今量得建初尺三寸九分弱今工匠尺二寸七分強

總統府印幕

據近人魏聲和塞上舊聞錄民國元年東甯廳懇民鋤地得銅印一方二寸高七分篆文曰總統府印幕旁有貞佑二年造五字銅質鏽蝕筆畫尙整現存廳署中按貞佑金章宗年號是年金於上京諸路郡縣頗多建置如升咸平路之玉山縣爲節度亦在是年今東

甯廳金率寶路也

柳邊紀畧載福建陳昭令於沙蘭北掘一鏡長四分闊二寸五分四角皆委一凸下凹皆有紐在其端有篆文曰俗辨圜旁象二龍而各加劍於首一象水波紋又甯古塔紀畧甯古塔有人掘一鏡背鑄銘兩行左一行不可辨右一行曰不劍而鏡又宣統二年延吉府二道溝口西古城裏土人掘得萬戶侯銅方印一顆爲延吉廳教諭溫迎宸携去又有人掘得銅方印一顆篆曰副統所印上面鑄貞佑十一年禮部造八字想是總統府屬之副統爲後時所添置也并記於此

### 金得勝陀碑

在伯都納北石碑嶺其地爲金太祖誓師之地當金攻遼時太祖先次察晦城諸路軍皆會於拉林水進軍甯江州十月朔克其城明年收國元年克黃龍府遂平渤海遼陽等五十四州此碑蓋大定五年追述太祖會軍於拉林水時誓師之事碑爲趙可撰文孫侯書丹黨懷英篆額高七尺餘寬三尺二寸正面三十行最長一行七十八字正書額題大金得勝陀頭碑六字篆碑陰十二行女真字不可辨識考完顏希尹傳太祖命撰本國字天輔三年頒行後熙宗亦製女真字希尹所撰謂之大字熙宗所撰謂之小字檢金石萃編載金皇弟都統君行記每字以兩三字合成如琴譜之製琴字蓋女真大字也此碑與萃

編所載國書碑同蓋女眞小字也按女眞書與清書蒙文均不類清書蒙文皆取元國師拔思巴所製四十九字母女眞則點竄漢文而成字也

### 金完顏婁寶碑

據云在薄屯山地名石碑泡碑高八尺八寸闊四尺五寸厚一尺二寸頂高三尺正書南面鏤蛟龍其陰殘毀其陽篆二十字作五行文曰大金開府儀同三司金源郡壯義王完顏公神道碑王彥潛撰文任詢書左光慶篆額按薄屯山今爲伊通州境碑已佚今從柳邊紀略錄其文是康熙中尙在也滿洲源流考引已不全則其逸當在乾隆時今已無可考矣

### 金完顏希尹碑

在吉林府東北二百里小城子正面二十七行碑陰二十四行行五十六字正書額題大金尙書左丞相金源郡貞憲王完顏神道碑篆書王彥潛撰文任詢書左光慶篆額據吉林將軍長順記云吉林有事通志甄及金石楊司馬同桂物色得此碑已中斷矣榻以視余漫滅十二三顧其事有史傳未及者史言熙宗以詔賜死碑述所由則言嘗以禮裁抑后大忤后旨其死后譖之按原碑文中云自悼后正位中宮以巧慧當帝意頗干預外政王杜遏其漸每以正理口由是大忤后旨得罪曖昧或者以爲后之譖焉夫彼婦之口可以出走也聖人且歌焉何有於希尹也哉而世謂金石可補史闕以此抑今去碑

遼東郡蓋猶文士以古名施於今地之陋習耳又考洪武以後洪熙以前陳遇十八年皆非丁未丁未二年疑爲永樂之剝文考明史洪武二十六年遼東都指揮使司奏朝鮮招引女真五百餘人欲入寇蓋洪武永樂間嘗用兵女真故領軍得以至此也

### 勅修努兒千永甯碑記

在松花江下游特林地方碑二十七行行六十二字正書案是碑無年月碑中有永口九年春遣內官亦失喀等知是永樂年立字跡剝落僅存十分之二餘俱無可辨惟後銜名自十八行自二十七行尙可認識今入俄羅斯阿穆爾省境

### 重建永甯寺碑

亦在特林地方記文二十行四十三字正書後銜十行可辨者三行餘俱泐明宣德九年立碑陰有蒙古字不可識碑側惟唵嘛呢叭彌吽六字漢文可識餘皆蒙古字不可辨按此二碑一立於永樂中一立於宣德八年皆紀太監亦失哈征服奴兒干及東海苦夷事考奴兒干之地始見於元史地理志有俊禽曰海東青由海外飛來至奴兒干明一統志云女真北至奴兒干北海正在今混同江兩岸爲費雅喀奇勒爾各部所居明會典永樂二年女真野人來朝其後悉境歸附九年始設奴兒干都司柳邊紀略載威威伊克阿林碑言威伊克極東北大山也上無樹木惟生青苔厚長三四寸康熙庚午與阿羅斯分界鑲

藍旗固山阿眞巴海等分三道往視一從享烏喇入一從格林必拉入一從北海繞入所見皆同遂立碑於山上碑刊滿洲阿羅斯喀爾喀文曹廷杰日記謂紀略所言碑刻三體字今此碑實六體字是否即楊賓所謂威伊克阿林碑未能臆斷然以所載三道路往視之道計之則道里相合蓋威伊克阿林在混同江南岸奇吉泊下今其地名特林即威伊克阿林之合音豈分界時即以三體字文刻於明人舊碑之上耶查此碑載亦失哈征服奴兒干明史無可考明史百官志及宦官傳大監鄭和嘗率兵二萬行賞西洋古里滿刺加諸國西域則使李達迤北則使海童而西番則率使侯顯亦失哈亦以太監前後三至絕域勒碑而還紀傳皆無一語及之非此碑僅存則明代用兵東北之事竟無可考金石可以補史家之闕此也前碑碑陰皆蒙古字無異體文後題名有書蒙古字阿魯不花一人是此一體字爲當時所書無疑楊賓即以爲三體界碑其說無所稽考曹廷杰當日親見此碑並有搨本以爲六體書并非無據至於分界之說不無疑義康熙年並無與俄立碑之事實當日與俄分界在阿爾古納河自此以東東北及海以外庫葉爾島皆吉林屬地特林在海以內地豈有分界立碑即內暨百里地殊令人大惑不解也

阿勒楚喀城爲金上京故址往年土人掘地得斷碑作八分書中有云西眺辟瀛儒生盛於東觀又張賁東京記甯古塔西南有古城名火葦城土人相傳曰東京蓋金故都也亦

有掘得闕碑有下矚臺城儒生盛於東觀十字甚溥文字畫鼎楮蓋國學碑也觀此則知金之建國荒漢重學尊儒金史謂世宗大定十六年令京外設女眞學後又立大學而選明安穆昆子弟肄業其中上京東京均有大學知當時學校林立不止一處也又嘯亭雜錄乾隆中伯都納都統緯克托築城掘得碑碣錄宋徽宗晚年日記尙得其崖略云於天會十三年寄跡於此業經數載又塞上舊聞錄阿勒楚喀城址昨年得一六角石塔一截上刊上京會甯府寶勝寺僧人口口碑銘誌字跡已多糝糊可辨識者得三十九字僧保和縣人俗姓于氏天慶口年生人十一歲父母許放出家口到本府興圓寺至皇統元年試經受戒今石文存阿城縣署又甯古塔安珠瑚於福兒喀河邊得一殘碑僅五行合七字首行曰上順國次曰不次曰字次曰歸次田佃見甯古塔紀略又曹廷杰筆記雙城子有古碑字跡剝蝕僅存台二字台字旁寫疑有關筆相傳原文有寬永十三年湖北進馬三千匹二語諦視之惟寬永十三年湖北進馬九字尙仿佛可識三千匹三字已屬烏有其曰湖北當指興凱湖以北碑乘以鼃廬有石人石馬在前似爲日本古墓今被俄人毀壞並碑之上半亦鑿爲堦礫仿寰宇訪碑例因並記之



6

074274

9599